

NWER NYI LUK

*Nsoo Teofailus,**

¹ Ane gbalee ebnyon nsol nyi ma lim go egahre ellong, nyi e kpo taame tv go etingitingi.

² Bo nyono ana ane ba jolo go mbomannahb, ba nyehne nsol nyio go amahr tong-r, bo ji jolo alokeltum ba Alum Esowo.

³ Tib eji me n tob seb nsol nyio kpee kahn nob nob ana jolo go mbomannahb, owo wahng ka n tiri re, n'nob re, me n tob nyon nsol nyio go ntooranti ka-a,

⁴ eji a l'kahn re, nsol nyi bo tib-a no lohko li go etingitingi.

Ana bo jele Jon ji nwohngalahb

⁵ Ngare nyi Herod jolo ntul go Judea, nlimajom awohng jolo o, no bo jo lung-e re Sekaraya. Á woomo go ellong abalimajom ba Abija jolo ntubesi abo mahne mahne. Nkal ewe, bo jo lung-e re Elisabet ji lohngo go et'tohngo ji Eron.

⁶ Bo ane abal abal jolo atingitingi ane go esamahr Esowo, ba jo bum atahm nya Jehova kpee nseenga nseenge.

⁷ Bo jelem mmon awohng awohng. Tibre Elisabet jolo ngum a nnenkal. Ngare nyio bobkul ane abal abal.

* 1: 1:1 Elt 1:1

⁸ Efung abehng Sekaraya jo limi eltum njom alimi go etahk Esowo, tib jolo esenng e ji ellong n'ne.

⁹ Ana eljini ni abalimajom jolo no, owo bo kehm-e yehke re á kak agun go insens, jo teebe go ekp'kpa Esowo.

¹⁰ Ane baka kpee jolo ga elatahk, jo kak ero ngare nyi insens jo teebe.

¹¹ Owo enjel nyi Esowo kehm lohngo ba kpir-e. Enjel nyio yiimi go ejang eboblum bi edi njom jio ji insens jo teebe.

¹² Eji Sekaraya nyehn-e no, ala kehm-e tee, á kehme elfahle.

¹³ Owo enjel nyio kehm-e tongo re, “Sekaraya, ka kpe fahl! Esowo ebwuk ero eba. Elisabet nkal ewa bahke jele mmon no nlum ka-a. A bahk-e gungu mbing re Jon.

¹⁴ A bahke bele eyebatahng, fere jo geere. Ane gbalee, eltim bahke yebe bo, á l'jel-e.

¹⁵ Tibre á bahke jolo nj'joka nne go esamahr bi Esowo.[†] Á nehm jo wo amahm, a nsol elwoko nyehko nyi kpo lim nne. Bomo ngare nyi á wob nnyehn go ala, Etingi Etohko bahk-e ruru go atahng.

¹⁶ Á bahke feere abon Israel gbalee ba ka Esowo, Ntul abo.[‡]

¹⁷ Á bahk-e gboko mbang a etohko ji Elaija, a nsahm a nsahm enye,[§] eji á l'senng babnde ntim, bo fere jol ana abonse, fere senng akpuuru ane ntim, bo fere bel elkahne ni atingitingi ane, fere toobo ane bum Esowo.”

[†] **1:15 1:15** Mat 11:11 [‡] **1:16 1:16** Mat 3:5-6 [§] **1:17 1:17** Mat 17:11-13

18 Owo Sekaraya kehm bahbe enjel nyio re, “M bahke limi renan, kehm kahne, joare lohko li go etingitingi? Tibre me n kul, nkal ewame fvfo ebtob kul.”

19 Enjel nyio kehm-e faange re, “Me wo li Gebriel ji kpo yiimi go esamahr bi Esowo. Esowo bi tum-m no re me m ba bung a na, fere tiing-a nnoobo etib bia.*

20 A bahke gboko ekamme. A nehm ma kpe bung tete rehng efung bi ejum jia bahke jolo, tib eji a ki taame tv alum enyame nya bahke jolo go etingitingi, ngare nyio l'biingi.”

21 Ane ba jo sik Sekaraya jo kpo bo esi sehng, eji á ma laange ano go eksp'kpa Esowo.

22 Eji á lohngo go elatahk, á kpeem jo ma bung a bo. Owo bo kehm soro kahn re, yebnyehn nkpokosi ejum go eksp'kpa Esowo. Eji á ki ma jo bung go nnyo, á fere jo bung a bo go abo abo.

23 Eji afung nya á jo lim eltum go etahk Esowo ma mal, á kehm tahme kehng.

24 Eji ma jol ano, Elisabet nkal ewe kehm sake ela, sa woomo eksp'kpa tete nnyahng elon. Á jo bungu re,

25 “Anv, eji m ma fili Jehova ndon, owo á ma-m kak ebo mbang nyia, eji á l'lim-m, n jo lub ane.”

Etib bi enjel Gebriel tiingi Meri

26 Eji ma kang nnyahng erakera mi Elisabet sa ela, owo Esowo kehm tumu enjel Gebriel tv go ejahbe ajehng ji jolo go Galili, ji bo kpo lung re Nasaret.

* 1:19 1:19 Hib 1:14

27 Á ko etib ba a bi re á ba tiingi ngbahme anyehng nyi bo jo lung-e re Meri ji bo kala n'noongo a ne. Nne awohng no bo jo lung-e re Josef ji lohng go et'tohngo ji ntul a Devid wo lame elbal a ne.†

28 Enjel nyio kehm ba kpiri Meri, kehm-e tongo re, “M ma-a kak nnyo, wo ji Esowo ma-a fuulu. Jehova li a na.”

29 Owo ala kehm sahb t'teele Meri, eji á wuku etib bi enjel nyio tiing-e no. Á kehm kehme eltiiri bade ana nnyo akake mio lohngo no.

30 Enjel nyio kehm-e tongo re, “Meri, ka kpe fahl! Esowo ma-a fuulu.

31 A bahke sake ela, jel nnenlum no a bahk-e gungu mbing re Jisos.‡

32 Á bahke jolo nj'joka nne. Bo bahke jo lung-e re Mmon no Esowo bi gbale sehng. Jehova bahk-e jehke go eti etul ji nde Devid.

33 Á bahke fili abon Jakob go njinanjini. Etul ebe, es'kohlo nehm bel.”

34 Owo Meri kehm bahbe enjel nyio re, “Jia kehm jolo renan, eji n ki kpi nlum!”

35 Enjel nyio kehm-e faange re, “Etingi Etohko bahke jolo a na. Nsahm nyi Esowo bahk-a bulu.Š Owo bahke wahng ka mbarebara mmon no a bahke jele, bo bahke jo lung-e re Mmon no Esowo.

36 Nyehn Elisabet, nne a nnaahb ewa, ji bo jo lung-e re ngum a nnenkal, yebasa ela bi á bahke jele nnenlum, nnyahng erakera mi a, jol eji á ma k'kul o.

† 1:27 1:27 Mat 1:18 ‡ 1:31 1:31 Mat 1:21-23 Š 1:35 1:35 Mat 1:20

³⁷ Tibre Esowo, ejumjum limm, ji á kil jo ma lim.”

³⁸ Owo Meri kehm bungu re, “Me n li nlokeltum no Esowo. Nong, jol ana a bungu no.”

Enjel nyio kehm soro tahm.

Ana Meri je song nyehn Elisabet

³⁹ Jol gaam kang, Meri kehm toobo ebjing, foomo tahm song rehng go ejahbe ajehng ji jolo go ejang awong nya Judea.

⁴⁰ Owo á kehm song yange go etahk Sekaraya, kehm song kak Elisabet nnyo.

⁴¹ Eji Elisabet wuku nnyo mi Meri kak-e no, mmon no woomo Elisabet go ala kehm nvvdv. Etingi Etohko kehm ruru Elisabet go atahng,

⁴² owo á kehm soro kehme elbungu wahre wahre re, “Wo wo, Esowo ma-a fuulu go ellong anebkal. Elfuulu li ka mmon no a bahke jele.

⁴³ Jen ji wahnge elkohn nkpokosi ejum ana nyia ma lim re nnyehn ntul ewame ba nyehn-m?

⁴⁴ Tibre n wuku kan nnyo mi a kak-m no, mmon no wob-m ga ala soro yuudu go eyebatahng.

⁴⁵ Eyebatahng li a na, eji a ma taame tv etib bi Jehova tiing-a no. Tibre bahke lohko jol go etingitingi.”

Ana Meri jo tehk Esowo

⁴⁶ Owo Meri kehm bungu re, “Eltim ename kp'tehke Jehova.

⁴⁷ Etohko ejame kp'geere kak Esowo, nt'tahre ewame,

⁴⁸ eji á ma-m buumu, me ji li nlokeltum ewe no li reed.

Bomo anv asongo ane kpee bahk-m jo lung re,

nne no Esowo m-e fuulu.*

49 Tibre Esowo bi gbale sehng ma-m rod,
kp'limi agburu nsol.
Mbing enye li saang.

50 Ndon enye li ka ane ba kp-e fahle,
jol afi bo jini ngare anyi.†

51 Á tanne ebo ebe, fere tib nsahm enye, kam aneb
elgeere raade,
a ntir a ntir ebo.

52 Á kpo radde aj'jok atul go bo a nti etul,
fere mehl ane ba li rede rede wahre.

53 Ane ba njal ma yam bo,
á kpo ka bo anoobo nsol,
bo li wohngo,
fere yake afang ane, bo song abo abo.

54 Esowo ebkak Israel, nlokeltum ewe, ebo,
eji á ma buumu ndon enye,

55 nyi li go njinanjini
ana á bungu tong babnso ejahre,
fere tong Ebrahim,
a abon ebe.”

56 Meri kange ejum nnyahng era a Elisabet,
kehm feere kehng.

Ana bo jele Jon ji nwohngalahb

57 Ngare kehm rehng nyi Elisabet yahke jel. Á
kehm jele nnenlum.

58 Eji aneb nkontahk ebe, a ane ebe wuku ana
Jehova m-e tib egburu ndon enye, bo kehm-e tobo
elgeere.

* 1:48 1:48 Luk 11:27-28 † 1:50 1:50 Elt 10:34-45

⁵⁹ Eji mmon ma kang nfung enehkeni, bo kehm tahme re bo song yehk-e nrur. Owo bo kehm-e gungu mbing nyi nde re Sekaraya.

⁶⁰ Nnyehn kehm tene re, “E’ee, bo bahk-e jo lung re Jon.”[‡]

⁶¹ Bo kehm-e faange re, “Nne ewa awohng awohng limm, no kpi mbing nyio!”

⁶² Bo kehm bahbe nde go abo abo re, “Elkohn mbing anyi a bahke gungu mmon ewa?”

⁶³ Sekaraya kehm bahbe re, bo ka-e nwer.

Á kehm koko nyon re, “Mbing enye, bo bahke jo lung-e re Jon.” Ane kpee kehm kpoko bo esi.

⁶⁴ Sekaraya kehm soro kpe kehme elbungu, fere jo tehk Esowo.

⁶⁵ Kpee ane ba lene kohlo o kehm kehme elfahle. Eka jio kehm yeere go ejang bi ajahbe kpee nya jolo go awong nya Judea.

⁶⁶ Ane kpee ba wuku no, kehm rodo kak go bo a ntim, fere jo bahb re, “Anv, mmon noa bahke jolo elkohn nne awo?” Tibre bo nyehne ana nsahm nyi Esowo jolo a ne.

Ana Sekaraya nyehne amahr

⁶⁷ Owo Etingi Etohko kehm ba rur Sekaraya, nde Jon, á kehme amahr nyehn re,

⁶⁸ “Nong, wahr tehken Esowo bi Israel, bi li Ntul ewahre.

Yebba re á ba kak ane ebe ebo, fere fak bo yake.

⁶⁹ Á ma-r ka nt'tahre no kpi nsahm, no lohng go et'tohngo ji Devid, nlokeltum ewe.

[‡] **1:60 1:60** Luk 1:13

70 Ano wo Esowo bungu sehng go nnyo mi abarabare anyehnamahr ba jolo mahne mahne.

71 Á tongo re, á bahk-r tahre yehke go abo nya anebekv ebahre, fere yehk-r go abo nya ane kpee ba ma-r ko ekv,

72 fere tib babnso ejahre ndon enye, tob buumu mbarebare enyam ebe bi á nyame no,

73 eji á tiri no, fere tong Ebrahim, nso ejahre re,

74-75 á bahk-r yehke go abo nya anebekv ebahre, eji e l'jol ejahre ejahre ka ye ye, fere li eno go ege esamahr,§ jo lok-e,*

k'fahl afung kpee nya e li go elkpin.†

76 Mmon ewame, bo bahk-a jo lung re, nnyehnamahr no Esowo bi gbale sehng.

Tibre a bahke gboko Ntul mbang, song tuungu mbang enye bum-e,‡

77 fere tong ane ebe re bo bahke bele eltahre, tib eji Esowo bahke tahme ka bo go bo abiafem.

78 Tibre Esowo ebahre kpi egburu ndon nyi bahke lohngo go ero.

Ellohngo ni bahke lohngo bahke jolo ana njul kp'yake tub-r,

79 eji l'ka ane ba jehk go ejanng e ellenng e, a ane ba nong go emel elk, fere jo tib-r mbang nyi elkoono."

80 Mmon noo kehm gbale, fere tahne go etohko. Á jolo go elka emahng tete efung bi á lohngo gbuul, Israel kehm-e nyehne.§

§ 1:74-75 1:74-75 Rom 4:16 * 1:74-75 1:74-75 2 Kor 5:15

† 1:74-75 1:74-75 1 Jon 4:18 ‡ 1:76 1:76 Mat 3:3 § 1:80 1:80 Mat 3:1

2

Ana bo jele Jisos

(Mat 1:18-25)

¹ Ngare nyio nyi ntul Agostos kehm jehke ntahm re, bo fange njini kpee, kak abing ebo go nwer.

² Eji bo gbo mbang fange ane, Sirinus wo jolo ntubesi go Siria.

³ Nne awohng awohng kehm tahme go ege ejahbe re bo kak-e mbing go nwer.

⁴ Josef ji lene go Nasaret nyi Galili kehm tob tahm, song rehng go Betlehem ji Judea, ejahbe jio ji bo jele ntul a Devid. Tibre Josef lohng go et'tohngo ji Devid.

⁵ Á je ona re bo kak mbing enye go nwer, a Meri ji á tongo re á bahk-e koko, ye ji jolo ela.*

⁶ Eji bo jolo o Betlehem, ngare kehm biingi nyi Meri yahke ba eljele.

⁷ Owo á kehm jele ngbokambang a mmon ewe no nlum, kpenng-e abomo, fere rod-e, bum go ejum ji bo jo kak efong nsol alehke. Tibre eyake jolem go ekp'kpa elkang ka bo.

Ana babenjel song kpiri abaabebul

⁸ Abaabebul jolo ejang ejahbe jio, ba jo kang go emahng, jo baabe ebul ebo atv.

⁹ Enjel nyi Esowo kehm lohngo ba kpiri bo. Ellub ni Esowo kehm yake ana njul tub bo. Bo kehm kehme elfahle tete.

¹⁰ Owo enjel nyio kehm tongo bo re, “Kana kpe fahl! Tibre n ko nnoobo etib ba a bi, bi kpi egburu eyebatahng ka ane kpee.

* 2:5 2:5 Luk 1:27

11 Tibre lela bobjel nt'tahre ka-n go ejahbe ji Devid, no li Kraist ji Ntul.

12 A wo li elliingi ka-n. M' bahke nyehne mmon elbili no bo m-e kpennge abomo, á nong go ejum ji bo kpo kak efong nsol alehke."

13 Ellong enjel nyi ejahbetul Esowo gbalee kehm soro lohng ba kpiri enjel nyio, jo tehk Esowo re,

14 "Ellub jol a Esowo go ero. Elkoono jol a ane go njini, ba Esowo li a bo yebe yebe."

15 Eji babenjel ma feere ebo fi go ejahbetul Esowo, abaabebul kehm bungu atemtem re, "Nong, wahr tahmen go Betlehem, song nyehnen ejum ji ma jol, ji Jehova ma-r tong."

16 Owo bo kehm soro tahm elwaare, song nyehn Meri, a Josef, fere nyehn mmon nong go ejum ji bo kpo kak efong nsol alehke.

17 Bo nyehne kan ano me, bo kehm tahme, jo yannge, jo tooro tong ane ana enjel tongo bo bada mmon noo.

18 Ane kpee ba wuku ana abaabebul tongo bo, kehm kpoko bo esi.

19 Meri kehm kuuru nsol nyio kpee go ege eltim, fere jo tir bade.

20 Abaabebul bao kehm feere, jo ka Esowo ellub, fere jo tehk-e mbang mbang go nsol kpee nyi bo ma nyehn, fere w'wuk. Jolo na jol jang jang ana enjel tongo bo.

Ana bo gungu Jisos mbing

21 Eji ma kang nfung enehkeni, nyi bo bahke mmon noo nrur yehke, owo bo kehm-e gungu

mbing re Jisos, ny'nehm o nyi enjel tibi Meri, á kehm sake ela ebe.†

Ana bo ko Jisos song rehng a ne go etahk Esowo

²² Eji ngare biingi no nyi Meri bahke limi kpee, eji á l'kpe jol saang ana ntahm nyi Moses bungu no, owo Josef abola Meri kehm rodo mmon noo, tahm a ne go Jeusalem re bo song rod-e kak Jehova go ebo.

²³ Ana wo bo nyono go ntahm nyi Jehova re, “Ngbokambang a mmon no nlum awohng awohng no l'jini, á bahke jolo ka Jehova.”

²⁴ Bo kehm limi njom ana ntahm Esowo bungu no re, “Ane bao bahke kake etomtom ebbal, tohko jol ano mbehl ebal.”‡

²⁵ Nne jolo go Jeusalem, no bo jo lung-e re Simeon. Á jolo nnooba nne no jo fahl Esowo, fere jo sik nkakeltim no bahke ba kak Israel eltim.§ Etingi Etohko jolo a ne.

²⁶ Tibre Etingi Etohko lennge tong-e re, á nehm tiki waka kpo tete á nyehn Mesaya nyi Jehova bahke tumu.

²⁷ Etohko ji Esowo kehm-e yehke re á je go etahk Esowo. Eji Josef, a Meri, bo ko Jisos, mmon abo, song yange a ne go etahk Esowo re bo song lim-e ana ntahm bungu no,

²⁸ owo Simeon kehm taare mmon, fili go ebo, fere jo tehk Esowo re,

²⁹ “Ntul, woblim enyam eba,
anv, nong, nlokeltum ewa kehm yake njini nyia
abo, song go eyebatahng,

† 2:21 2:21 Luk 1:31 ‡ 2:24 2:24 Gal 4:4 § 2:25 2:25 Mak 15:43

³⁰ tibre amahr enyame ebnyehn eltahre ena,

³¹ ni a ma toobo bum go esamahr ane kpee.

³² Eltare nia li ellennge ni bahke wahnge ane
baka baka nyehn mbang enya,
ni bahke jolo ellub ni Israel, ane eba.”

³³ Eji nde, a nnyehn wuku ana Simeon bungu
bada mmon noo,
kehm kpoko bo esi.

³⁴ Simeon kehm biri elfuulu ni Esowo tv bo,
kehm tongo Meri nnyehn re, “Mmon noa, Esowo
bi m-e yehke. Ye wo bahke limi ane gbalee go
Israel gbo, fere lim ane gbalee mehl yiimi.* Ye wo
li elliingi ni Esowo ma tib, ni ane bahke jo bung
ebi bade,†

³⁵ eji ntir atahng nyi ane gbalee l'jol gbuul.‡
Wofono antahng eltim ena bahke jolo, are bo
jahm-a ekahngkahng.”

³⁶ Nnenkal awohng tob jolo o, no bo jo lung-e
re Ana. Á jolo nnyehnamahr. Nde, bo jo lung-
e re Fanuel ji lohng go et'tohngo ji Aser. Ana
sahb k'kul. Eji nlum ewe ko-e no, á ji elbal nnya
esehma,

³⁷ nlum ewe kehm-e kpoko sa, á fere jol nkale-
bun. Ngare nyia a, yebkang nnya atahl ani a nnya
ani. Á joom tiki lohng go etahk Esowo, á jo kake
Esowo, jo bade elne njal, fere jo kak ero atv a njul.

³⁸ Á kehm soro ba ngare ny'nehm o, ba kehme
Esowo tehk, fere jo bung tong ane bao bada
mmon noo, bao ba ji, jo sik elforo ni Jeusalem
bahke foro.

* **2:34 2:34** 2 Kor 2:15-16; Luk 23:39-43 † **2:34 2:34** Jon 7:12

‡ **2:35 2:35** Hib 4:12-13

Ana bo feere kehng go Nasaret

³⁹ Eji bo ma lim ejum ajehng ajehng mal ana ntahm nyi Jehova bungu no, owo bo kehm feere kehng go Nasaret, ejahbe ebo ji li go Galili.

⁴⁰ Mmon noo kehm gbale, fere tahne. Á gbale go elkahne. Elfuulu ni Esowo jolo a ne.

Ana Jisos jolo go etahk Esowo ngare nyi á jolo mmonse

⁴¹ Elya anehng anehng nde Jisos, a nnyehn jo je elkak Pasova go Jeusalem.

⁴² Eji Jisos ma kang ewubu a nnya ebal, bo kehm kpe je go Jeusalem ana bo jo kono eljeke elkak nio.

⁴³ Eji afung elkak nio ma mal, owo bo kehm feere kehng. Jisos sa go Jeusalem. Nde, a nnyehn kahnem.

⁴⁴ Bo jo tiri re, Jisos wob go ellong ane ba kp'kehng. Eji bo ma jen efung kohro kohro, owo bo kehm-e kehme elsebe go ellong abonanyehn ebo, a atem ebo.

⁴⁵ Eji bo ki-e nyehn, bo kehm feere go Jeusalem, song seb-e gona.

⁴⁶ Eji ma kang nfung era, owo bo kehm song nyehn-e go etahk Esowo, á jehk no a at'tibi kp'wuungu atung, fere jo bahb bo abahbe.

⁴⁷ Ane kpee ba wuk-e no, kehm jo kpo bo esi tib go ege elkahne, a afaange nya á jo faange bo.

⁴⁸ Nde, a nnyehn, kpo bo esi sehng, eji bo nyehn-e no. Owo nnyehn kehm-e tongo re, "Mmon ewame, jen ji wahng a kehm limi ejum ana jia? Nso, a me, e ma-a seb na seb seb seb."

⁴⁹ Owo á kehm faange bo re, “Jen ji wahnge á jo seb-m? Á nehme kahn re, m bahke tiki lim eltum ni Nsooa?”§

⁵⁰ Bo kahnem es'si ejum ji á jo b'bung tong bo.

⁵¹ Owo Jisos kehm tahme toono bo, bo feere kehng go Nasaret, á song woomo bo go elwo. Nnyehn kuuru nsol nyio kpee go ege eltim.

⁵² Jisos kehm gbale go elkahne, fere gbal agbal nya ngubjing. Elgoro ni á jo kor Esowo, fere jo kor ane jo kpe gbal na.

3

*Ana Jon ji nwohngalahb jo bung alum Esowo
(Mat 3:1-12; Mak 1:1-8; Jon 1:19-28)*

¹ Eji ma kang nnya elku nyi Taibirius jolo ntul a Rom, ngare nyio nyi Pontus Paillet jolo ntubesi ejahbe go Judea, Herod jo fili Galili, Filip mmonannnyehn jo fili Iturea, fere jo fili Trakonitis, Lisantias jo fili Abilene.

² Annas abola Kayafas jolo atubesi abalimajom.

Ngare nyio nyi ellum Esowo song kpiri Jon ji jolo mmon a Sekaraya go elka emahng.

³ Jon kehm tahme, jo yanng go ajahbe nya li kohlo Jodan, jo bung alum Esowo re, “Yaangen mbang enyahne, wahn bel ewohngalahb, Esowo bahke tahme ka-n go egahne abiafem.”

⁴ Ana nnyehnamahr Aisaya nyono kak go nwer re,

“Nne noa, kp'rabe go elka emahng re,

‘Tuungen mbang nyi Ntul bum-e!

Limen mbang t'tor nyi á bahke sehng.

§ 2:49 2:49 Jon 2:3-4; Mak 3:31-35

⁵ Bo bahke kake ndi go edamme ajehng ajehng,
fere jol bale bale,
fere rene ewong ajehng ajehng gooro, fere jol
bale bale.*

Ejum ji l'galle, bo bahke limi, fere tor.

Abang nya li akpuku akpuku, bo bahke fere
gooro, jol gele gele.

⁶ Nne awohng awohng bahke nyehne eltahre ni
Esowo.' "

⁷ Ellong ane gbalee jo l'lohng, je goji Jon re á
wohngo bo alahb. Jon kehm bungu tong bo re,
"Wahn enyo bia," nne awo tong-n re m bahke foro
go erakatahng ji Esowo ji kp'bake?

⁸ Jo limen eljini ni bahke jo tib re, wahn
ebyaange mbang enyahne. Kana bom elbungu
atemtem re, 'Ebrahim wo li nso ejahre.' Tibre n
kp-n tongo re, Esowo bahke ma ko atal nyaa, lim
abon ka Ebrahim.†

⁹ "Bobtoobo elfuk bum, ni bo bahke kiimi alohk
nti. Eti ajehng ajehng ji tohko kab akab nya nno,
bo bahke gbahke tub, rod kak agun."

¹⁰ Owo ane bao kehm-e bahbe re, "Anv, ejum aji
e bahke limi me?"

¹¹ Á kehm faange bo re, "Nne no l'bel nsubu
ebal, nong, á yehke anyehng, ka nne no ki kpi.
Nne no l'bel nsol alehke, nong, á tob lim ano."

¹² Abakokatak kehm tob ba re bo ba bel ewohn-
galahb. Owo bo kehm-e bahbe re, "Nt'tibi, ejum
aji e bahke limi?"

¹³ Jon kehm faange bo re, "Kana kpe jo ko
akpohko etak sehng ana bo tong-n re wahn jo
ko."

* 3:5 3:5 Mat 23:12 † 3:8 3:8 Jon 8:33,39

¹⁴ Egom nsoja nyindiki kehm-e tob bahb re, “Wahr bahke limi renan?”

Á kehm faange bo re, “Kana jo lim nne awohng awohng ejum go eko! Kana jo ka nne ebi mbol mbol! Nong, ana bo kp-n kpiki jo gbal-n.”

¹⁵ Owo ane kehm kehme ekpu kunu, fere jo tir go bo a ntim bada Jon re, fundiki ye Mesaya wo.‡

¹⁶ Owo Jon kehm bungu tong bo ane kpee re, “N kp-n wohngo alahb maka maka. Nne no kp'bake gbale sehng me. Jol me n tohkem f'fuumu re me n fanng alehke akpaketa enye. Ye wo bahk-n wohngo alahb go Etingi Etohko, a agun.

¹⁷ Á fili ed'da go ebo, kp'febe arasi enye. Á bahke kpuku arasi enye, song kak go ege ekp'kpa, fere jahm awal go agun nya l'k'tiki lahme elahme-lahme.”

¹⁸ Nsol nyehko kpe jol tvv, nyi Jon kpe jo rehke bo, eji á jo tiingi ane bao nnoobo etib.

¹⁹ Á tob ka ntul a Herod ebi, tib eji á taare Herodias, nkal a Filip mmonannyehn, kpe lim abi nsol nyako budu.§

²⁰ Herod kpe lim ebi jehko kpele, eji á bobo Jon kak ngbekobo.

Ana Jisos bele ewohngalahb

(Mat 3:13-17; Mak 1:9-11)

²¹ Eji ane bao kpee ma bel ewohngalahb, Jisos kehm tob bel ewohngalahb. Eji á jo kak ero, ejahbetul kehm lennge.

²² Etingi Etohko kehm badde go elfoongo ni ebbehl, ba jol a ne. Bo kehm wuku ellum go

‡ 3:15 3:15 Jon 1:19-28 § 3:19 3:19 Mak 6:17-18

ejahbetul Esowo re, “Wo wo li akor-m mmon ewame, no kpo kor-m s'sehng.”*

*Nwer nyi et'tohngo ji Jisos lohngo no
(Mat 1:1-17)*

²³ Ngare nyio Jisos ebkang ejum eltahl a nnya ewubu. Ane jo tiri re, á jolo mmon a Josef,[†] ji jolo mmon a Heli.

²⁴ Heli jolo mmon a Matat. Matat jol mmon a Livai. Livai jol mmon a Melki. Melki jol mmon a Jannai. Jannai jol mmon a Josef.

²⁵ Josef jol mmon a Matatias. Matatias jol mmon no Amos. Amos jol mmon a Nahum. Nahum jol mmon no Esli. Esli jol mmon a Naggai.

²⁶ Naggai jol mmon a Maat. Maat jol mmon a Matatias. Matatias jol mmon a Semein. Semein jol mmon a Josek. Josek jol mmon a Joda.

²⁷ Joda jol mmon a Joanan. Joanan jol mmon a Resa. Resa jol mmon a Serubabel. Serubabel jol mmon a Sealtiel. Sealtiel jol mmon a Neri.

²⁸ Neri jol mmon a Melki. Melki jol mmon no Addi. Addi jol mmon a Kosam. Kosam jol mmon no Elmadam. Elmadam jol mmon no Er.

²⁹ Er jol mmon a Josua. Josua jol mmon no Eliesa. Eliesa jol mmon a Jorim. Jorim jol mmon a Matat. Matat jol mmon a Livai.

³⁰ Livai jol mmon a Simeon. Simeon jol mmon a Juda. Juda jol mmon a Josef. Josef jol mmon a Jonam. Jonam jol mmon no Eliakim.

³¹ Eliakim jol mmon a Melea. Melea jol mmon a Menna. Menna jol mmon a Matata. Matata jol mmon a Natan. Natan jol mmon a Devid.

* **3:22 3:22** Luk 9:35 † **3:23 3:23** Luk 4:22

³² Devid jol mmon a Jesi. Jesi jol mmon Obed. Obed jol mmon a Boas. Boas jol mmon a Sela. Sela jol mmon a Nason.

³³ Nason jol mmon no Aminadab. Aminadab jol mmon no Admin. Admin jol mmon no Arni. Arni jol mmon a Hesron. Hesron jol mmon a Peres. Peres jol mmon a Juda.

³⁴ Juda jol mmon a Jakob. Jakob jol mmon no Aisik. Aisik jol mmon no Ebrahim. Ebrahim jol mmon a Tera. Tera jol mmon a Nahor.

³⁵ Nahor jol mmon a Serug. Serug jol mmon a Reu. Reu jol mmon a Peleg. Peleg jol mmon no Eber. Eber jol mmon a Sela.

³⁶ Sela jol mmon a Kainan. Kainan jol mmon Arfasad. Arfasad jol mmon a Sem. Sem jol mmon a Noa. Noa jol mmon a Lamek.

³⁷ Lamek jol mmon a Metusala. Metusala jol mmon no Enohk. Enohk jol mmon a Jared. Jared jol mmon no Mahalalel. Mahalalel jol mmon a Kainan.

³⁸ Kainan jol mmon no Enos. Enos jol mmon a Set. Set jol mmon no Adam. Adam jol mmon Esowo.

4

Ana nnehm gare jisos

(Mat 4:1-11; Mak 1:12-13)

¹ Eji jisos lohngo go Jodan, jo kehnge, Etingi Etohko rur-e go ege atahng. Etingi Etohko kehm-e rodo tahm a ne go elka emahng.

² Owo nnehm gar-e no nfung atahl abal. Afung nyao kpee á tikem li ejumjum. Eji afung nyao ma biingi, njal kehm-e yame.

³ Owo nnehm kehm-e tongo re, “A l'jol Mmon Esowo, tong eltal nia siingi ebred.”

⁴ Jisos kehm-e faange re, “Nwer Esowo bungu re, ‘Abred nya nya sang wahnge nne kpo kpin. Á kpo tob bel elkpin go ellum Esowo anehng.’ ”*

⁵ Nnehm kehm-e rodo tahm a ne go nwahre-wahre ewong, ko mmongare ana no nne bahke jehbe akpakamahr, tib-e ajahbe nya li go njini kpee,

⁶ kehm-e tongo re, “M bahk-a kake nsahm kpee nyi a bahke jo fili ajahbe nyao, fere ka-a ellub ebo. Tibre bobyake kpee kak-m go ebo, m bahke fere faake ka nne no kor-m no.

⁷ A l'soro j'jamme alahng kak-m, nsol nyia kpee bahke fere jol ny'nya.”

⁸ Owo Jisos kehm-e faange re, “Nwer Esowo bungu re, ‘Kak Esowo Ntul ewa. Ye ntahngtahng wo a bahk-e loko.’ ”†

⁹ Nnehm kehm-e koko tahm a ne go Jeusalem, song rod-e kunu go elkong etahk Esowo, kehm-e tongo re, “A l'fere jol Mmon Esowo, yehb gbo ndi.

¹⁰ Tibre nwer Esowo bungu re, ‘Esowo bahke tongo enjel enye, bo baab-a.’

¹¹ Edi nwer Esowo jehko kpe bung re, ‘Bo bahk-a gbiiri go bo abo, eji a l'k'ba jahre akpade go eltal.’ ”

¹² Owo Jisos kehm-e faange re, “Nwer Esowo bungu re, ‘Ka gare Esowo Ntul ewa.’ ”‡

¹³ Eji nnehm m-e gare mal, á kehm-e tohko yake mmongare ntiil.

* 4:4 4:4 Jon 6:26-27 † 4:8 4:8 Jon 6:14-15 ‡ 4:12 4:12 Mat 12:39

Ana Jisos bomo eltibi go Galili

(Mat 4:12-17; Mak 1:14-15)

¹⁴ Jisos kehm feere a nsahm Etingi Etohko, ba rehng go Galili. Owo elgahm ene kehm yeere ejang ejahbe jio kpee.

¹⁵ Á jo tibi go bo a ntahk ero. Ane kpee jo tehk-e tehk.

Ana bo tene Jisos go Nasaret

(Mat 13:53-58; Mak 6:1-6)

¹⁶ Jisos kehm jeke go Nasaret, edi ji bo le-e no, á gbal. Efung Esabat á kehm jeke go etahk ero ana á jo kono ellimi. Á kehm mehle yiimi re á lung edi nwer Esowo.

¹⁷ Bo kehm-e kake nwer nyi nnyehnamahr Aisaya. Eji á ma lennge nwer nyio, á kehm song nyehn edi ji bo nyono re,

¹⁸ “Etohko ji Jehova jia, kun-m.

Á ma-m tum re me n song tiingi etib bi bahke wahnge aneb agbekobo for, awakamahr nyehn.

Á ma-m tum re me n song tahre ane ba kp'nyehne erem yehke bo go afemfem nya bo wob no,

¹⁹ fere tong ane re,

Elya eyebatahng ni Jehova ebrehng.”

²⁰ Eji á ma bulu nwer nyio, á kehm feere a nyi ka nlokeltum, kehm jehke. Ane kpee ba woomo go ekp'kpa ero jio jo seeng-e na seenge too.

²¹ Owo á kehm kehme elbungu a bo re, “Edi nwer Esowo jia ebjol go etingitingi lela, eji m ma wuk.”

²² Owo ane kpee kehm-e kehme elteheke. Anoobo alum nya lohng-e go nnyo jo kpo bo esi

sehng. Bo kehm bahbe re, “Anv, mmon a Josef sang aa?”§

²³ Á kehm tongo bo re, “Etingitingi, m bahk-m tubu elgan nia re, ‘Nlimakahm, lim elna, wo nob me!’ Fere bung re, ‘Nsol nyi e ma wuk re, woblim go Kapenium, tob lim a fvfo go ega ejahbe!’ ”*

²⁴ Owo Jisos kehm kpe bung re, “Etingitingi, n kp-n tongo re, Nnyehnamahr awohng awohng limm, no bo kpo ko-e go ege ejahbe.”†

²⁵ Etingitingi, n kp-n tongo re, Akalebun jolo gbalee go Israel ngare nyi Elaija, eji elahb ki kpe na go nnya era kunu ejang, owo egburu njal kehm bake go ndi nyio kpee.

²⁶ Jol Esowo tumem Elaija tv nkalebun awohng awohng gona, sehngem nkalebun awohng no jolo go Sarefat ji Saidon wo, Esowo tumu Elaija tv-e.

²⁷ “Aneb abili gbalee ba jolo go Israel ngare nyi nnyehnamahr Elisa. Bo, nne awohng awohng nobem abili enye, sehngem Neman ji jolo nne a Siria wo wo nobo.”‡

²⁸ Eji ane ba woomo ekp'kpa ero jio wuku ano, atahng kehm rake bo tete.

²⁹ Bo kehm-e tohngo yehke go ejahbe jio, song rehng a ne go nkpe ewong nyi bo si ejahbe jio kunu re bo gbul-e, á fooro go egbunggbung ewong ba gbo.

³⁰ Á fere jene na, ba sehng go elka ane tahm eje.

*Nne no bele ebi etohko go ege atahng
(Mak 1:21-28)*

§ 4:22 4:22 Jon 6:42 * 4:23 4:23 Mat 4:13 † 4:24 4:24 Jon 4:44

‡ 4:27 4:27 Mat 12:21; Rom 9:30-31

³¹ Owo Jisos kehm tahme, song rehng go Kape-nium ji li go Galili, song kehme ane tib efung Esabat.

³² Jo kpo bo esi tib go ege eltibi ni á jo tib bo. Tibre alum nya á jo bung, á jo bungu ana nne no kpi nsahm.§

³³ Nne jolo o ekp'kpa ero jio, no bele esabsab etohko go ege atahng. Á kehm rabe tiim re,

³⁴ “Yak-m! E li go nfem anyi awahr a na, Jisos ji Nasaret? A ba re wo ba ranng-ra? N kp'kahne nne no a li no. A li mbarebara nne Esowo!”

³⁵ Owo Jisos kehm-e nyame re, “Behl ewok, wo lohng-e song!” Ebi etohko jio kehm yehke nne noo tub ndi go elka ane bao, soro lohng-e. Ejumjum we á limem.

³⁶ Kehm kehme nne awohng awohng esi kpo, bo kehm kehme elbundu atemtem re, “Anv, elkohn alum anya a, nya á kpo bung go nsahm, tong asabsab atohko, bo jo lohng?”

³⁷ Owo elgahm ni Jisos kehm yeere, rehng ejahbe ajehng ajehng ji jolo ejang bio.

*Ana Jisos limi ane tvv, bo nob ayam ebo
(Mat 8:14-17; Mak 1:29-34)*

³⁸ Jisos kehm lohngo ekp'kpa ero jio, song rehng go etahk Saimon. Nnyehn nkal a Saimon, arumbum nyed-e sehng. Bo kehm-e gboongo ka-e.

³⁹ Á kehm tahme song yiimi go ege a nkpe edilnong, kehm nyame arumbum nyao, nnenkal noo soro nob, kehm mehle tvtv, soro kehme bo loko.

§ 4:32 4:32 Mat 7:28; Jon 7:46

⁴⁰ Eji njul yahke ba ellahme, ane kpee ba bele aneb ayam, ba jo yam ajoobo ayam tvv, kehm koko bo, ba goji Jisos. Á kehm kunu bo abo, go nne awohng awohng, bo nob ane kpee.

⁴¹ Abi atohko tob lohngo ane gbalee, jo biingi tiim, fere jo bung re, “Wo wo li Mmon no Esowo!”*

Jisos jo nyame bo. Á joom taame re bo bung. Tibre bo jo kahne kpee re á li Mesaya.†

*Ana Jisos bungu alum Esowo go Galili
(Mak 1:35-39)*

⁴² Efungfu behre behre Jisos kehm tahme ejahbe jio, song rehng go edi ji li soom.

Ane kehm-e kehme elsebe. Eji bo nyehn-e no, bo kehm jo nok mbang anyehng anyehng, eji á l'k'tahm bo sa.

⁴³ Owo á kehm tongo bo re, “M bahke tob tiingi nnoobo etib bi etul bi Esowo tong ajahbe nyako fvfo. Tibre ana wo wahnge Esowo tum-m no.”

⁴⁴ Owo á kehm tahme, jo song bung alum Esowo go ntahk ero nyi jolo go Judea.

5

*Ana Jisos lungu agbokombang abat'toono ebe
(Mat 4:18-22; Mak 1:16-20)*

¹ Efung abehng eji Jisos yiimi go nkpe eto nyi Genesaret, ane kehm ba rur, jo fahd-e tv re bo wuk alum Esowo.

² Owo á kehm nyehne agbang na abal go elga. Abasahre nsahre eblohng go agbang nyao, song kehme arim ebo faare.

* **4:41 4:41** Jems 2:19 † **4:41 4:41** Mat 8:29; Mak 3:11-12

³ Á kehm song yel egbang abehng bi jolo bi Saimon, kehm-e tongo re, á reenge egbang feere go elka alahb. Owo á kehm jehke go egbang, jo tib ane bao.

⁴ Eji á ma bung mal, owo á kehm tongo Saimon re, “Reenge egbang, song rehng edi ji kp'rahbe, wahn yake arim enyahne kak o, bob nsahre.”*

⁵ Owo Saimon kehm-e faange re, “Nsoo, wahr eblim eltum atv atv maa ana tete, jol ejumjum e tikem bob. Wo, eji a ma bung ano, m bahke yake erim ebame kak.”†

⁶ Eji bo ma lim ano, bo kehm bobo nsahre gbalee, erim kehm kehme elyare.

⁷ Owo bo kehm soro kehme atem ba woomo go egbang behko mahk re bo ba tob bo. Bo kehm bake, ba yehke nsahre nyio, ruru agbang abal abal, fere jol are agbang yahke ter.

⁸ Eji Saimon Pita nyehne ano, á kehm gboko jamme Jisos alahng, kehm buntu re, “Ntul, jeere song, tibre me nne abiafem wo.”‡

⁹ Tibre nkpokosi nyio jo kpo-e esi sehng, a ane bako kpee ba tob jolo a ne o, tib go elkohn nsahre nyi bo bobo no.

¹⁰ Ano wo fvfo, Jems a Jon ba jolo abon Sibidi, bo ji jo lim eltum ano a Pita, jo tob kpo bo esi.

Owo Jisos kehm tongo Saimon re, “Ka kpe fahl! Bomo anv asongo, a bahke fere jo bim ane.”§

¹¹ Eji bo ma tohng agbang ebo kunu egbuk, bo kehm tahme ejum ajehng ajehng sa, tahm toono Jisos.

* 5:4 5:4 Jon 21:6 † 5:5 5:5 Hib 11:1 ‡ 5:8 5:8 Mat 8:8-10

§ 5:10 5:10 Mat 13:47; Mak 16:15-16

*Ana Jisos limi nne abili, á nob**(Mat 8:1-4; Mak 1:40-45)*

¹² Efung abehng eji Jisos jolo ejahbe ajehng, nne jolo ona, no abili saab-e na saabe go ngubjing. Á nyehne kan Jisos, á kehm gboko, kohk esamahr ebe go ndi, fere jo gboong-e re, “Ntul, l'fere kor-a, a li-m ma lim, n nob.”

¹³ Jisos kehm soro tanne ebo ebe, koor-e, kehm bungu re, “Kor-m kor.* Wobnob!” Tvtv o á kehm soro nob abili nyao.

¹⁴ Owo Jisos kehm-e rehke re, á k'tong nne ne, fere tong-e re, “Song, wo song kpiri nlimajom, fere tib-e elna, fere lim njom ana Moses tongo no, tib eji a ma nob, eji l'jol ejum ntianse ka bo.”

¹⁵ Tvtv o elgahm ni Jisos kpe yeere na budu. Nlong ane gbalee kehm jo kam, jo ba re bo jo wuk-e, fere jo nob ayam ebo.

¹⁶ Jisos jo tahme, song rehng edi ji li soom, song kak ero.

*Ana Jisos limi mbanne, á nob**(Mat 9:1-8; Mak 2:1-12)*

¹⁷ Efung abehng eji Jisos jo tib, Bab Farisi, a at'tibi ba atahm tob ji ona, ba lohngo go ejahbe ajehng ajehng ji li go Galili, a Judea, fere tob lohng go Jeusalem ba. Nsahm nyi Esowo jolo a Jisos ona re á ko lim ane, bo nob ayam ebo.

¹⁸ Ane kehm koko mbanne ba a ne, nyi bo sol-e go edilnong. Bo jo gare re bo yel a ne go ekp'kpa, song bum-e go alata Jisos.

¹⁹ Bo tingem mbang anyehng anyehng nyi bo bahke sehng a ne tib ellong ane bao. Owo

* 5:13 5:13 1 Tim 2:4

bo kehm wahre a ne go ero etahk, kehm song lahm elbulu, kehm tahre alehke nya bo kanne go edilnong jio tete ba rehng go elka ane bao, edi ji Jisos jolo no.

²⁰ Eji Jisos nyehne ana bo ma taame tv-e, owo á kehm bungu re, “Mbi, abiafem enya, me n tahm ka-a.”

²¹ At'tibi ba atahm, a Bab Farisi kehm kehme elbungu atemtem re, “Anv, ye elkohn nne awo, no kp'bungu ab'bi alum ana nyaa tob Esowo? Nne awo bahke ma tahm ka nne go ege abiafem? Esowo ntahngtahng bi bahke ma tahm ka nne go ege abiafem!”

²² Eji Jisos ma seb kahn ana bo jo tir, owo á kehm faange bo re, “Elkohn ntir anyi n kp'tiri go egahna ntim?”

²³ Jen ji ga riidi, n l'tong nne noa re, ‘Abiafem enya me n tahm ka-a,’ afi n l'tong-e re, ‘Mehl yiimi, wo jen?’†

²⁴ M bahk-n tibi re, Mmon no nne kpi nsahm go njini nyia, nyi á bahke ma tahm ka nne go ege abiafem.” Owo á kehm tongo mbanne nyio re, “N kp-a tongo re, wo tahm, rod edilnong eja, song kehngel!”

²⁵ Tvtv o nne noo kehm soro mehl yiimi go esamahr ane bao, rod edilnong ji á noongo no, tahm eje kehngel, jo tehk Esowo asongo.

²⁶ Ane bao kpee kpo bo esi area. Bo kehm kehme Esowo tehk afahlafahle, fere jo bung re, “Wahr ebnyehn akpokosi nsol lela.”

† 5:23 5:23 Jon 10:38

Ana Jisos lungu Livai
(*Mat 9:9-13; Mak 2:13-17*)

²⁷ Eji ma jol ano, Jisos kehm tahme, song nyehn nkokatak no bo jo lung-e re Livai jehk go ekp'kpa etak. Á kehm-e tongo re, “Tahm toon-m!”

²⁸ Livai kehm tahme ejum ajehng ajehng sa, tahm toon-e.

²⁹ Owo Livai kehm limi egburu elkak go ege etahk ka Jisos. Abakokatak gbalee tob jolo o, a ane bako fvfo, jo li nsol abo.‡

³⁰ Bab Farisi, a at'tibi ba atahm ba woomo go ellong Farisis kehm kehme elmemme tob abat'toono Jisos re, “Jen ji wahnge n kpo li nsol alehke a abakokatak, go aneb ab'bi?”

³¹ Owo Jisos kehm faange bo re, “Ane ba li nob nob kpehme seb nlimakahm, sehngem ane ba kp'yame ba kp'sebe.

³² M baam re me m ba lung anoobo ane, bo gbo ndon. M ba re me m ba lung abi ane.”§

Bada njal abade
(*Mat 9:14-15; Mak 2:18-20*)

³³ Egom ane bandiki kehm ba bahb Jisos re, “Jen ji wahnge abat'toono Jon, a ba Farisis kpo bade elbo njal nkpel a nkpele, fere jo kak ero, abat'toono eba kpo li na nsol, fere jo w'wo?”

³⁴ Owo Jisos kehm faange bo re, “M bahke limi renan, kehm tongo ane ba bo ma tiingi bo elkak elbal re bo ji njal ngare nyi nlumanne kpeke li a bo?

‡ 5:29 5:29 Luk 15:1-2 § 5:32 5:32 Rom 3:9-10

³⁵ Ngare kp'bake nyi bo bahke yehke nlumanne go bo ellong tahm a ne. Ngare nyio nyi bo bahke kehme elbo njal bade.*

Eltibi ni mahne mahne l'li, eltibi ni Jisos l'li
(Mat 9:16-17; Mak 2:21-22)

³⁶ Jisos kehm kpe tub bo elgan re, "Nnene limm, no bahke koko mmojang mbomo no nfenfe, song baade nk'kula mbomo. Á l'lim ano, edi ji bo ko mmojang mbomo no nfenfe baade, bahke kpe kv na budu. Ejang mbomo nfenfe nehm fuumu a nk'kula mbomo.†

³⁷ "Nnene limm fvfo, no bahke yaange amahm ma kp'fahle kak go nk'kohko eyahbe. Á l'lim ano, amahm mao ma kp'fahle bahke limi eyahbe jio bahnge, amahm sale, eyahbe ranng kpee.‡

³⁸ Amahm ma kp'fahle, bo bahke jo kak go eyahbe nfenfe.

³⁹ Nnene limm, no kpo wo ak'kulu amahm, amahm ma kp'fahle kehm-e kpe kor. Á bahke bungu re, 'Ak'kulu amahm ma ga nob.' "§

6

Bade efung Esabat
(Mat 12:1-8; Mak 2:23-28)

¹ Efung Esabat abehng eji Jisos jo jen go emahng ji bo bahme nkohl, owo abat'toono ebe kehm jo laade nkohl, fere monngo amohk tv go arahn, jo li.

* 5:35 5:35 Elt 13:2-3; 14:23; 1 Kor 7:5 † 5:36 5:36 2 Kor 5:17

‡ 5:37 5:37 Hib 8:13 § 5:39 5:39 Jon 9:28-29

² Owo egom Farisi jindiki kehm bahbe bo re, “Jen ji wahnge á kp'limi ejum ji ntahm enyahre sahde re, nne k'jo lim efung Esabat?”

³ Jisos kehm faange re, “N ka tiki lung bade ana Devid limi no ngare nyi njal yam-e no, a ane ebea?”

⁴ Á yele eksp'kpa Esowo, song rod abred nya bo limi bum go esamahr Esowo li, fere tob ka ane ebe ba jolo a ne, bo li, nya ki fuumu re nne awohng awohng li, sehngem abalimajom ba ba jo li.”

⁵ Owo Jisos kehm kpe tong bo re, “Mmon no nne tob li nfono Esabat.”

*Nne no ebo ebe lohngo no
(Mat 12:9-14; Mak 3:1-6)*

⁶ Efung Esabat bi Jisos kpe je go etahk ero song tib, nne awohng jolo o, no eboblum ebe lohngo no.

⁷ At'tibi ba atahm, a Bab Farisi, bo jo baab-e,* joare á bahke limi nne awohng awohng, á nob efung Esabat.

⁸ Jisos k'kahn ntir atahng ebo, owo á kehm tongo nne no ebo ebe lohngo no re, “Ba, wo ba yiimi ana!”

Nne noo kehm mehle yiimi, jen song yiimi ona.

⁹ Owo Jisos kehm tongo bo re, “N kp-n bahbe re, Anv, ntahm enyahre bungu re wahr jo lim jen efung Esabat, wahr jo kak na nne ebo, afi wahr jo ranng na? Wahr jo tahre elkpín nne, afi wahr jo ranng elkpín nne?”

* 6:7 6:7 Luk 14:1

¹⁰ Eji á ma seenge bo, song jahm, owo á kehm tongo nne noo re, “Tanne ebo eba!” Á kehm limi ano. Ebo ebe kehm feere jol ana behko jang jang.

¹¹ Atahng kehm rake bo tete, bo kehm kehme eltoobo bo bo, ji bo bahke limi Jisos.

Ana Jisos yehke abat'toono ebe, ewubu ane abal (Mat 10:1-4; Mak 3:13-19)

¹² Ngare nyio Jisos kehm tahme go ewong re á song kak ero. Owo á kange no, jo kak ero ka Esowo.

¹³ Eji efungfu ma se, á kehm lungu abat'toono ebe tv elne, kehm jake ewubu ane abal, ba á jo lung bo re abatiingetib.

¹⁴ A wo li ewubu ane abal ba á yehke no. Saimon ji Jisos ka-e mbing nyehko re Pita, a Andru mmonannyehn Pita, go Jems, Jon, Filip, Batolomi,

¹⁵ Matiu, Tomos, Jems ji mmon a Alfeus, a Saimon ji jo seb re ejahbe eje lohng go elwo ni aneb Rom,

¹⁶ go Judas ji mmon a Jems, a Judas Iskariot ji gungu Jisos.†

Ana Jisos jo tib, fere lim ane, bo nob ayam ebo (Mat 4:23-25)

¹⁷ Eji Jisos jo badde a bo go ewong, á kehm ba yiimi edi ji li bale bale, a ellong abat'toono ebe gbalee, a ellong ane tvv, ba lohngo go Judea kpee, fere lohng go Jeusalem, a ba lohng go nkpe agburu aya, ejang bi Taya, a Saidon. Bo ba re bo ba wuk-e, fere nob ayam ebo.

† 6:16 6:16 Jon 6:64,70; Elt 1:13

18 Ane ba asabsab atohko jo gbiingi bo, bo nobo ane kpee.

19 Ellong ane bao kpee jo sebe re, bo koor-e, tibre nsahm jo lohng-e lohng.‡ Á fere lim bo, bo nob ane kpee.

Eyebatahng, a ndon

(Mat 5:1-12)

20 Owo Jisos kehm tabe esamahr ebe seenge abat'toono ebe, kehm bungu re,

“Elfuulu li ka wahn akpak, tibre etul bi Esowo b'bahne bi.§

21 “Elfuulu li ka wahn ji njal kp-n yame anv, tibre m bahke wohngo.”*

“Elfuulu li ka wahn ji kp'lingi anv, tibre m bahke wolo asol.†

22 “Elfuulu li ka wahn, ane l'ko-n ekv tib go esi ji Mmon no nne, fere yab a nahne, jo su-n, fere jo bung re, wahn abi ane ba.‡

23 “Jo belen eyebatahng, nsol ana nyio l'lim, wahn fere jo siiki. Tibre egburu eltuuru enahne nia, nong-n go ejahbetul Esowo.§ Tibre nsol ny'nehm ona nyi babnde ebo jo lim abanyehnamahr Esowo.

24 “Eyu a nahne, wahn afang ane, tibre wahn ebbel ejum ekakeltim ejahne.*

25 “Eyu a nahne, wahn ji kp'wohngo anv, tibre m bahke jene njal njal.

‡ 6:19 6:19 Mak 3:10; 5:27-28 § 6:20 6:20 Mat 19:27-28 * 6:21 6:21 Jon 6:35 † 6:21 6:21 Ell 7:16-17 ‡ 6:22 6:22 1 Pit 4:14-16 § 6:23 6:23 2 Pit 3:13 * 6:24 6:24 Jems 5:1-3

“Eyuu a nahne, wahn ji kp'wolo anv, tibre ń bahke jehke ndon ndon, fere jo ling.

²⁶ “Eyuu a nahne, ane kpee l'jo tehk-n.† Tibre ano wo babnde ebo tob jo tehk akimfahnge abanyehnamahr.”

Ana nnekv ewa bahke jo kor-a

(Mat 5:38-48)

²⁷ “N kp-n tongo wahn ji kp'wuungu atung re, Anebekv ebahne jo kor-n. Jo limen nnoobo ka ane ba kpo ko-n ekv.‡

²⁸ Jo biren nnoobo tv ane ba kpo su-n. Jo kaken ero ka ane ba kpo lim-n ebi.

²⁹ Nne no l'rum-a elkpai, tob sennge ejang behko ka-e fvfo, á kpe-a rum. Nne no l'taare nsubu enya, á l'kpe ba ewobo eja taare, tob yake ka-e.

³⁰ Jo ka nne awohng awohng ejum, no bahb-a no. Nne no l'taare ejum eja, k-e tong re á feere a ji.”

³¹ “Ejum ajehng ajehng ji ń kp'sebe re ane jo lim ka-n, wahn fvfo, tob jo limen ano ka bo.§

³² Ane ba ń kpo kor bo, bo l'jo kor-n, eltuuru ani Esowo bahk-n tuuru? Tibre ane ba, aneb abiafem kpo kor bo, bo ba fvfo kpo tob kor aneb abiafem.

³³ ń l'jo lim nnoobo ka ane ba kpo lim nnoobo ka-n, eltuuru ani ń bahke bele? Tibre aneb abiafem kpo tob lim ano.

³⁴ ń l'jo bong ane akpohko, ba ń tiri re bo bahke tob bong-n, eltuuru ani ń bahke bele? Tibre aneb

† 6:26 6:26 Jems 4:4 ‡ 6:27 6:27 Rom 12:20 § 6:31 6:31 Mat 7:12

abiafem kpo bong aneb abiafem, eji bo l'tob lim jang jang ka bo."

³⁵ "Nong, anebekv ebahne jo kor-n, wahn jo lim nnoobo. Jo bongen ane akpohko, wahn k'jo kunu ekpu re bo feere a nya ka-n. Ní l'lim ano, eltuuru enahne bahke gbale. Owo m bahke kehm jolo abon ba Esowo bi gbale sehng. Tibre Esowo kpo lim nnoobo ka ane ba kil jo kak saam, fere tob lim nnoobo ka abi ane.

³⁶ "Nong, ane jo fil-n ndon, ana Nso ejahne, ane kpo fil-e ndon."

Kana jo lam ane bako

(Mat 7:1-5)

³⁷ "Kana jo lam ane bako, Esowo wahn nehm tob lam. Kana jo tong ane re, bobli ebi, Esowo wahn nehm tob tong re, wahn ebli ebi. Jo tahmen ka ane, Esowo bahke tob tahm ka-n.*

³⁸ Jo kaan, Esowo bahk-n tob ka. Á bahke gare go eham ji nno a nno, gbehke, fere so, kak, rur w'wohng, fere yaange kak egahne abam. Ana n gare no ka, ano wo fvfo Esowo bahke tob gare ka-n."†

³⁹ Jisos kehm tob tub bo elgan re, "Anv, nwakamahr a nne bahke ma tib nwakamahr nyehko mbanga? Bo ane abal abal nehm song gbo yel go elbinga?‡

⁴⁰ "Nne no kp'kpili kpehme gbal sehng nt'tibi ewe. Nne awohng awohng no l'kpili mal, á bahke jolo ana nt'tibi ewe.§

* **6:37 6:37** Mat 6:14 † **6:38 6:38** Mak 4:24 ‡ **6:39 6:39** Mat 15:14 § **6:40 6:40** Mat 10:24-25; Jon 15:20; Fil 1:29-30

41 “Jen ji wahnge a kp'seenge mmolsahk no wob mmonanne go elmahr, a kil eltiri bada nkporti nyi wob go ega elmahr?

42 A bahke limi renan, kehm tongo mmonanne, re, ‘Nong, me n yehk-a mmolsahk no wob-a go elmahr,’ eji wofono antahng kil nyehne nkporti nyi wob-a go elmahr? Wobnob tane! Tohko gbo mbang yehke nkporti nyi wob go ega elmahr, eji a l'mal nyehn, yehke mmolsahk no wob mmonanne go elmahr.*

Eti, a akab akab enye

(Mat 7:16-20; 12:33-35)

43 “Tibre eti ji nno ajehng ajehng limm, ji kpo kab asabsab akab. Jol fvfo, esabsab eti ajehng ajehng limm, ji kpo kab anoobo akab.

44 Tibre eti ajehng ajehng, bo kpo liing-e go ege akab. Nnene limm, no kpo bong akab efig go asokonso, fere bong akab avain go egab.

45 “Nsol afang nyi wob nnooba nne go ege eltim, nyi nyi á kpo yehke, lohng a nyi. Ab'bi nsol nya wob ebi nne go ege eltim, nya nya á kpo yehke, lohng a nya. Tibre ji ma rur nne go eltim, ji ji kpo lohng-e go nnyo.

Ana ane abal si ntahk

(Mat 7:24-27)

46 “Jen ji wahnge á kpo lung-m re, ‘Ntul, Ntul!’ N kil jo lim nsol nyi n kpo tong-n re wahn lim?

47 “Nne awohng awohng no l'ba go egame, ba wuk alum enyame, fere jo lim,† m bahk-n tibi elkohn nne no á li no.

* 6:42 6:42 1 Kor 9:27 † 6:47 6:47 Jems 1:22-26

48 Á li ana nne no si etahk. Á kpa r'rahbe tete rehng go ekpartal,‡ kehm bumu nnaħb ekahme enye o. Eji nnyel yele no, alahb jo gbul etahk jio, tikem ma gbekke egbehkegbekke, tibre nnaħb ekahme nyio kuumu go ekpartal.

49 “Nne no l'wuk alum enyame, fere ten go ellimi,§ á li ana nne no si na si etahk eje kunu go ndi, k'bum nnaħb ekahme. Eji alahb jo gbul etahk jio, kehm soro gbo kpee r'rere r'rere.”

7

Ana Jisos limi nlokeltum a nne a Rom, á nob (Mat 8:5-13)

1 Eji Jisos ma bung nsol nyia kpee mal, tong ane bao, á kehm tahme go Kapenium.

2 Ntubesi a nsoja awohng jolo o, no bele nlokeltum no jo saħb kor-e kor. Nlokeltum ewe noo jo yame, are á bahke kpoko.

3 Eji ntubesi a nsoja noo wuku bada Jisos, á kehm tumu anebkul Jus bandiki re bo song gboong-e, á ba lim nlokeltum ewe nob.

4 Eji bo ba rehng goji Jisos, bo kehm saħb gboong-e gboongo re, “Ntubesi noo, f'fuumu re wo kak-e ebo.

5 Tibre ejahbe ejahre kpo kor-e sehng. Yebši etahk ero ka-r.”*

6 Owo Jisos kehm tahme toono bo. Eji á ma kabbe etahk jio, ntubesi a nsoja noo kehm tumu ate ebe tv-e.

‡ 6:48 6:48 Elt 17:11 § 6:49 6:49 Jems 2:17 * 7:5 7:5 Elt 10:1-2

Bo kehm-e song tong re, “Ntubesi re, wo k'kpe gbiingi elna mbol mbol, are ye fuumem re wo song yel ege ekp'kpa.

⁷ Jol á fuumem re á ba go ega.† Are, wo lub bung ellum ellum, nlokeltum ewe bahke nobo.

⁸ Ntubesi re, á li nne no wob go elwo nne. Á tob kpi nsoja nyi tob wob-e go elwo. Á l'tong nne noko re, ‘Song!’ Tahm. Á l'tong nne noka re, ‘Ba!’ Á ba. Á l'tong nlokeltum ewe re, ‘Lim ejum jia!’ Á lim na lim.”

⁹ Jisos, esi kehm-e kpoko, eji á wuku ano. Á kehm keebe, kehm bungu tong ellong ane ba jo toon-e re, “N kp-n tongo re, Jol go Israel n ka tiki nyehn nne no kpi elkohn egburu eltaame ana nia.”

¹⁰ Eji ane ba ntubesi a nsoja noo tumu bo feere no, ba rehng ege etahk, bo ba nyehne nlokeltum noo ma lohko nob.‡

Ana Jisos nyahme njangkun anyehng go elkv

¹¹ Etoono efung behko Jisos kehm tahme go ejahbe ji bo jo lung re Nain. Abat'toono ebe gbalee, a ellong ane tvv ba toon-e no je.

¹² Eji á ma kabbe eti mbu ji jolo ejahbe jio, ane ba solo nkve kehm lohngo ejahbe jio abake. Nne no kpo no jolo mmon mmon awohng no nnenkal no jolo nkalebun. Ellong ane gbalee jolo a nnenkal noo o, ba lohngo ejahbe jio.

¹³ Eji Ntul a Jisos nyehn-e no, ndon kehm-e gbale go ege eltim tib nnenkal noo. Owo á kehm-e tongo re, “Ka kpe ling!”

† 7:7 7:7 Luk 5:8 ‡ 7:10 7:10 Jon 4:47-54

¹⁴ Á kehm jeere, song kooro ekpa ji bo gbade nkvne. Aneblum ba sol-e no kehm yiimi. Jisos kehm bungu re, “Njangkun, n kp-a tongo re wo mehl!”[§]

¹⁵ Nne no kpo no kehm soro mehl ji, kehm kehme elbungu. Jisos kehm-e jabbe, kak nnyehn go ebo.

¹⁶ Owo nne awohng awohng kehm kehme elfahle, fere jo tehk Esowo re, “Egburu nnyehnamahr eblohng go egahre ellong.” Bo kpe bung re, “Esowo ebba re á ba tahre ane ebe.”

¹⁷ Eka jia bada Jisos kehm yeere go Judea kpee, a ajahbe nya jolo senng Nain ka.

Ane ba Jon ji nwohngalahb tumu no
(Mat 11:2-19)

¹⁸ Abat'toono Jon kehm song tong-e nsol nyio kpee.

¹⁹ Jon kehm lungu abat'toono ebe na abal, tum bo tv Ntul a Jisos re bo song bahb-e re, “Wo wo li nne no kp'bake, afi wahr ji sik nne nondiki?”

²⁰ Eji bo song kpiri Jisos, bo kehm-e tongo re, “Jon ji nwohngalahb wo ma-r tum tv-a re wahr ba bahb-a re, ‘Wo wo li nne no kp'bake, afi wahr ji sik nne nondiki?’ ”*

²¹ Ngare nyio Jisos limi aneb ayam gbalee, bo nob go ajoobo ayam tvv, fere kam ane abi atohko yehke, tob lim awakamahr gbalee, bo nyehn.

²² Owo Jisos kehm faange ane ba Jon tumu no re, “Songen, wahn song tong Jon nsol nyi m ma nyehn, fere w'wuk. Anv, awakamahr

§ 7:14 7:14 Luk 8:54; Jon 11:43-44 * 7:20 7:20 Mak 1:7-8

kp'nyehne, abanne ebtahm kp'jene, aneb abili kp'nobo, alakatung kp'wuku, akvne kp'nyahme go elkv. Akpak kp'wuku nnoobo etib.

²³ “Elfuulu li ka nne no l'ki-m sel gbo.”

²⁴ Eji ane ba Jon tumu bo ma feere fi, owo Jisos kehm bomo elbunu bada Jon, tong ellong ane bao re, “N̄ jo lohngo je elka emahng re wahn song nyehn jen? Eljele ni nfeb kp'limi, kp'neenga?”

²⁵ Jen ji n̄ jo j'je re wahn song nyehn? Nne no liibi anoobo nsola? Etingitingi, elkohn ane ba kpo liibi ano, fere jo li ebno, bo kpo kono eljolo go ntahk atul.†

²⁶ Anv, ejum aji n̄ jo je re wahn song nyehn? Nnyehnamahra?

“Etingitingi, n kp-n tongo re, wahn ebnyehn nne no gbale sehng nnyehnamahr.

²⁷ Tibre Jon wo li nne no nwer Esowo bungu no bada ne re,

“ ‘M bahke tumu ntingetib ewame re á gbo-a mbang, song tuungu mbang bum-a.’

²⁸ “N kp-n tongo re, Nne awohng awohng limm, no ma j'jol go njini nyia no gbale sehng Jon.‡ Wo, nne no sahb r'rede, no kun etul bi Esowo, á gbale sehng ye.”§

²⁹ “Ane kpee, a abakokatak ba wuk-e no, bo ba taame re, Esowo lohko li go etingitingi, tib eji bo ma bel ewohngalahb ji Jon.

³⁰ “Bab Farisi, a at'tibi ba atahm t'ten ji Esowo toobo re á lim ka bo, eji ki kor bo re bo bel ewohngalahb jio ji Jon.

† 7:25 7:25 Mak 1:6 ‡ 7:28 7:28 Luk 1:15 § 7:28 7:28 Mat 13:17

31 “Anv, m bahke koko ane ba li anv gara jen?
Bo li renan?

32 Bo li ana abonse ba ma lohng song ji go
elatahkgur kpi mbene lim. Egom jindiki tong
egom jehko re,

“ ‘Wahr ebwor afiri ka-n,
m bahnem.

Wahr ebling aling,
wahn tobem ling fvfo.’

33 Eji Jon ji nwohngalahb ba no, á joom li abred,
fere jo wo amahm, n jo tongo re, ‘Á kpi ebi etohko
go ege atahng.’

34 Wo anv, Mmon no nne ebba, kp'lehke, fere jo
w'wo, n fere jo bungu re, ‘Nyeppen nlehke ebno
noa! Á li nwokamahm, a ntem no abakokatak, a
ntem no aneb ab'bi.’

35 “Nne l'kpur nsol nyi aneb elkahne kpo lim,
owo á bahke tob kahn ana elkahne li no.”*

Ana Jisos jolo go etahk Saimon, nne a Farisi

36 Nne a Farisi awohng kehm tiingi Jisos re á
song li nsol a ne. Jisos kehm jeke go etahk nne a
Farisi noo, song ji go eksp'kuru nsol alehke.

37 Nnenkal awohng jolo ejahbe jio, no jolo nne
abiafem. Eji á sebe kahn re Jisos noa, kp'lehke
nsol go etahk nne a Farisi noo, owo á kehm koko
elom akehng tahm a ji,

38 song yiimi go njahm a Jisos, edi ji Jisos
bumu akpade. Á jo l'ling, abonngo jo toongo
wohngo Jisos go akpade. Owo á kehm koko alv esi
enye dohk-e akpade, fere sod akpade enye, kehm
yaange akehng mao, wohng-e go akpade.

* 7:35 7:35 Ef 5:15; Kol 2:3

³⁹ Eji nne a Farisi no tiingi Jisos nyehne ano, á kehm bungu atahng atahng re, “Li re nne noa lohko li nnyehnamahr, kehn á jol kahne nne no nnenkal noo li no, no kp-e kooro abo, fere kahn elkohn elkpín ni á kpo lim, tibre á li nne abiafem.”

⁴⁰ Owo Jisos kehm bungu re, “Saimon, n kpi ejum ji n kp-a tongo.”

Á kehm faange re, “Aa, nt'tibi, tong-m me!”

⁴¹ Owo Jisos kehm bungu re, “Ane abal jolo go, ba bele nne no kpo bong ane akpohko mbong. Nne noko bel-e mbong a mpon atahl awubu, noko bel-e mbong a mpon eltahl.

⁴² Eji bo ki bel ejumjum ji bo bahke koko gal mbong nyio, á kehm yake ka bo. Tong-m, go ellong ane abal baa, nne awo, nne noo bahk-e jo ga kor?”

⁴³ Owo Saimon kehm faange re, “Me m bum re, nne no á ga yake ka-e wo.” Jisos kehm bungu tong-e re, “Wobfaange go nseenge.”

⁴⁴ Á kehm keebe seenge nnenkal noo, kehm bungu tong Saimon re, “Wobnyehn nnenkal noaa? Eji m ba yel go ega ekp'kpa, me a kaam alahb re men n ru akpade. Wo, ye ma-m ru akpade go ege abonngo, fere ko alv enye dohk-m.

⁴⁵ M-e a sodem nnyo. Jol ye ka tiki rahke akpade enyame go elsodo, eji n tiki yel a.

⁴⁶ Akehng, m-e a kakem go esi, wo, ye ma-m wohngo akehng go akpade.

⁴⁷ Owo wahnge n kp-a tongo re, Abiafem enye nya li gbalee, me n tahm ka-e, tibre á kpi egburu elkoro sehng.”†

† 7:47 7:47 Mat 22:36-37

⁴⁸ Á kehm tongo nnenkal noo re, “Abiafem enya me n tahm ka-a.”[‡]

⁴⁹ Ane bako ba tob ji ekp'kuru nsol alehke jio kehm kehme elbundu atahng atahng re, “Ebga! Anv, ye nne awo no kpo tahm ka nne go ege abiafem?”

⁵⁰ Owo Jisos kehm tongo nnenkal noo re, “Song go eyebatahng! Eltaame ena ni ma-a tahre.”[§]

8

Anekkal ba jo toono Jisos

¹ Eji ma jol ano, Jisos kehm jo jen yanng e ajahbe ajahbe ajahbe, jo bung alum Esowo, fere jo tiingi nnoobo etib bi etul bi Esowo. Abat'toono ebe, ewubu ane abal, jolo a ne o,

² a anebkal bandiki ba á kame bo abi atohko yehke, fere lim bo nob ayam ebo. Meri ji bo jo lung-e re Meri ji lohng go Magdala tob woomo go ellong ane bao, ye ji á kam-e abi atohko na asehma yehke,

³ go Joanna nkal a Kusa, Kusa ji jolo ntubesi no alokeltum ba jolo go nlaaga Herod, go Susanna, a anebkal gbalee bako ba jo kak Jisos, a abat'toono ebe ebo go nsol nyi bo bele no.*

Elgan ni li bada mbahmgbe

(Mat 13:1-9; Mak 4:1-9)

⁴ Eji ellong ane gbalee kpi nlohngo nlohngo go ajahbe ajahbe ajahbe, ba kono edi ajehng goji Jisos, owo á kehm tubu bo elgan nia re,

[‡] 7:48 7:48 Luk 5:20-24
Mak 15:40-41; Luk 16:9

[§] 7:50 7:50 Rom 10:9-10

* 8:3 8:3

⁵ “Nne jolo go, no tahme re á song wohngo amohk nti enye go ege egbe. Eji á jo wohngo, nyandiki fooro gbo go mbang. Ane ba kadde sehng. Nruk ba suudu mele.

⁶ “Nyandiki gbo noongo go ndi nyi jolo atal atal. Amohk nti nyao gulu elmahnge, fere kpo, waange, tibre ndi waange sehng.

⁷ “Nyandiki gbo kuumu go elkob akpiri, mahng. Akpiri kehm gbale, bulu akohdo nti nyao.

⁸ “Nyako gbo noongo go nnooba ndi, kehm mahnge, gbal, kab akab, etasok ajehng ajehng nkab atahl alon alon.”

Eji Jisos ma bung ano, á kehm rabe re, “Nne no kpi atung, nong, á wuk!”

Ana Jisos lennge elgan nia

(Mat 13:10-23; Mak 4:10-20)

⁹ Abat'toono Jisos kehm-e bahbe ana elgan nia lohngo no.

¹⁰ Owo Jisos kehm faange bo re, “Bo ma-n ka elkahne nio ni nsol nyi li ka etul bi Esowo, nyi Esowo behre no. Egom ane bako kpo wuk ngaane ngaane, eji ‘bo l'seenge na seenge, k'nyehn, fere wuk na wuk, k'kahn ana lohngo no.’

¹¹ “Ana wo elgan nia lohngo no. Amohk nti nyao, alum Esowo nya.[†]

¹² “Amohk nti nya gbo noongo go mbang lohngo ana ane ba kpo wuk alum Esowo. Nnehm ba yehke alum nyao go bo a ntim, eji bo l'k'taame, fere bel eltahre.[‡]

¹³ “Amohk nti nya gbo noongo go ndi nyi li atal atal lohngo ana ane ba l'wuk alum Esowo. Bo ko

[†] 8:11 8:11 1 Pit 1:23 [‡] 8:12 8:12 Elt 24:24-27; 2 Kor 3:14-16

go eyebatahng. Alohk bo nehm bel. Bo kpo toono Esowo mmongare ntiil. Elgaare l'ba, bo yak-e.§

14 “Amohk nti nya gbo kuumu elkob akpiri lohngo ana ane ba ma wuk alum Esowo. At'tiiri nya njini nyia, ekor afang, a ekor nsol nyi njini kpo lim, nsol nyi nyi kpo ra yel go bo a ntim, song bulu alum Esowo tv, akab nehm kul.*

15 “Amohk nti nya gbo noongo go nnooba ndi lohngo ana ane ba ma wuk alum Esowo, fere ko, kuuru go bo anoobo ntim nya enehm abehng abehng ki wob, soro asi, jo kab akab.†

*Et'rekahng ji wob go nla ekp'kuru
(Mak 4:21-25)*

16 “Nnene limm, no ma ny'nyaale et'rekahng, rod ejeere konngo, jol rod, kak go nla ekp'kuru. Á bahke rodo na, kunu go ejum ji bo kpo kunu et'rekahng, eji ane ba kp'yele ekp'kpa l'jo nyehn ellenge nio.‡

17 Tibre ejum ajehng ajehng limm, ji bo behre no, ji l'k'jol gbuul. Jol ejum ajehng ajehng limm, ji li go mbiiri, ji l'k'lohng gbuul, ane fere kahn.§

18 “Jo kunen ekpu ana á kpo wuk nsol.* Nne awohng awohng no kpi no, bo bahk-e kake na budu. Nne awohng awohng no ki kpi, jio ji á tiri no re á kp'kpi, bo bahk-e taare na.”†

*Nnyehn Jisos, a abonanyehn Jisos
(Mat 12:46-50; Mak 3:31-35)*

§ 8:13 8:13 Hib 10:32-39 * 8:14 8:14 2 Tim 4:10 † 8:15 8:15 1 Kor 15:10 ‡ 8:16 8:16 Mat 5:15-16 § 8:17 8:17 Mat 10:26; Rom 2:16 * 8:18 8:18 Jon 5:47; Elt 7:51 † 8:18 8:18 Luk 19:11-26

¹⁹ Nnyehn Jisos, a abonanyehn Jisos kehm bake. Bo tikem ma rehng goji Jisos tib ellong ane.

²⁰ Owo ane bao kehm-e tongo re, "Nne, a abonane, bo baa, yim go elatahk kp'sebe re bo nyehn-a."

²¹ Jisos kehm faange bo re, "Ane ba l'wuk alum Esowo, fere jo lim, bo ba li babnnee, a abonanee."

Ana Jisos nyame nfeb, a ebuku

(Mat 8:23-27; Mak 4:35-41)

²² Efung abehng Jisos kehm yele go egbang, a abat'toono ebe, kehm tongo bo re, "Nong, wahr siiren rehng egbuk eto jehko." Owo bo kehm soro tahm.

²³ Eji bo jo fing asongo, Jisos kehm gboko ellu. Owo egburu nfeb kehm ba kehme ellimi go eto jio, alahb kehm kehme elkimi yel egbang, ba elruru. Bo jolo efin efin ngare nyio.

²⁴ Owo abat'toono ebe kehm ba kpir-e, kehm-e nyahme re, "Nsoo, nsoo, e kp'tane na ao!"

Jisos kehm mehle yiimi, kehm nyame nfeb, a ebuku ji jo lim nsahm nsahm. Kehm rahke, edi naange soom.

²⁵ Jisos kehm bungu tong bo re, "Anv, eltaame enahne n'na me?"

Owo bo kehm kehme elfahle, fere jo kpo bo esi. Bo kehm kehme elbungu atemtem re, "Anv, ye elkohn nne awoe, no kpo bung tong nfeb, a ebuku, wuk-e?"

Ana Jisos limi nne no bele abi atohko, á nob

(Mat 8:28-34; Mak 5:1-20)

²⁶ Bo kehm song rehng go Gerasa ji jolo egbuk eto jehko. Galili egbuk jehka.

²⁷ Eji Jisos wahre go egbuk, nne awohng lohngo go nla ejahbe, kehm ba wan-e.

Nne noo bele abi atohko ekidi eblab. Á jo jene ebun ebun. Á joom kang etahk, á jo kange edi ji alahm akvne jolo no.

²⁸ Á nyehne kan Jisos a, á kehm rabe, gbo-e go alata, fere jo bung wahre wahre re, “E li nfem anyi awahr a na, Jisos ji Mmon Esowo bi gbale sehng? N kp-a gboongo re, wo ki-m kak erem.”[‡]

²⁹ Tibre Jisos tohko tong esabsab etohko jio re á lohng nne noo. Nkpel tvv etohko jio jo yehk-e. Jol eji ane jo kak-e kak agbekobo go abo, a akpade akpade, fere jo baab-e, á jo kiimi na agbekobo nyao, ebi etohko jio jo yehk-e kak go elka emahng.

³⁰ Owo Jisos kehm-e bahbe re, “Mbing enya mee?”

Á kehm faange re, “Egom.” Tibre abi atohko gbalee woom-e go atahng.

³¹ Abi atohko nyao kehm gboongo Jisos re, á k'tong bo, bo je song yel go nrabbe elbing.[§]

³² Ngare nyio ellong akuk gbalee jo li nsol ona go nkpe ewong. Abi atohko nyao kehm gboongo Jisos re á lub yake bo, bo song yel akuk nyao go atahng.

Jisos kehm yake bo.

³³ Owo abi atohko nyao kehm lohngo nne noo, song yel akuk go atahng. Akuk nyao kpee kehm beke, song fooro egbunggbung aya, yel alahb tan.

[‡] 8:28 8:28 Jems 2:19 [§] 8:31 8:31 Ell 20:1-3; 2 Pit 2:4

³⁴ Eji ane ba jo baabe akuk nyao nyehne ano, bo kehm beke, song tooro go etahk, a abon ajahbe ba jolo o.

³⁵ Ane bao kehm lohngo ba re bo ba nyehn ejum ji ma lim. Eji bo ba kpiri Jisos, bo kehm tob ba nyehn nne no abi atohko lohng-e no, jehk go alata nya Jisos sange sange. Á ma kak nsol go ngubjing kpee. Owo bo kehm kehme elfahle.

³⁶ Ane ba nyehne ana ngbokesahl nyio ma nob, bo kehm song tooro tong ane bako.

³⁷ Ane kpee ba lene ejang bio bi Gerasa kehm gboongo Jisos re á tahm o song.* Tibre bo jo fahle sehng. Owo Jisos kehm song yel egbang re á feere kehng.

³⁸ Nne no abi atohko lohng-e no kehm gboongo Jisos re, “Nong, me n jol a na!”

Jisos kehm-e tongo re á song,† fere bung re,

³⁹ “Feere song kehng, wo song tong ane ana ji Esowo ma lim ka-a.” Owo nne noo kehm tahme, song tooro tong ejahbe jio kpee bade egburu ejum ji Jisos ma lim ka-e.

Mmon a Jairus, a nnenkal no kooro Jisos ebo go ege a nsubu

(Mat 9:18-26; Mak 5:21-43)

⁴⁰ Eji Jisos feere no, ba rehng egbuk eto jehka, ane kehm-e jo gbaame. Tibre bo ji, jo sik-e.

⁴¹ Owo nne awohng kehm lohngo ba, no bo jo lung-e re Jairus ji jolo ntubesi etahk ero, ba gbo jamme Jisos alahng, fere gboong-e re, á lub je go ege etahk.‡

* **8:37 8:37** Mat 6:24; 19:22 † **8:38 8:38** Jon 20:17 ‡ **8:41 8:41** Jon 12:42

⁴² Tibre á bele mmon mmon awohng no nkal, no ma kang ewubu a nnya ebal. Á noongo go emel elkv.

Eji Jisos jo jen mbang mbang asongo, ellong ane jo fahd-e na fahd kak.

⁴³ Nnenkal awohng jolo o, no alung jo lohng-e go nnahb go ewubu a nnya ebal. Á ranng akpohko nya á bele no kpee, ka abalimakahm. Jol nnene we tikem ma lim, á nob.

⁴⁴ Owo á kehm jeere kohlo Jisos go njahm, fere koor-e go ege es'sili nsubu.§ Tvtv o, alung eme kehm soro kimi.

⁴⁵ Jisos kehm bahbe re, “Nne awo ma-m kooro a?”

Eji ane kpee ma ten, Pita kehm bungu re, “Nsoo, ellong ane ni kp'jene a na, ni ni kp-a sehme.”

⁴⁶ Owo Jisos kehm kpe bung re, “Nne ma-m kooro. Tibre me n kahn re, nsahm ma-m tele lohng.”

⁴⁷ Eji nnenkal noo sebe kahn re, á nehm ma biiri, á kehm lohngo kp'kahme abake, ba gbo jamm-e alahng, kehm tooro go esamahr ane kpee, ana ji wahng á koor-e no, fere tong ana á soro nob ngare ny'nehm o.

⁴⁸ Owo Jisos kehm bungu re, “Mmon ewame, eltaame ena ni ma-a lim, a ma nob. Song go eyebatahng!”*

⁴⁹ Eji Jisos kpi mbungu mbungu, nne awohng kehm lohngo etahk ntubesi ero noo, ba tong-e re, “Mmon ewa ebkpo. Ka kpe gbiingi nt'tibi mbol mbol.”

§ 8:44 8:44 Jon 19:38 * 8:48 8:48 Luk 7:50

⁵⁰ Eji Jisos wuku ano, owo á kehm-e faange re, “Ka kpe fahl, taame na taame![†] Á bahke nobo.”

⁵¹ Eji á ba rehng etahk jio, á taamem re nnene kpe yel ekp'kpa, sehngem Pita, Jon, a Jems, go nde mmon, a nnyehn, bo ba, á taame no bo yel.

⁵² Nne awohng awohng jo ji ndon ndon, fere jo ling.

Owo Jisos kehm bungu re, “Kana kpe ling, mmon noa ka kpo, á kp'lale na.”

⁵³ Bo kehm-e elwolo, tibre bo jo kahne kpee re, mmon noo ebkpo.[‡]

⁵⁴ Jisos kame kan ane bao yehke, á kehm jabbe mmon noo go ebo, kehm rabe re, “Mmon, mehl!”

⁵⁵ Etohko mmon noo kehm soro feere ba yel-e, á soro mehl tvtv. Owo Jisos kehm tongo bo re, bo ka mmon noo nsol alehke, á li.

⁵⁶ Nde, a nnyehn, kpo bo esi sehng. Owo Jisos kehm tongo bo re, bo k'tong nne awohng awohng ji ma lim.

9

Ana Jisos tumu abat'toono ebe (Mat 10:5-15; Mak 6:7-13)

¹ Jisos kehm lungu abat'toono ebe, ewubu ane abal, tv edi ajehng, fere ka bo nsahm nyi bo bahke jo kam ane abi atohko kpee yehke, fere jo lim ane, bo nob ayam ebo.

² Owo á kehm tumu bo re, bo song tiingi ane etib bi etul bi Esowo, fere lim ane, bo nob ayam ebo.

[†] 8:50 8:50 Jon 20:29 [‡] 8:53 8:53 Elt 17:32

³ Á kehm tongo bo re, “Eljen ni rí bahke tahme, kana rod ejum ajehng ajehng fili, ana ebtí efilibo, a abam, a nsol alehke, a akpohko. Kana fili nsubu ebal ebal!”*

⁴ Etahk ajehng ajehng ji bo l'vvr-n, jolen o, tete wahn tahm ejahbe jio.†

⁵ Ejahbe ajehng ajehng ji tohk-n vvr, tahmen ejahbe jio, wahn kum ebtohko go egahne akpade. Ebtohko bio bi bahke jolo ana ntianse nyi bahke jo bung tob bo.”‡

⁶ Abat'toono bao kehm tahme, jo yanng ajahbe ajahbe ajahbe, jo tiingi nnoobo etib, fere jo lim ane edi ajehng ajehng, bo nob ayam ebo.

*Ana ala teelee Herod
(Mat 14:1-12; Mak 6:14-29)*

⁷ Eji Herod ji jolo ntul no Galili wuku nsol kpee nyi jo lim, owo ala kehm jo teel-e, tibre ane bandiki jo bungu re, “Jon ji nwohngalahb ebnyahme go elkv.”

⁸ Ane bandiki bungu re, “Elaija wo ma lohng ba.” Ane bandiki bungu re, “Nnyehnamahr awohng noko no jolo go nk'kula ngare wo ma feere ba jol go elkpín.”

⁹ Herod bungu re, “Jon, m m-e kim esi, wo anv, nne awo n kp'kpeke wuk elkohn nsol ana nyia bada ne?”

Owo á kehm jo gare ana á bahke nyehne Jisos.§

*Ana Jisos le ellong ane tvv (5,000)
(Mat 14:13-21; Mak 6:30-44; Jon 6:1-14)*

* 9:3 9:3 Luk 22:35 † 9:4 9:4 Elt 16:15 ‡ 9:5 9:5 Elt 13:51

§ 9:9 9:9 Luk 23:8

¹⁰ Eji abatiingetib ma feere, bo kehm ba tong Jisos ejum ajehng ajehng ji bo ma lim. Á kehm koko bo bo, tahm a bo go ejahbe ji bo jo lung re Betsaida.

¹¹ Eji ane wuku ano, owo bo kehm-e toono. Á kehm gbaame bo, fere bung a bo bade etul bi Esowo. Ane ba jo yam, á lim bo, bo nob.

¹² Ngare nyi njul yahke ba ellahme, owo abat'toono ebe, ewubu ane abal kehm bake ba tong-e re, "Tong ane baa, bo song go ajahbe nya li kpidi kpidi, a abon ajahbe bako, eji bo l'ting nsol alehke li, fere ting adi nyao bo bahke kange. Tibre tahm edi jia rehng go ajahbe ekidi kp'labe."

¹³ Owo Jisos kehm tongo bo re, "Wahnfono antahng kaan bo nsol alehke, bo li."*

Bo kehm faange re, "E kpi abon abred na alon, kunu abon nsahre na abal ba ba. Anv, a kp'sebe re wahr tahm song gunu nsol alehke, ba ka elkohn ellong ane ana niaa?"†

¹⁴ Tibre aneblum ba jolo o, jolo ejum ane atahltahl nkpel ewubbal atahl awubu (5,000).

Owo Jisos kehm tongo abat'toono ebe re, "Nong, ane baa ji ag'gabe ag'gabe, ellong anehng anehng jo jol ane atahl abal ane awubu."

¹⁵ Abat'toono ebe kehm limi ano, ane bao kpee ji ndi.

¹⁶ Owo Jisos kehm rodo abon abred bao na alon, kunu abon nsahre abal, kpiidi amahr enye go elbung, kak Esowo saam, bakke, ka abat'toono ebe, eji bo l'song bak ellong ane bao. Bo kehm song bak bo.

* **9:13 9:13** Jon 21:15; Mat 24:45 † **9:13 9:13** Jon 16:14-15

¹⁷ Ane bao li kpee wohngo. Abat'toono ebe kehm taare erik ji ane bao li no sa, ruru ewubu ejeere ebbal.

Ana Pita bungu bada Jisos
(*Mat 16:13-19; Mak 8:27-29*)

¹⁸ Efung abehng bi Jisos jo kak ero antahng, abat'toono ebe kehm ba kpir-e. Jisos kehm bahbe bo re, “Anv, ane kpo bung renan bada name? Me n li elkohn nne awo?”

¹⁹ Bo kehm faange re, “Ane bandiki kpo bung re, wo Jon ji nwohngalahb wo. Ane bandiki re, wo Elaija wo. Ane bandiki re, nnyehnamahr awohng noko no jolo mahne mahne wo ma nyahme.”[‡]

²⁰ Owo Jisos kehm bahbe bo re, “Anv, wahn kpo bung renan bada name? Me n li elkohn nne awo?”

Pita kehm faange re, “Wo li Mesaya nyi Esowo tum-a no.”

²¹ Jisos kehm rehke bo, fere bung a bo t'tahne re, bo k'tong nnene.

Ana Jisos bungu bade elkv ene
(*Mat 16:20-28; Mak 8:30-38*)

²² Owo Jisos kehm bungu tong abat'toono ebe re, “Mmon no nne bahke nyehne erem gb'gbal. Anebkul nfam, atubesi abalimajom, a at'tibi ba atahm bahk-e tene, fere wul-e. L'kang nfung era, á nyahme go elkv.”[§]

²³ Owo á kehm bungu tong ane kpee re, “Nne no l'seb re á toon-m, nong á ten elne tv-m, fere rod ekros eje efung abehng abehng, jo toon-m.

[‡] 9:19 9:19 Jon 6:14; 7:12,26-27,40-43 § 9:22 9:22 Luk 18:31-34

24 Nne awohng awohng no kp'sebe re á tahre elkpin ene, á bahke tane na elkpin ene. Nne awohng awohng no l'tane elkpin ene tib go egame esi, á bahke tahre na elkpin ene.*

25 Nsehng anyi nne bahke lehke, jol afi á gbo afang nya njini nyia kpee, fere tane elkpin ene, afi á yake elne ka go?

26 Tibre nne awohng awohng no l'be ndon, ten-m, afi jolo alum enyame, fvfo, Mmon no nne bahke tob be-e ndon, á l'ba go ege ellub, a ellub ni Nde, a abarebare enjel.†

27 Etingitingi, n kp-n tongo re, Egom jindiki ji yim a, nehm kpo, tete bo nyehn etul bi Esowo go amahr.”‡

Ana Jisos yaange ngubjing
(Mat 17:1-8; Mak 9:2-8)

28 Bomo ngare nyi Jisos bungu alum nyao, eji ma kang nfung enehkeni, owo á kehm rodo Pita, Jon, a Jems, wahr a bo go ewong re á song kak ero.

29 Eji á jo kak ero, esamahr ebe kehm yaange. Nsol nyi á kake no kehm bare, fere jo ny'nyane.

30 Owo ane abal kehm soro lohng ba kehme elbungu a ne, noko jolo Moses, noko jol Elaija.§

31 Bo ba go ellub ba bung a Jisos bade elkv ni á yahke ba elkpoko go Jeusalem, eji á l'gohro lim ji Esowo toobo no bum-e.

32 Wo gana, Bab Pita ebgbo ellu kp'lale.* Eji bo ma nyahme, bo kehm nyehne Jisos a ellub ene, fere nyehn ane abal ba yiimi a ne ona.

* 9:24 9:24 Luk 17:32-33; Jon 12:25 † 9:26 9:26 Rom 1:16

‡ 9:27 9:27 Luk 9:32 § 9:30 9:30 Mak 12:27 * 9:32 9:32 Mak 14:37

33 Eji ane bao yahke tahm, owo Pita kehm tongo Jisos re, “Nsoo, n'nob re wahr jol a. Nong, wahr si nkpatahk era, behko b'ba, behko bi Moses, behko bi Elaija.” Jol á kahnem ji á jo b'bung.

34 Eji á kpi mbungu mbungu, ekparesemsem kehm tahle, ba bulu bo. Bo kehm kehme elfahle, eji bo woomo go ekparesemsem.

35 Bo kehm wuku ellum go atahng ekparesemsem re, “A wo li akor-m mmon ewame, jo wuken ye!”†

36 Eji ellum nio ma mal, bo nyehne Jisos ntahngtahng. Bo belle na belle. Ngare nyio bo tikem tong nne awohng awohng ejum ajehng ajehng ji bo nyehne no.

Ana Jisos limi mmonse no bele ebi etohko, á nob (Mat 17:14-18; Mak 9:14-27)

37 Etoono efung behko eji bo ma badde go ewong, ellong ane tvv kehm ba kpiri Jisos.

38 Nne awohng go ellong ane bao kehm rabe re, “Nt'tibi, n kpa gboongo! Nyehn mmon ewame ana! Ye ntahngtahng wo n kpi-e no.

39 Ebi etohko kpo yehk-e. Ngare anyehng anyehng nyi á l'yehk-e, á soro biingi tvtv, fere sok-e, tete nfahl jo tub-e nnyo, fere jo jahr-e. Kpo riidi kehm-e yake abo.

40 Me n gboongo abat'toono eba re bo kam-e yehke. Bo maam lim.”

41 Owo Jisos kehm faange re, “Jen ji wahnge wahn ane ba li anv kil taame? N kpo fere soodo! Anv, m bahke kange renan a nahne, fere jo tib-n, n kehm kahne? Ko mmon ewa ba a ne!”

† 9:35 9:35 Luk 3:22

⁴² Eji mmon noo jo jen abake, ebi etohko jio kehm-e soro yehke tub go ndi, á soro gbo ngboko.

Owo Jisos kehm nyame esabsab etohko jio, fere lim mmon noo, á nob, fere yak-e ka nde.

⁴³ Ane kpee kehm kpoko bo esi, eji bo nyehne egburu nsahm nyi Esowo.

Ana Jisos kpe bung bade elkv ene

(Mat 17:22-23; Mak 9:30-32)

Eji kpi nkpoko nkpoko ane bao kpee esi bade ejum ajehng ajehng ji Jisos ma lim, owo á kehm tongo abat'toono ebe re,

⁴⁴ “Wuken alum nyaa, wahn kak go egahna ntim! Tibre Mmon no nne, bo yahk-e ba elyake kak ane go abo.”

⁴⁵ Bo kahnem ana alum nyao lohngo no. Tibre á lenngem bo, eji bo l'k'kahn ana lohngo no.‡ Bo jo ffahl a ye bahb ana alum nyao lohngo no.

Nne awo ga gbal?

(Mat 18:1-5; Mak 9:33-37)

⁴⁶ Abat'toono Jisos kehm kehme nfaabe lim bada nne no ga gbal go bo ellong.

⁴⁷ Eji Jisos sebe kahn ji bo jo tir go bo a ntim, owo á kehm koko mmonse, á ba yiimi kohl-e,

⁴⁸ kehm tongo bo re, “Nne awohng awohng no l'ko mmonse ana noa tib go egama mbing, á ko me. Nne no l'ko me, á ko nne no tum-m no.§ Tibre nne no l'ga rede go egahne ellong, ye wo li nj'joka nne.”

Nne awo li nne ewahne?

(Mak 9:38-40)

‡ 9:45 9:45 Luk 18:34; Mak 4:13; Jon 8:27; 10:6 § 9:48 9:48 Mat 10:40

49 Jon kehm bungu re, "Nsoo, wahr ebnyehn nne no kp'kame ane abi atohko yehke go ega mbing. E m-e sahde, tibre wa á kpehme toono ana wahr."

50 Owo Jisos kehm-e faange re, "Kana ye kpe sahde, tibre nne no tohk-n ko ekv, ye nne ewahne wo."*

Ejahbe ji tene Jisos

51 Eji afung nya bo bahke rodo Jisos tahm a ne go ejahbetul Esowo ma kabbe, á kehm bobo eltim ene re á tahm go Jeusalem.†

52 Á kehm tumu ane, bo gbo-e mbang, song rehng go ejahbe Samaria ajehng re bo song toobo nsol bum-e.‡

53 Ane ba jolo ona we koom, tibre bo kahne kpee re, á jo tahme go Jeusalem.§

54 Eji abat'toono ebe Jems, a Jon nyehne ano, owo bo kehm bahbe re, "Ntul, anv, a kp'sebe re wahr biri agun lohng go ejahbetul Esowo tv boa, ana Elaija limi noa?"*

55 Owo Jisos kehm keebe, kehm nyame bo re, "Anv, n nehme kahn elkohn etohko ji n kpi noa?"†

56 "Tibre Mmon no nne baam re á ba ranngelkpin ane, á ba na re ane bel eltahre."‡ Owo bo kehm sehng, song rehng ejahbe jehko.

Nong, akvne kpa akvne kak (Mat 8:19-22)

* 9:50 9:50 Fil 1:15-18; Jon 10:16 † 9:51 9:51 Fil 2:8; Luk 13:33

‡ 9:52 9:52 Jon 4:4 § 9:53 9:53 Jon 4:9 * 9:54 9:54 Mat 10:14

† 9:55 9:55 Mat 5:44 ‡ 9:56 9:56 Jon 3:17; 12:47

⁵⁷ Eji bo jo jen go mbang asongo, nne awohng kehm tongo Jisos re, “M bahk-a toono, je edi ajehng ajehng ji a fi no.”

⁵⁸ Owo Jisos kehm-e faange re, “Akpangang kpi abing, nruk kpi ntahk. Wo, Mmon no nne, edi ellohko esi ajehng ajehng á kpimm.”§

⁵⁹ Owo Jisos kehm tongo nne noko re, “Tahm toon-m!” Á kehm-e faange re, “Nsoo, nong me n tohko gbo mbang song kpa nsoo kak.”

⁶⁰ Jisos kehm-e tongo re, “Nong, akvne kpa akvne ebo kak.* Wo, song, wo song tiingi etib bio bi etul bi Esowo.”

⁶¹ Owo nne noko kehm kpe bung re, “Ntul, m bahk-a toono. Nong, me n tohko gbo mbang song tong ane ebame re me n fio.”

⁶² Owo Jisos kehm-e tongo re, “Nne awohng awohng no ma rod elu eje, bom egbe abahme, fere jo keebe go njahm, á kpeem fuumu re á kuumu etul bi Esowo.”†

10

Ana Jisos yehke ane atahl ara ane awubu tum

¹ Eji ma jol ano, owo Jisos kehm yehke ane atahl ara ane awubu bako, tum bo ane abal abal re,* bo gbo-e mbang song rehng ejahbe ajehng ajehng, a edi ajehng ajehng ji yefono antahng yahke ba eljeke.

² Tib á tongo bo re, “Egbe ji elkpake jia gbalee. Abalimeltum li ntiil. Owo fvfo nobo re wahn

§ 9:58 9:58 1 Pit 2:11 * 9:60 9:60 Ef 2:1; Kol 3:1-2 † 9:62 9:62

Luk 17:32 * 10:1 10:1 Mak 6:7

gboongo nfono egbe, á tum abalimeltum tv go ege egbe, bo song kpa.†

³ Songen, n kp-n tumu ana abon ejoro re wahn song go ellong agabe.‡

⁴ Kana fili akpohko, a abam!§ Kana kak akpaketa! Kana yange, kak nne awohng awohng nnyo go mbang!*

⁵ “Etahk ajehng ajehng ji n l'yange, jo kaken aneb etahk bao nnyo re, ‘Nong, elkoono jol etahk jia!’

⁶ Nne l'fere jol o, no kp'sebe elkoono, elkoono enahne bahke jolo a ne, tohko jol ano elkoono enahne bahke feere ba tob-n.

⁷ Jolen etahk j'nehm ona, wahn jo li, fere jo wo ejum ajehng ajehng ji bo l'ka-n. Tibre nlokeltum f'fuumu re á bel eltuuru ene.† Kana jo yaange ntahk nyindiki jol!

⁸ “Ejahbe ajehng ajehng ji n l'je, bo l'vvr-n, jo liin ejum ajehng ajehng ji bo ka-n no.

⁹ Limen aneb ayam, bo nob ejahbe jio, wahn fere tong ane bao re, ‘Etul bi Esowo ma-n kabbe.’

¹⁰ “Ejahbe ajehng ajehng ji n l'je, bo tohk-n vvr, tahmen song go afak nya li ejahbe jio, wahn jo bung re,

¹¹ ‘Ebtohko bi ejahbe ejahne bi ma-r laake go egahre akpade, e kp'kumu tv-n. Ejum jia ji nobo re wahn kahn ji li re, Etul bi Esowo ebkabbe.’

¹² “N kp-n tongo re, Efung elam bio, elam nehmg bib a anebe Sodom ana bahke bibi a ejahbe jio.

† 10:2 10:2 Jon 4:35-38 ‡ 10:3 10:3 Elt 8:32 § 10:4 10:4 Luk 22:35 * 10:4 10:4 Kol 4:5 † 10:7 10:7 1 Kor 9:9-15

13 “Eyuu a nahne, wahn anebe Korasin! Eyuu a nahne, wahn anebe Betsaida! Li re Taya abola Saidon nyehne akpokosi ana nya rí ma nyehn, kehn bobgbo ndon wuku wuku, kak agbajake nsol, fere ji go atong.‡

14 Efung elam bio, elam nehm ga bib a aneb Taya, a Saidon ana bahke bibi a nahne!

15 “Wahn anebe Kapenium, bo ma-n mehl wahre rehng go ejahbetul Esowo.§ Bo bahke fere rod-n, ro kak go ellulagun.

16 “Nne no l'wuk-n, á wuku me. Nne no l'ten-n, á tene me. Nne no l'ten me, á tene nne no tum-m no.”*

Ana ane atahl ara ane awubu bao feere no kehng

17 Ane atahl ara ane awubu bao feere kehng go eyebatahng, fere jo bung re, “Ntul jol abi atohko wob-r na go elwo tib go ega mbing.”

18 Owo Jisos kehm faange bo re, “Me n nyehn nnehm ma fooro go ejahbetul Esowo gbo ana emangedu.†

19 M ma-n ka nsahm nyi rí bahke jo jade enyo, a enang go akpade, fere ka-n nsahm nyi gbale sehng nsahm kpee nyi Nnekv kpi no. Ejumjum limm, ji bahk-n jo lim go mbang anyehng anyehng.‡

20 Kana jo geere tib abi atohko wob-n go elwo. Jo geeren, tibre abing enyahne, bobnyon go ejahbetul Esowo.”§

‡ 10:13 10:13 Mat 11:21-23 § 10:15 10:15 Mat 8:5-10 * 10:16 10:16 Mat 10:40 † 10:18 10:18 Jon 12:31 ‡ 10:19 10:19 Mak 16:18 § 10:20 10:20 Ell 3:5

Ana eyebatahng gbale Jisos
(Mat 11:25-27; 13:16-17)

²¹ Ngare nyio Jisos kehm bele eyebatahng go etohko, kehm bungu re, “N kp-a tehke Nsoo, wo ji li Ntul no ejahbetul Esowo, a ndi, tibre a behre nsol nyia re akahnkahn ane, a anebe ngbere k'nyehn, a ma fere lennge ka abonbili. O nsoo, ano wo kor-a no go ega eltim.*

²² Nsoo ebyake ejum ajehng ajehng kak-m go ebo.† Nnene nehme kahn nne no Mmon li no, sehngem Nsoo ntahngtahng wo kp'kahne. Nnene nehme tob kahn nne no Nsoo li no, sehngem Mmon wo kp'kahne, a nne no Mmon bahke lennge Nsoo ka-e.”

²³ Jisos kehm keebe, kehm bungu tong abat'toono ebe ngare nyi bo jolo bo bo re, “Elfuulu li ka ane ba kp'nyehne nsol nyi wahn kp'nyehne.‡

²⁴ Tibre n kp-n tongo re, Abanyehnamahr gbalee, a atul jo sebe re bo nyehn ji n kp'nyehne, jol bo nyehnem. Bo jo sebe re bo wuk ji n kp'wuku, jol bo tikem wuk.”§

Elgan ni li bada nne a Samaria

²⁵ Nt'tibi no atahm awohng kehm lohngo ba re á ba gare Jisos. Owo á kehm bungu re, “Nt'tibi, m bahke limi renan, kehm bele elkpín ni li go njinanjini?”

²⁶ Jisos kehm-e bahbe re, “Anv, jen ji bo nyono go atahm? Jen ji a kpo l'lung?”

* **10:21 10:21** 1 Kor 1:27-29 † **10:22 10:22** Mat 28:18 ‡ **10:23 10:23** 1 Jon 1:1-4 § **10:24 10:24** 1 Pit 1:10-12

27 Owo á kehm faange re, “Esowo Ntul ewa bahke jo kor-a eltim eltim ena, etohko etohko eja, eko eko eja, a ntir a ntir enya. Nne ebjing ewa jo kor-a ana ebjing eba.”*

28 Jisos kehm-e tongo re, “Wobfaange go nseenge. Jo lim ano, a bahke bele elkpín.”

29 Nt'tibi noo sebe re á tib re, ye etingi nne ji. Owo á kehm bahbe Jisos re, “Nne awo li nne ebjing ewame?”

30 Jisos kehm-e faange re, “Nne awohng lohngo go Jeusalem, jo tahm go Jeriko. Eji á jo tahm, á kehm song kpiri awajv. Bo kehm-e yehke nsol nyi á kake no, fere dv-e, tab-e tub, á sa noongo o ana nkvné.

31 “Wo ana, ejum jo jol, nlimajom awohng jo sehngé mbang nyio. Eji á ba nyehn nne noo nong no, á kehm gbake eje, sehng nkpe a mbang nyehko tahm.†

32 “Ano wo fvfo nne no kpo lim eltum go etahk Esowo kehm tob ba rehng edi jio, ba nyehn nne noo, tob gbake eje, sehng nkpe a mbang nyehko tahm eje.

33 “Nne a Samaria awohng no jo tahm eljen, kehm tob ba rehng eji nne noo.‡ Eji á nyehn-e no, ndon kehm-e gbale go eltim.§

34 Á kehm jeere, song kpir-e, fere kak-e akehng go alok, a alahb avain, gba-e, kehm-e rodo kunu go ege a nnyam, tahm a ne, song rehng go etahk ajehng. Owo á bohng-e no.

* 10:27 10:27 Rom 13:8-10 † 10:31 10:31 Mat 12:7 ‡ 10:33 10:33 Jon 4:9; 8:48 § 10:33 10:33 Mat 9:36

³⁵ Etoono efung behko, á kehm yehke nsiring ewubu, ka nfontahk noo, kehm bungu re, 'Jo kpur-e. Akpohko anyehng anyehng nya a l'kpe ranng'e budu, n l'ba, m bahke feere a nya ka-a.'*

³⁶ "Anv, ane ara baa, nne awo a tiri re, á jolo nne ebging a nne no awajv dv-e no?"

³⁷ Owo nt'tibi no atahm noo kehm faange re, "Nne no á fil-e ndon wo."

Jisos kehm-e tongo re, "Song, wo tob song lim ano!"

Mata abola Meri

³⁸ Eji Jisos, a abat'toono ebe jo jen go mbang asongo, á kehm song rehng ejahbe ajehng.

Owo nnenkal awohng no bo jo lung-e re Mata kehm-e vvrv, kak go etahk.

³⁹ Mata bele mmonannyehn no bo jo lung-e re Meri, ji jii kohlo Ntul a Jisos, jo wuungu atung go ege alum.†

⁴⁰ Mata jo dehke na dehke, eji á jo lam nsol ka bo, tib eltum gbale sehng. Owo á kehm bake, ba tong Jisos re, "Ntul, anv wa nehme lub, eji n kp'loko eltum nia antahng, Meri kil-m ebo kaka? Tong-e, á ba kak-m ebo!"

⁴¹ Owo Jisos kehm-e faange re, "Mata, a kp'tiiri nsol gbalee nyi kp-a gbiingi go eltim.

⁴² Ejum ajehng ji li ji tahne tahne.‡ Meri wo ma yehke ji ga nob, ji bo l'ki-e ma tiki taare."

* **10:35 10:35** 1 Pit 5:2-4; Ell 22:12 † **10:39 10:39** Jon 11:1; 12:2-3

‡ **10:42 10:42** Mat 6:33; Rom 14:17

11

Bade ero akake
(Mat 6:8-13; 7:7-11)

¹ Efung abehng Jisos jolo edi ajehng, jo kak ero. Eji á ma kak mal, nt'toono ewe awohng kehm bungu tong-e re, "Ntul, tib-r ana e bahke jo kak ero, ana Jon tibi abat'toono ebe."

² Owo Jisos kehm tongo bo re, "N l'kehme ero kak, jo bungen re, "Nsoo, nong, mbing enya jol saang! Yake etul eba ba!

³ Jo ka-r nsol alehke nyi l'biingi a nahre go efung efung.

⁴ Jo tahm ka-r go egahre abiafem! Tibre wahrfono antahng kpo tob tahm ka nne awohng awohng no lim-r abiafem. Ka lim, e yel go elgaare!"

⁵ Owo Jisos kehm tongo bo re, "Li re nne awohng ewahne bahke jeke, song kpiri nte ewe nlum atv, kehm-e tongo re, 'Mbi, bong-m abon abred na ara,

⁶ tibre nte ewame awohng eblong ba eljen go egame etahk. Ejum alehke ajehng ajehng n kpimm, ji m bahk-e kake.'

⁷ "Fono, nne no wob ekp'kpa bahke faange re, 'Ka ma kpe gbiinga, mbutahk li ta taa, abon ebame nong a name ga edilnonga, n nehm ma mehl ba ka-aa?"

⁸ "N kp-n tongo re, jol afi á tahmem ba ka-e tib eji á li nte ewe, á bahke tahme ba ka-e ana á kp'sebe tib go elgbiingi ni á kp-e gbiingi.*

* 11:8 11:8 Luk 18:1-8

⁹ “Owo wahnge n kp-n tongo re, wahn bahb, ń bahke bele. Seben, ń bahke nyehne. Kahden, bo bahke lennge mbu ka-n.

¹⁰ Tibre nne awohng awohng no l'bahb, á bahke bele. Nne no l'seb, á bahke nyehne. Nne no l'kahd, bo bahke lennge mbu ka-e.

¹¹ “Li re nne awohng ewahne li nde nne, mmon ewe l'bahb-e re á ka-e ebred, anv, á bahk-e kake eltala? Afi á l'bahb-e re á ka-e nsahre, á bahke bobo nnyo ka-e?

¹² Afi á l'bahb-e re á ka-e ejenkok, á bahk-e kake nnang?

¹³ Anv, wahn ji li na abi ane, ń l'mal ka abon ebahne nsol nyi nno, l'lim renan Nsoo no li go ejahbetul l'k'ka ane ba bahb-e no Etingi Etohko?”†

Jisos, a ntul a nnehm

(Mat 12:22-30; Mak 3:20-27)

¹⁴ Jisos kehm kame nne no jolo nkamme ebi etohko yehke. Eji ebi etohko jio ma lohng nne noo, nne noo kehm kehme elbungu. Owo kehm kpoko ellong ane bao esi.

¹⁵ Egom jindiki kehm kehme elbungu re, “Á kpo kam ane abi atohko yehke tib go nsahm nyi Belsebul ntul a nnehm ka-e no.”

¹⁶ Egom jehko jo sebe re bo gar-e. Owo bo kehm-e tongo re á tib elliingi ni bahke lohngo go ejahbetul Esowo.‡

¹⁷ Jisos k'kahn ntir atahng abo,§ owo á kehm tongo bo re, “Ejahbe ajehng ajehng ji l'yab, jol ebo

† 11:13 11:13 Mak 11:24 ‡ 11:16 11:16 Mak 8:11 § 11:17 11:17 Jon 2:25

ebo, bahke ranng'e na, aƒi fere jol nlaaga, nlaaga nyio bahke tane.

¹⁸ Anv, ejahbetul ji nnehm l'yab, ejahbetul eje bahke limi renan kehm yiimi? Tibre wahn kpo bung re, n kpo kam ane abi atohko yehke go nsahm nyi ntul a nnehm.

¹⁹ L'jol re n kpo kam ane abi atohko yehke go nsahm nyi ntul a nnehm, anv, nsahm anyi abon ebahne kpo ko, jo kam bo yehke? Owo wahnge bo bahke jolo ane ba bahk-n lame.

²⁰ "Wo, l'fere jol re n kp'kame ane abi atohko yehke go nsahm nyi Esowo, lohngo re etul bi Esowo bi ma badde ba tob-n.

²¹ Etahntahn nne l'fili ntahme go ebo, jo baabe etahk eje, ejum ajehng ajehng eje nehm ran esi.

²² Etahntahn nne ji tahne sehng-e l'ba, ba nok a ne, fere ga-e, á bahk-e taare ntahme enye nyi á kpo tir re, nyi nyi bahk-e kake ebo, fere kpu nsol enye tahm a nyi song bak.*

²³ "Nne no ki li ka me, ye nnekv ewame wo. Nne no tohk-m tob elkpuku bum edi ajehng, á kp'fare na faade.

Ana esabsab etohko kpo feere

(Mat 12:43-45)

²⁴ "Eji esabsab etohko ma lohng nne, á kpo song yannge go adi nya kp'waange,[†] jo seb edi ji á bahke reke ekv.[‡] Á tohko ting edi ajehng ajehng, á bahke bungu re, 'M bahke feere go egame etahk ji n tahme sa.'

* **11:22 11:22** Kol 2:15 † **11:24 11:24** Jon 7:38-39 ‡ **11:24 11:24** Mak 5:12

25 “Á l'feere ba, ba nyehn, etahk jio bo ma feenge, fere tuungu ejum ajehng ajehng bum go nseenge.

26 Owo á bahke feere song ko atohko nyako na asehma nya sabe sehng yefono. Bo feere ba lene o. Nne noo bahke kpe sab na sehng ana wuku wuku á jolo no.”§

Nnenkal no tehke Meri nnyehn Jisos

27 Eji Jisos ma bung ano, nnenkal awohng go ellong ane bao kehm bungu re, “Elfuulu li a nnenkal no jel-a no, fere yab-a.”

28 Jisos kehm faange re, “Elfuulu ga li ka ane ba wuku alum Esowo, fere jo lim.”*

Ana ane bahbe Jisos re á lim nkpokosi

(Mat 12:38-42)

29 Eji ellong ane jo kpe ba budu, Jisos kehm kehme elbungu re, “Ane ba li anv, abi ane ba. Bo kp'sebe re bo nyehn nkpokosi.† Nkpokosi anyehng anyehng limm, nyi bo bahke nyehne, sehngem nkpokosi ana nyi Jona nyi bo bahke nyehne.

30 Ana Jona jolo elliingi ka aneb Ninive, ano wo fvfo Mmon no nne bahke tob jol elliingi ka ane ba li anv.

31 “Go efung elam bio, ntul a nnenkal no Seba bahke mehle yiimi, ka ane ba li anv ebi. Tibre á lohngo nlaabambang ejahbe, ba goji Solomon re á ba wuk elkahne ene.‡ Wo anv, ejum jia, ji gbale sehng Solomon.§

§ 11:26 11:26 2 Pit 2:20; Jon 5:14 * 11:28 11:28 Luk 8:21

† 11:29 11:29 1 Kor 1:22 ‡ 11:31 11:31 Mat 8:11 § 11:31 11:31 Mak 1:7

32 “Go efung elam bio, anebe Ninive bahke mehle yiimi, ka ane ba li anv ebi. Tibre bo gb'gbo ndon go bo abiafem, eji bo wuku alum Esowo nya Jona bungu no. Nyehnen, a wo li ejum ji gbale sehng Jona.

Ellenng ni ngubjing

(Mat 5:15; 6:22-23)

33 “Nnene limm, no ma ny'nyaale et'rekahng, fere rod song behr, jol rod ejeere konngo. Á bahke rodo na, kunu go ejum ji bo kpo kunu et'rekahng, eji ane ba kp'yele eksp'kpa l'jo nyehn.

34 “Elmahr ena li ana et'rekahng ka ngubjing enya. Elmahr ena l'jol saang, ngubjing enya kpee bahke jolo ellenng.* Elmahr ena l'fere jol ab'bi, ngubjing enya kpee bahke gboko ejanng.†

35 “Jo kunu ekpu, eji ellenng ni wob-a go atahng l'k'fere gbo ejanng.‡

36 Ngubjing enya kpee l'jol ellenng, k'bel nkpohko anyehng anyehng nyi kpi ejanng, owo ngubjing enya bahke jolo ellenng ellenng kpee ana et'rekahng kp'yake tub-a.”§

Ana Jisos jo wa Bab Farisi eyuu

(Mat 23:1-36; Mak 12:38-40)

37 Eji Jisos kpi mbungu mbungu, nne a Farisi awohng kehm-e tongo re á song li nsol a ne. Owo á kehm yele eksp'kpa, song ji go eksp'kuru nsol alehke.*

* 11:34 11:34 Jon 1:47 † 11:34 11:34 Elt 8:21 ‡ 11:35 11:35 Ef 5:8-10 § 11:36 11:36 Jon 3:10-21; 8:12 * 11:37 11:37 Luk 7:36; 14:1

38 Nne a Farisi noo kehm-e kpoko esi, eji á nyehne re, Jisos ruum akidi, kehm kehme nsol li.†

39 Owo Ntul a Jisos kehm-e tongo re, “Wahn Farisis, n kpo ru njahm a nkob, a njahm ekpingi. Go atahng, ab'bi nya ma rur, a nsol ejv.‡

40 Wahn agboolo nya! Ye ji limi njahm elatahk sang tob lim atahnga?

41 Yaren akpak ka nsol nyi wob go egahne akob, a nkpingi, ejum ajehng ajehng ejahne bahke bare.§

42 “Eyuu a nahne, wahn Farisis! Wahn kpo ka eltahme go asahkesahke nsol ana nkambe, a alamaje, a anyane nyako kpee, fere jo gbake elam, a elgoro ni Esowo bum go nkpe. Limen nsol ebal ebal! Kana gbake ejum ajehng, bum go nkpe!

43 “Eyuu a nahne, wahn Farisis! Go egahne ekp'kpa ero, kpo kor-n re wahn jo ji go mbuksong. Go are, kpo kor-n re ane jo gong na, kak-n nnyo.*

44 “Eyuu a nahne! N li ana alahm nya bo kil nyehne, ane kp'kadde sehng, jol bo nehme kahn re, bobfere jol ane ba ki kpe li saang.”

45 Owo nt'tibi atahm na awohng kehm-e faange re, “Nt'tibi, alum nya a kp'bungu a, a kp-r suku nao!”

46 Jisos kehm bungu re, “Eyuu a nahne, wahn at'tibi ba atahm fvfo! N kpo si ane elsol ni nnen ni kpo riidi elsolo, jol wahnfono antahng, n kpehme tohko g'gare elmehle.

† 11:38 11:38 Mat 15:2 ‡ 11:39 11:39 Luk 17:20-21 § 11:41
11:41 Luk 19:8-9 * 11:43 11:43 Luk 20:46

⁴⁷ “Eyuu a nahne! Wahn ba li ane ba kake alahm nya anyehnamahr Esowo go nsement, ba babnso ejahne wulu no.

⁴⁸ Eji m ma lim ano, ebtib re, wahn ebtaame tv ji babnso ejahne limi no. Tibre bo ba wulu bo. Wahn ma rod alahm ebo kp'kake nsement.

⁴⁹ “Owo wahnge Elkahne ni Esowo bungu re, ‘M bahke tumu abanyehnamahr, fere tum abati- ingetib tv bo. Bandiki, bo bahke wulu bo. Bandiki, bo bahke nohko bo,’

⁵⁰ eji alung ma abanyehnamahr kpee ba bo wulu no, bomo ngare nyi njini bomo no l'tuunu ane ba li anv,[†]

⁵¹ bomo goji Ebel tete ba rehng goji Sekaraya ji bo wul-e go elka elka ni edi njom alimi, a etahk Esowo. Etingitingi, n kp-n tongo re, Ane ba li anv, Esowo bahke bo bahb bada nsol nya kpee.

⁵² “Eyuu a nahne, wahn at'tibi ba atahm? Wahn ba ma rod egbokoro jio ji etahk elkahne. Wahn- fono yelem. N kpo kpan ane ba jol yele.”

⁵³ Eji Jisos ma tahm edi jio, owo at'tibi ba atahm, a Bab Farisi kehm-e kehme alum jamme, fere jo bahb-e abahbe gbalee bada nsol tvv,

⁵⁴ fere jo baab-e go ege alum nnyo, eji bo l'bob- e.

12

*Ayist nya Bab Farisi
(Mat 10:26-27)*

¹ Eji ellong ane gbalee ma ba rur edi ajehng, bo ruru sehng, fere jo kadde atem go akpade, owo

[†] 11:50 11:50 Elt 7:52

Jisos kehm gboko mbang tong abat'toono ebe re,
 "Jo gberen ayist nyao nya Farisis, nya li alum abal
 abal.*

² Ejumjum limm, ji bo bulu no, ji bo l'klenge.
 Ejumjum limm, ji bo behre no, ji l'k'jol gbuul.

³ Ejum ajehng ajehng ji m bungu go ejanng,
 bo bahke wuku ngara njul. Ji m bungu aw'wa
 go nkimi, bo bahke kuumu go aro ntahk, tooro
 wahre wahre.

Nne awo fuumu re nne fahl-e

(Mat 10:28-31)

⁴ "Ate ebame wahn, n kp-n tongo re, Kana jo
 fahl ane ba kpo wul ngubjing, ba l'k'ma kpe lim
 ejumjum budu.

⁵ M bahk-n tibi nne no fuumu re wahn fahl-e.
 Jo fahlen ye jio ji kpi nsahm nyi á bahke ma ro
 nne kak ellulagun ngare nyi ngubjing ma kpo. N
 kp-n tongo re, ye wo nobo re wahn fahl-e.†

⁶ "Nne li ma gunu nruk elon go are, ka mpene
 ebal. Jol tvtv ona, abehng abehng limm, bi Esowo
 m-e yini.

⁷ Alv enyahne nya li go egahne esi, Esowo
 ebfange kpee.‡ Owo nobo re wahn k'jo fahl. Tibre
 wahn ba ga gbal sehng nruk, jol afi bo ruru
 renan.

Bada ntianse ayiimi ka Jisos go esamahr ane

(Mat 10:32-33; 12:32; 10:19-20)

⁸ "N kp-n tongo re, Nne awohng awohng no
 l'yiim-m ntianse go esamahr ane, Mmon no nne
 bahk-e tob yiimi ntianse go esamahr enjel nyi
 Esowo.

* 12:1 12:1 Mat 16:6,12 † 12:5 12:5 Ell 20:10 ‡ 12:7 12:7 Luk
 21:18

⁹ Nne no l'ten-m go esamahr ane, Mmon no nne bahke tob ten-e fvfo go esamahr enjel nyi Esowo.

¹⁰ Nne awohng awohng no l'bung ellum tob Mmon no nne, á bahke ma bel eltahmeká. § Nne no l'bung ebi tob Etingi Etohko, á nehm bel eltahmeká.*

¹¹ Bo l'ko-n, tahm a nahne go ntahk ero, afi jolo go esamahr atubesi, afi bo fere kak-n esub, kana jo tiiri bade ana m bahke faange, jol kana jo tiiri ana m bahke bungu.

¹² Tibre Etingi Etohko bahk-n tibi ngare nyio ji m bahke bungu."

Elgan ni li bade egboolo efange nne

¹³ Nne awohng go ellong ane bao kehm bungu tong Jisos re, "Nt'tibi, ba tong mmonannee, wahr baange nsol nyi e li elkv me!"

¹⁴ Owo Jisos kehm-e faange re, "Mbi, nnene limm, no tong-m re me n jo lam alam, fere jo bak-n nsol nyi m ma li elkv."†

¹⁵ Á kehm bungu tong bo ane kpee re, "Jo kunen ekpu, wahn jo gbere elnahne, eji n l'k'jo baare amahr enyahne go nsol ane re wahn jo bel na bel bel bel budu. Tibre nsol gbalee nyi nne kpi no sang li elkin ene."‡

¹⁶ Owo á kehm tubu bo elgan re, "Efange nne ajehng jolo gona, ji egbe eje sahb l'lak.

¹⁷ Á kehm bahbe elne re, 'Anv, m bahke limi renan? Ebuungu ejame gbalem, ji m bahke lake eblu ebame.'

§ 12:10 12:10 1 Jon 1:7-9 * 12:10 12:10 1 Jon 5:16-17; Jon 16:7-9

† 12:14 12:14 Jon 3:17 ‡ 12:15 12:15 1 Tim 6:9-10

¹⁸ Owo á kehm bungu re, ‘Ana wo m bahke limi. M bahke kpe nyange ebuungu ejame. Owo m bahke lake eblu ebame, a nsol nyehko gona kpee.

¹⁹ Owo m bahke kehm bungu tong elname re, Me n li efa sehng. M bahke jehke, re ekv, bel elkpin, jo li na li li li, fere jo wo, bel eyebatahng. Tibre me m bel nsol gbalee nyi bahk-m biingi go nnya tvv.’

²⁰ “Esowo kehm-e tongo re, ‘Wo egboolo jia, lela atv bo bahke bake, ba ko elkpin ena. Nsol nyi a ma kuuru bum elna, nne nondiki wo bahke ba ting ko.’§

²¹ “Ano wo tob li ka nne no l'kpu nsol afang luk elne, no ki gbo afang nya Esowo.”*

Esowo kp'kahne ji nne kp'sebe

(Mat 6:25-34)

²² Jisos kehm bungu tong abat'toono ebe re, “Ana wo wahnge n kp-n tongo re, wahn k'jo tiiri bada nsol alehke nyi m bahke jo li, a nsol nyi m bahke jo kak go egahna ngubjing.

²³ Elkpin ni ga gbal sehng nsol alehke. Ngubjing ga gbal sehng abomo.

²⁴ “Nyehnen nruk! Bo kpehme bahm. Bo kpehme kpa. Abuungu, bo kpimm, jol bo kpehme kak go ayake. Esowo bi kpo le bo. Anv, wahn sang ga gbal sehng nruka?

²⁵ Nne awo ewahne no bahke kpe ma budu abon nnya go ege elkpin, eji á kp'tiiri ana?

²⁶ Eji n l'k'ma lim mmons'sohko ejum ana noo, jen ji wahnge n kp'tiiri bada nsol nyehko?

§ 12:20 12:20 Hib 9:27 * 12:21 12:21 1 Tim 6:17-19

27 “Nyehnen ana at'tul nkpád kpo gbal go emahng! Bo kpehme nyenngé, lim eltum. Bo kpehme jamme nsol, kak elbo. Wo, n kp-n tongo re, jol Solomon go ege ellub, á liibem ana et'tuul ajehng go ellong at'tuul nyao.

28 Ana Esowo kpo liibi ajele nya li go emahng, nya kpo kpin lela lela, behna bo jahm fi, jen ji wahngé á l'ki-n tob liibi, wahn ji kp'kahn taame ntiil?

29 “Ano wo fvfo nobo re wahn k'jo sahb s'seb nsol nyi m bahke jo li, fere jo wo.† Kana jo tiiri!

30 Tibre ane baka baka ba ki nyi Esowo ba kpo lim ano. Nso ejahne kp'kahne re, n kp'sebe nsol nyia.

31 Ga nob re wahn gbo mbang seb etul bi Esowo. Nsol nyehko kpee á bahk-n budu.‡

Afang nya ejahbetul
(Mat 6:19-21)

32 “Kana kpe fahl, wahn mmoblong ejoro! Tibre koro Nso ejahne re wahn tob ji go eti etul eje.§

33 “Gungen nsol nyi n kpi no, wahn rod akpohko ka akpak.* Belen abon abam akpohko ba l'k'tiki kul, wahn fere gbo afang nya ejahbetul Esowo, nya l'ki-n mal go abo, nya li edi ji nwajv anyehng anyehng l'k'ma rehng, etan l'k'ma wo.

34 Tibre edi ji nsol afang enya li no, owo eltim ena bahke jolo.†

Alokeltum ba kp'siki nde ebo

† 12:29 12:29 1 Tim 6:6-9 ‡ 12:31 12:31 Kol 3:2 § 12:32 12:32
Luk 22:29-30 * 12:33 12:33 Luk 18:22 † 12:34 12:34 Fil 3:20

³⁵ “Tooben ebjing, wahn gbaange agbaange go egahne ebun!‡ Taben av at'rekahng enyahne wahre!§

³⁶ Jolen ana ane ba kp'siki nde ebo re á kehnge elkak elbal ba, eji á l'feere ba kahd, bo l'lenge ka-e.

³⁷ “Elfuulu li ka alokeltum ba l'k'lal ngare nyi nde ebo bahke bake.* Etingitingi, n kp-n tongo re, á bahke tongo bo re bo ji ekp'kuru nsol alehke. Á bahke gbaange egbaange eje, fere jo loko bo.

³⁸ Á li ma ba nlum atv. Á li ma ba nkpese efungfu.

“Elfuulu li ka alokeltum bao ba, á l'ba nyehn bo, bo ma toobo ebjing.

³⁹ Jia ji nobo re wahn kahn. Tibre nfontahk kahne kahn ngare nyi nwajv kp'bake, kehn á jol baabe etahk eje, k'taame nwajv lahm etahk eje yel.†

⁴⁰ “Wahn fvfo, tooben ebjing, tibre Mmon no nne bahke bake ngare nyi n kil tiri re á kp'bake.”

Nkakesehk a nlokeltum, a ebi nlokeltum
(Mat 24:45-51)

⁴¹ Pita kehm-e bahbe re, “Ntul, elgan nia, a tubu tong wahra, afi nne awohng awohng?”

⁴² Owo Ntul a Jisos kehm faange re, “Li ka ekahnkahn nlokeltum no kpi ekakesehk, no nde bahke yake alokeltum bako, kak go ege ebo re á jo le bo ngare.‡ Nne awo li elkohn nlokeltum ana noa?

‡ 12:35 12:35 1 Pit 1:13 § 12:35 12:35 Mat 25:1-13 * 12:37
12:37 Jon 14:3 † 12:39 12:39 1 Tes 5:2 ‡ 12:42 12:42 1 Pit 5:2-4;
Elt 20:28

⁴³ Eyebatahng bahke jolo a nlokeltum noo, no nde l'ba, á bahke ba kpir-e, á kp'limi ano.

⁴⁴ Etingitingi, n kp-n tongo re, á bahke yake nsol enye kpee kak-e go ebo. §

⁴⁵ “Nlokeltum noo l'fere bung go ege eltim re, ‘Nsoo eblaange elbake,’ á l'bom alokeltum bako go eldohko, fere jo li, jo wo, fere jo buumu,

⁴⁶ owo nde nlokeltum noo bahke bake efung bi á kil ekpu kunu re á bahke bake, ngare nyi á kil elkahne. Nde noo bahk-e boomo, kiimi akv akv akv, fere tuur-e eltuuru n'nehm ana ni á bahke tuuru ane ba ki taame tv-e.

⁴⁷ “Nlokeltum no kahne ji nde sebe re á lim, k'toobo ebjing, fere lim, bo bahk-e sahb d'dv.*

⁴⁸ “Nlokeltum no ki kahn ji nde sebe re á lim, á l'fere lim nsol nyi fuumu re bo dv-e, ye, bo we nehm ga dv.

“Nne awohng awohng no bo m-e ka nsol gbalee, bo bahke sebe nsol gbalee go ege abo.† Nne no bo ma yake nsol gbalee kak-e go ebo, ye wo, bo bahke koko gbalee go ege.‡

Jisos kpo lim ane yab
(Mat 10:34-36)

⁴⁹ “M ba re me m ba kono agun go njini. Kor-m kor re, kehn agun nyao bom ellulu. §

⁵⁰ Ewohngalahb jia, ji m bahke tohko bel, ji ji ma-m gba area. Bahke jolo anaana tete mal.*

§ 12:44 12:44 Mat 25:21 * 12:47 12:47 Jems 4:17; Jon 9:41

† 12:48 12:48 Ef 4:7 ‡ 12:48 12:48 Mat 25:20,22 § 12:49 12:49

Elt 2:3 * 12:50 12:50 Jon 12:27

51 Anv, n kp'tiri re, eji m ba njini nyia, n ko elkoono ba a nia? N kp-n tongo re, elkoono sang wahnge m ba no. M ba, eji ane l'yab.†

52 Bomo anv asongo ane alon l'jol nlaaga anyehng, abal bahke yabe jol ebo ebo, ane ara bako jol ebo ebo.

53 Nde nne bahke woomo njahm nyehko, mmon ewe woomo njahm nyehka. Nnyehn nne bahke woomo njahm nyehko, mmon ewe woomo njahm nyehka. Nnyehn nne bahke woomo njahm nyehko, nkal a mmon woomo njahm nyehka."

*Ana nne bahke kahne ngare
(Mat 16:2-3)*

54 Jisos kehm tob bung tong ellong ane bao re, "N l'nyehn ekparesemsem ma tahl go erede nfam kp'bake, n kpo bung tvtv re, 'Elahb yahke ba elnake.' Lohko na fvfo.

55 Nfeb l'kehme ellimi nyi lohng go elka emahng, n kpo bung re, 'Ewanng yahke ba.' Lohko ba fvfo.

56 "Wahn aneb alum abal abal ba! N kpo mal seenge elbung abola ndi, fere kahn ana ji bahke jolo. Jen ji wahnge n l'k'ma kahn ngare nyi li anv?‡

57 "Jen ji wahnge wahnfono antahng kil ebtiki kahn ji kp'nobo?

58 Nnekv ewa l'fere ko-a, tahm a na go esub, nok, eji a l'toobo a ne ngare nyi n kpeke li go mbang, eji a l'ki-a tohng, tahm a na goji

† 12:51 12:51 Rom 12:18; Jon 7:43; 9:16 ‡ 12:56 12:56 Luk 19:42,44; Elt 17:30; 1 Tes 5:1; 1 Jon 2:18

nlamalam, nlamalam faak-a, kak mbehresi go ebo, mbehresi ko-a song kak ngbekobo.

⁵⁹ N kpa tongo re, a nehm tiki lohng ona, tete a gohro gal mbong enya kpee mal, jol ederi ajehng ajehng nehm sa.”§

13

Yaangen mbang enyahne

¹ Ngare nyio ane jolo o, ba tongo Jisos bade ana Paillet wulu aneb Galili, eji bo jo lim njom ka Esowo.

² Owo Jisos kehm faange bo re, “Anv, n kp'tiri re, anebe Galili bao ba ga jol aneb abiafem sehng anebe Galili bako kpeea, tib eji bo nyehne erem bioa?*

³ E'ee! N kp-n tongo re, n tohko yaange mbang enyahne, n bahke tob kpo kpee ana ane bao.†

⁴ “Anv, elku ane ara ba kpo go Siloam, eji enyong gbo bulu bo mee? Anv, n kp'tiri re, bo ba ga jol abi ane sehng ane bako kpee ba lene go Jerusalema?

⁵ E'ee! N kp-n tongo re, n tohko yaange mbang enyahne, n bahke tob kpo kpee ana ane bao.”

Elgan ni li bade eti ji ki kab akab

⁶ Jisos kehm tubu bo elgan nia re, “Nne awohng bele eti ji bo kpo lung re efig go ege etahngga. Á kehm bake ba seb akab. Á tingem nkab anyehng anyehng.‡

§ 12:59 12:59 Mat 5:25-26; 18:34; 2 Tes 1:9 * 13:2 13:2 Mat 10:28; Jon 9:2 † 13:3 13:3 Jon 5:14 ‡ 13:6 13:6 Mat 21:19

⁷ Owo á kehm tongo nne no jo lim eltum go etahngga jio re, 'Nyehnee, nnya era nyia, nyi n kpo ba, ba kpur akab go eti jia, jol n ka tiki bel. Gbahk eti jia tub, tibre yim na yim a mbol mbol.'

⁸ "Owo á kehm-e faange re, 'Nsoo, nong tohko kpe jol elya nia ni ni. M bahke kpake kpee sennge, fere kak akpake elu, a ajele.Š

⁹ Owo e bahke nyehne, joare bahke kabe akab. Tohko fere kab, wo kehm gbahke tub.' »*

Ana Jisos limi nnenkal, á nob efung Esabat

¹⁰ Efung Esabat abehng Jisos jo tibi go etahk ero ajehng.

¹¹ Nnenkal awohng jolo o, no bele ebi etohko ji bum-e eyam, bi ma kang elku a nnya era. Nnenkal noo fehde na fehd, á joom kpe ma tanne etannetanne.

¹² Eji Jisos nyehn-e no, á kehm-e lungu tv elne, kehm-e tongo re, "Nnenkal, ngubjing enya ebfanngel!"

¹³ Jisos kehm-e kunu abo, nnenkal noo soro tanne tvtv, fere jo tehk Esowo.

¹⁴ Ntubesi etahk ero noo, atahng kehm-e rake, tib eji Jisos ma lim nne, á ma nob efung Esabat. Á kehm kehme ane tong re, "Li nfung erakera nyi ane bahke jo lim eltum. Jo baan afung nyao, wahn jo ba nob ayam enyahne, go efung Esabat sang."

¹⁵ Owo Ntul a Jisos kehm-e faange re, "Wahn aneb alum abal abal ba! Wahn ane kpee, wahn sang kpo fanngge efong ebahne, a ebvankang

Š 13:8 13:8 2 Pit 3:9 * 13:9 13:9 Luk 21:24; Rom 11:25; Mat 24:32

ebahne go ntahk nyi bo kpo wooma, tahm a bo go alahb efung Esabata?†

¹⁶ Nyehnen nnenkal noa no li mmon no Ebraham, no nnehm gba-e no go elku a nnya era. Nobem re á for go eyam bia efung Esabata?”‡

¹⁷ Alum nya Jisos faange no kehm riki anebekv ebe ndon, bo ane kpee.

Wo, ellong ane bako kpee jo bele na eyebatahng tib go agburu nsol nya á ma lim.

Elgan ni li bada mmohk asia

(Mat 13:31-32; Mak 4:30-32)

¹⁸ Owo Jisos kehm bungu re, “Any, etul bi Esowo li renan? M bahke koko gara jen?

¹⁹ Li ana mmohk asia nyi nne rodo, song bahm go ege etahngga. Kehm gbale egburu elrahn. § Nruk kehm bake, ba si ntahk ebo ona.”*

Elgan ni li bade ayist

(Mat 13:33)

²⁰ Jisos kehm kpe bung re, “Any, m bahke koko etul bi Esowo gara jen?

²¹ Li ana ayist,† nya nnenkal ko song behr go ebam aflawa na ebra, tete semme kpee,‡ fere tung.”

Nfidifiida mbutahk

(Mat 7:13-14,21-23)

²² Eji Jisos jo tahm go Jeusalem, á jo sehngge go ajahbe ajahbe, fere jo tib ane.

† 13:15 13:15 Luk 14:5 ‡ 13:16 13:16 Mak 3:4; Kol 2:16 § 13:19
 13:19 Jon 12:24 * 13:19 13:19 Mat 13:4; Elt 20:29-30 † 13:21
 13:21 Mat 16:6,12 ‡ 13:21 13:21 Ell 2:18-3:6

23 Nne awohng kehm-e bahbe re, “Nsoo, anv, abon amohk ane abik abik ba bahke bele eltahra?”

Owo Jisos kehm faange bo re,

24 “Jo noken, eji *ń* l'sehng go nfidifiida mbu-tahk.§ Tibre n kp-n tongo re, ane gbalee bahke gare re bo sehng yel, bo nehm ma sehng.

25 “Nfontahk l'si m'mehl, bam mbu, *ń* bahke yiimi go mbutahk, jo kahd, fere jo bung re, ‘Nsoo, lenng-r mbu!’ Owo á bahk-n kehm faange re, ‘N nehme kahn edi ji *ń* lohng no ba.’*
 26 “Owo *ń* bahke kehme elbundu re, ‘E jo li nsol a na, fere jo wo. A jo tibi go egahre ejahbe.’†

27 “Á bahke bungu re, ‘N kp-n tongo re, N nehme kan edi ji *ń* lohng no ba. Wahn abi ane baa, tahm-m wahn go esamahr!’

28 “Go elatahk wo *ń* bahke jo ling, fere jo kono amahn go esi, *ń* l'nyehn Ebrahim, Aisik, Jakob, a abanyehnamahr kpee go ejahbetul Esowo, wahnfono antahng fere sa elatahk.‡

29 Ane bahke lohngo go ejang njini abehng abehng ba ji, jo li nsol go ejahbetul Esowo.

30 “Egom jindiki ji kahle njahm bahke fere gbo mbang. Egom jindiki ji gbo mbang fere kahle njahm.”§

*Ana Jeusalem jo kor Jisos
(Mat 23:37-39)*

§ 13:24 13:24 Fil 3:12; Jon 10:7 * 13:25 13:25 Mat 25:11-12

† 13:26 13:26 Mat 24:39 ‡ 13:28 13:28 Mat 8:11-12 § 13:30 13:30 Rom 11:25-26

³¹ Ngare ny'nehm ona aneb Farisi bandiki kehm ba kpiri Jisos, kehm-e tongo re, "Lohng a, song! Tibre Herod kp'sebe re á wul-a."*

³² Owo Jisos kehm faange bo re, "Songen, wahn song tong ekpangang jio re, 'N kp'kame ane abi atohko yehke, fere lim ane, bo nob ayam ebo. N kp'limi lela, lim behna, l'biingi nfung era, n gohro lim mal.'†

³³ M bahke tahme eljen ename asongo lela tete rehng behna, a etoono efung behko. Tibre nnyehnamahr, bo bahk-e tiki wul go Jeusalem, edi jindiki sang.‡

³⁴ "Wahn Jeusalem, n kpo wul abanyehnamahr, fere tuubu ane ba Esowo tumu tv-n atal. Nkpel tvv n jo gare re me n lung-n tv elname ana nkok abon kpo lung abon ebe, fere walle bo. Wahn korem elbake!

³⁵ "Anv, etahk ejahne bahke sake nehme nehme.§ Etingitingi, n kp-n tongo re, me n nehme kpe tiki nyehn tete m bung re, 'Elfuulu li a nne no kp'bake go mbing nyi Ntul.' "

14

Ana Jisos limi nne eyam, á nob

¹ Efung Esabat abehng Jisos kehm tahme song li nsol go etahk ntubesi a nne a Farisi awohng. Owo bo jo baab-e.

² Nne awohng no gbo eyam ebyeenge kehm bake goji Jisos.

* **13:31 13:31** Mak 3:6; Luk 12:1 † **13:32 13:32** Jon 17:4; 2 Tim 4:7 ‡ **13:33 13:33** 1 Tes 2:14-15 § **13:35 13:35** Luk 21:20-24

³ Owo Jisos kehm bahbe at'tibi ba atahm, a Bab Farisi re, “Anv, ntahm enyahre t'taame re nne jo lim ane, bo nob efung Esabata, afi?”*

⁴ Bo kehm belle.

Owo Jisos kehm rodo nne eyam noo, lim-e, á nob, fere yak-e, á song.

⁵ Jisos kehm tongo bo re, “Anv, nne awo ewahne no mmon ewe, afi nfong enye bahke gboko yel elbing alahb ni kp'rahbe, á k'song yehk-e efung Esabata?”†

⁶ Jol bo we maam faange ejumjum.

Alum nya Jisos bungu tong ane ba bo tob tiingi bo elkak

⁷ Jisos nyehne kan ana ane ba bo tob tiingi bo elkak fvfo ma song yehke adi nji nya li wahre wahre,‡ owo á kehm tubu bo elgan re,

⁸ “Nne l'tiing-a elkak elbal, ka song ji edi nji ji li wahre wahre. Fundiki nne no ga gbal sehng wo, nfono elkak t'tob tiing-e fvfo.

⁹ L'jol ano, nne no tiingi wahn ane abal abal bahke bake, ba tong-a re, ‘Tahm ka nne noa, á ji!’ Ndon bahk-a kehme elfili re wo fere song ji go nredereda nji.

¹⁰ “Bo l'tiing-a elkak, song ji go nredereda nji, eji nfono elkak l'ba, á bahke ba tong-a re, ‘Mbi, mehl, wo ba ji ga nwahrewahra nji.’ Owo a bahke bele ellub go esamahr ane kpee ba jehk a na go ekp'kuru jio.

* **14:3 14:3** Mak 3:4; Gal 5:22-23 † **14:5 14:5** Mat 12:11; Luk 13:15 ‡ **14:7 14:7** Mat 23:6

11 “Tibre nne awohng awohng no l'rod elne bum wahre wahre, bo bahk-e rede na. Nne no l'rede elne, bo bahk-e rodo, bum wahre wahre.”§

Alum nya Jisos tongo nne no tiing-e no

12 Owo Jisos kehm tob bung a nne no tiing-e no re, “A l'tiingi ane re bo ba li nsol, afi jolo elkak, ka jo tiingi ate eba, jol abonane, jol nnaahb enya, a aneb nkontahk eba ba li afang ane. Tibre bo fvfo bo bahk-a tob tiingi. A l'lim ano, wobbel eltuuru ena tvtv go ejum ji a limi no.

13 Ga nob re a l'tiingi ane elkak, wo jo tiingi akpak, a abanne, a awakamahr.

14 A bahke bele elfuulu, tibre bo nehm ma tob lim ka-a.* Esowo bi bahke limi ka-a efung bio bi atingi ane bahke nyahme go elkv.”†

Elgan ni li bade egburu elkak

(Mat 22:1-10)

15 Eji nne awohng no woomo go ellong ane ba tob ji ekp'kuru jio a Jisos wuku ano, owo á kehm-e tongo re,

“Elfuulu li ka nne no bahke lehke nsol go ejahbetul Esowo.”‡

16 Jisos kehm-e faange re, “Nne awohng jolo go, no limi egburu elkak, tiingi ane gbalee.

17 Eji afung elkak ma rehng, á kehm tumu nlokeltum ewe re á song tong ane ba á tiingi bo re bo ba.§ Tibre bobtoobo ejum ajehng ajehng bum.

18 “Bo ane kpee kehm kehme ellaange kunu go nsol. Ngbokambang a nne kehm tongo nlokeltum

§ 14:11 14:11 Luk 18:14; Fil 2:8-9 * 14:14 14:14 Luk 6:34-35

† 14:14 14:14 Jon 5:29 ‡ 14:15 14:15 Ell 22:2 § 14:17 14:17 Jon 6:36; 7:37

noo re, 'N gunu nfong ewubu, n yahke tahm song wuungu bo. Lub wuk ana n kp-a gboongo titi.'

¹⁹ Owo nne noko kehm kpe bung re, 'N gunu edi egbe. M bahke tahme song nyehn. Lub wuk ana n kp-a gboongo titi.'

²⁰ Nne noko kehm tob kpe bung re, 'Me n ko nkal, owo wahnge n l'k'ma ba.'*

²¹ "Nlokeltum noo kehm feere song tong nde.

"Nfono elkak noo, atahng kehm-e rake. Á kehm tongo nlokeltum ewe re, 'Foomo song go afak ejahbe, wo song ko akpak, fere ko abanne, a awakamahr ba a bo.'†

²² "Eji nlokeltum noo je feere, á kehm ba tong nde re, 'Nsoo, ana a bungu no, me n lim. Eyake jia, kpeke li, ji ane bahke kpe ji.'

²³ "Nde kehm tongo nlokeltum noo re, 'Song go abang ebud, a abang ekulugbe, wo jo fanne ane, eji bo l'ba, ba yel, ane l'rur go egame ekp'kpa.'

²⁴ Tibre n kp-n tongo re, Nne awohng awohng go ellong ane ba bo tiingi bo nehm tiki li elkak ename."‡

Nne awo li etingitingi nt'toona Jisos?

(Mat 10:37-38)

²⁵ Ellong ane gbalee jo jene a Jisos. Owo á kehm keebe, kehm tongo bo re,

²⁶ "Nne awohng awohng no l'ba go egame, á nehm ma jol nt'toona ewame, tohko jol re á ko nde ekv, a nnyehn, a nkal ewe, a abon ebe, a abonanyehn, a elkpín ene fvfo.

* **14:20 14:20** Mak 4:19 † **14:21 14:21** Ef 2:11-12 ‡ **14:24 14:24**
Luk 13:28

27 Nne no tohko sol ekros eje, tahm toon-m, á nehm ma jol nt'toono ewame.

28 Nne awohng ewahne l'seb re á si enyong, á bahke tohko gbo mbang ji, gabe ana bahk-e kimi ekun, joare akpohko enye bahk-e biingi, á si kpee mal.

29 Á tohko lim ano, fundiki á bahke bumu nnahb ekahme nyi nyi, á nehm kpe ma soro asi. Ane kpee ba l'nyehn, bo bahk-e kehme elnyoko re,

30 'Nne noa ana bomo etahk go elsehke, á kpeem ma gohro si mal.'§

31 "Ntul no kpi nsoja atahltahl nkpel eltahl, no yahke tahm re á song nok ebta a ntul noko no kp'bake re á ba nok a ne, no kpi nsoja atahltahl nkpel atahl abal, á bahke tohko gbo mbang ji kpee, toobo, joare á li ma yiimi, nok a ntul noko.*

32 Joare á nehm ma yiimi a ne, á bahke tumu ane tv ntul noko, eji á kpeke li go fee re bo song bahb-e ji á bahk-e kake, bo kehm koono.†

33 "Ano wo fvfo, nne awohng awohng ewahne no tohko yake ejum ajehng ajehng ji á kpi no, á l'k'ma jol nt'toono ewame.

34 "Akanh kp'yebe. Elyebe akanh l'lohng, a bahke limi renan, akanh kehm kpe yebe?‡

35 Jol nehm nob ka ndi, jol nehm nob re nne ko kak go abangenahb nti. Ane kpo sale na elkohn akanh nio wohng go. Nne no kpi atung, nong, á wuk."

§ 14:30 14:30 Mat 13:20-21; 10:22; 1 Kor 1:8 * 14:31 14:31 Ell 2:16; 19:11-16 † 14:32 14:32 Hib 3:13; Mat 5:25 ‡ 14:34 14:34 Mat 5:13; Mak 9:50

15

Njoro nyi tane no

(Mat 18:12-14)

¹ Abakokatak, a aneb abiafem jo jeere kohlo Jisos, eji bo l'jo wuk-e.

² Bab Farisi, a at'tibi ba atahm jo memme re, "Nne noa kpo ko aneb abiafem, fere jo li nsol a bo."*

³ Owo wahnge Jisos kehm tubu bo elgan re,

⁴ "Anv, nne ewahne awohng l'bel ejoro atahl alon, anyehng l'tan, á nehm tahm ejoro behko sa go elka emahng, song seb nyi tane no tete á nyehn-ea?†

⁵ Á l'nyehn-e, á bahk-e rodo, kunu go ebahk, fere jo geere.

⁶ "Á l'ba rehng etahk, á bahke lungu ate ebe, a aneb nkontahk ebe, fere tong bo re, 'Tob-m wahn elgeere, tibre me n nyehn njoro enyame nyi tane no.'

⁷ "N kp-n tongo re, Eyebatahng bahke ga gbal go ejahbetul Esowo, nne abiafem awohng l'gbo ndon,‡ sehng atingitingi ane gbalee ba kil sebe re bo gbo ndon.§

Nsiring nyi tane no

⁸ "Li re nnenkal kpi nsiring ewubu, anyehng kehm ba tan-e, anv, á nehm nyaale et'rekahng, fere feenge ekp'kpa, jo seb bem bem bem tete á nyehna?*

* 15:2 15:2 Luk 5:30-32 † 15:4 15:4 Luk 19:10 ‡ 15:7 15:7 Luk 19:8 § 15:7 15:7 Mat 3:9; 21:32 * 15:8 15:8 Luk 19:10; Ell 3:1-2; Hib 3:13

9 “Á l'nyehn, á bahke lungu ate ebe, a aneb nkontahke ebe, tong bo re, ‘Ba tob-m wahn elgeere, tibre me n fere nyehn nsiring nyi tan-m no.’

10 “N kp-n tongo re, Ano wo fvfo enjel nyi Esowo kpo bel eyebatahng, nne abiafem awohng l'gbo ndon.”†

Mmon elwur

11 Owo Jisos kehm bungu re, “Nne awohng jolo go, no bele abon ba nlum na abal.

12 Nkalla kehm tongo nde re, ‘Nsoo, ka-m ejang nsol nyi bahke jolo ny'nyame.’ Owo nde noo kehm bake abon ebe na abal nsol enye.

13 “Gaam kang, mmonkalla noo kehm kpuku nsol kpee nyi á bele no, tahm go nlaabambang ejahbe.‡ Owo á song li akpohko enye go mbang elwur kpee mal.§

14 Eji á ma fad akpohko enye kpee mal, owo njal kehm bake go ejahbe jio, jol nyi nse sang. Á kehm sake abo abo.

15 “Á kehm tahme, song wu laake nfono ejahbe awohng. Á kehm-e tumu re á song, jo song baabe akuk.*

16 Jol-e koro re, á jo li nsol nyi akuk kpo li. Jol nnene jolem no jo ka-e.†

17 “Eji á ma fere gbo ntir, owo á kehm bungu re, ‘Ane kpee ba nsoo kpo lak bo eltum, bo kpi nsol alehke gbalee, jol sehng ana nyi bo kp'sebe. Wo, me n jehk ana, kp'kpoko njal.

† 15:10 15:10 Ef 3:10 ‡ 15:13 15:13 Jon 21:18 § 15:13 15:13 1 Kor 6:19 * 15:15 15:15 Rom 6:20-21 † 15:16 15:16 1 Pit 2:2

18 M bahke tahme, song kpiri nsoo, fere tong-e re, Nsoo, me n lim abiafem bade Esowo, fere tob lim bada na.‡

19 Me n kpeem fuumu re bo jo lung-m re mmon ewa. Tob lak-m, me n tob jol nlimeltum ewa.'

20 "Owo á kehm mehle, feere goji nde. Jol á gaam kabbe go etahk nde, nde kehm-e nyehne. Ndon kehm-e fili, á kehm beke, song bing-e, fere sod-e nnyo.

21 "Owo mmon noo kehm-e tongo re, 'Nsoo, me n lim abiafem bade Esowo, fere lim bada na. N kpeem fuumu re bo jo lung-m re mmon ewa.'

22 "Nde kehm lungu alokeltum ebe, kehm tongo bo re, 'Song koon ekpawobo ji nno a nno ba a ji, wahn ba kak-e. Tob kaken ye ebil go ebo, wahn fere kak-e akpaketa go akpade.

23 Song koon mmon a nfong no sahb j'jok, wahn ba wul, wahr limen elkak, fere bel eyebatahng.§

24 Tibre mmon ewame noa kp'kpo, wo anv, yebfere jol go elkpín.* Á t'tan. Anv a, m m-e nyehn.'

"Owo bo kehm soro bom elkak nio go ellimi.

25 "Ngbokambang a mmon jolo go egbe. Eji á jo kehngé abake, ba kabbe go nkpe etahk, á kehm wuku ase nya bo jo kub, fere jo bahn.

26 Á kehm lungu nlokeltum awohng, kehm-e bahbe re, 'Ase nyao lohngo rejen?'

27 "Owo á kehm-e faange re, 'Mmonanne wo ma feere kehngé. Nso ma wul mmon a nfong no

‡ 15:18 15:18 2 Kor 7:10 § 15:23 15:23 Ef 3:20 * 15:24 15:24 Ef 2:4-5

joko jok. Tibre yebfere bel mmon ewe nob nob. Ejumjum we limem.'

²⁸ "Eji á ma wuk ano, atahng kehm-e rake. Á kehm tene elyele go ekp'kpa.†

"Owo nde kehm lohngo ba gboong-e.

²⁹ "Á kehm faange nde re, 'Nnya tvv nyi m ma-a loko. Ngare anyehng anyehng n kpo lim ajehng ajehng ji a tong-m no. Jol me, a ka k'ka mbul re me n ko lim elkak ka ate ebame.

³⁰ Wo anv, eji mmon ewa noa ma ba, no ma ranng akpohko enya eji á jo noongo abajenas'sa, ye wo, a ma wul mmon a nfong no joko jok ka-e.'

³¹ "Owo nde kehm-e faange re, 'Mmon ewame, wo li a name ngare anyehng anyehng. Nsol kpee nyi li ny'nyame, tob li ny'nya fvfo.

³² F'fuumu re wahr lim elkak, fere bel eye-batahng. Tibre mmonanne noa kp'kpo, anv, yebfere jol go elkpín. Á t'tan, anv a, m m-e nyehn.'

16

Nkimfahnga nlokeltum

¹ Jisos kehm kpe bung tong abat'toono ebe re, "Efange nne ajehng jolo gona, ji bele nlokeltum. Ane kehm song tong-e re, nlokeltum noo kp'fade akpohko enye.

² "Owo nde noo kehm-e lungu, kehm-e bahbe re, 'Jen ji wahnge n kp'wuku nsol ana nyia bada na? Ko awer ba a nya, nya a kpo nyon nsol enyame nyi n yake kak-a go ebo. Tibre a nehm kpe tiki jol nlokeltum ewame.'

† 15:28 15:28 Luk 15:2

³ “Owo nlokeltum noo kehm bungu go ege eltim re, ‘Anv, m bahke limi renan, eji nsoo yahk-m yehke go egame eltum? Eko n gaam kpi, ji m bahke jo bahm egbe. Ndon kp-m fili re me n jo gboongo na nsol.

⁴ Anv, me n kahn ji m bahke limi, eji n l'bel ane ba bahk-m koko, n lene tob bo ngare nyi nsoo ma-m yehke go eltum.’

⁵ “Owo á kehm lungu ane kpee, ba bele nde abong, kehm tongo ngbokambang re, ‘A kpi nsoo mbong rejen?’

⁶ Á kehm faange re, ‘Nsang akehng atahl alon.’ Nlokeltum noo kehm-e tongo re, ‘Rod nwer a mbong enya, wo ji elwaare, nyon nsang atahl abal a nsang ewubu.’

⁷ “Owo á kehm bahbe noko re, ‘Anv, wo, mbong enya li rejen?’ Á kehm-e faange re, ‘Ebam nkohl atahl alon.’ Nlokeltum noo kehm-e tongo re, ‘Rod nwer a mbong enya, wo nyon ebam atahl ani.’

⁸ “Owo nde kehm tehke nkimfahnga nlokeltum ewe noo, tib go elwake ni á ma wake. Tibre abon ba njini nyia ba kp'gaka wake go bo a ntum sehngé abon ba ellenngé.*

⁹ “N kp-n tongo re, Roden afang nya ki li nyanyahne, wahn ko lim etem, eji afang l'mal, bo l'ko-n kak go ntahk nyi li go njinanjini.†

¹⁰ Nne no l'bel ekakesehk go mmojum no nse, á tob kpi ekakesehk go egburu ejum. Nne no kil ma lim mmojum no nse go etingitingi, á kpehme ma tob lim egburu ejum go etingitingi.

* **16:8 16:8** Ef 5:15-17 † **16:9 16:9** Luk 14:14; Mat 6:20; 19:21

11 “Eji n̄ ki ma lim nsol nyi njini nyia go ekake-sehk, bahke limi renan, bo kehm yake atingitingi afang kak-n go egahne abo?

12 Eji n̄ ki bel ekakesehk go nsol nyi ki li ny'nyahne, nne awo me, no bahk-n kake ji bahke jolo j'jahne?‡

13 “Nlokeltum awohng awohng limm, no bahke ma loko nde na ebal. Noko, á bahk-e koko ekv, noko jo kor-e. Tohko jol ano á bahke lake nde noko, fere jo daange noko. N̄ nehm ma loko Esowo, fere jo loko akpohko.”

*Ajoobo alum nya Jisos bungu no
(Mat 11:12-13; 5:31-32; Mak 10:11-12)*

14 Eji Bab Farisi wuku nsol nyio, bo kehm-e kehme elnyoko, tibre akpohko jo koro bo sehng.§

15 Owo Jisos kehm tongo bo re, “Wahn li ane ba kpo tib elnahne go esamahr ane re, wahn li atingitingi ane. Wo, Esowo kp'kahne ntim enyahne. Tibre nsol nyi ane kpo tehk, nyi nyi li nsol eltehb go esamahr Esowo.*

16 “Atahm nya Moses, a alum nya abanyehnamahr nyono no jolo ka ngare nyio nyi mahne mahne tete ba rehng ngare nyi Jon ji nwohngalahb. Bomo ngare nyio, owo bo kehme eltiingi nnoobo etib bi li bade etul bi Esowo. Nne awohng awohng no l'lim go nsahm, á bahke ma kuumu.†

‡ 16:12 16:12 Luk 19:16-17 § 16:14 16:14 Mat 23:14 * 16:15 16:15 1 Kor 1:27-29 † 16:16 16:16 Mat 15:21-28; Luk 18:3-8

17 “Elbung abola ndi tohkem r'riidi re tan. Jol nr'rohka ntahm anyehng anyehng nehm tiki range.‡

18 “Nne awohng awohng no l'ten nkal ewe, fere ko noko, yeblim erehbe. Nne no l'baange nnenkal no nlum ewe m-e yehke elbal, eblim erehbe.”

Efange nne, a Lasaros

19 “Efange nne ajehng jolo gona, ji jo liibi nsol nyi jo sahb k'kim ekun, fere jo lim egburu elkak efung abehng abehng.

20 “Nne awohng tob jolo ona, no bo jo lung-e re Lasaros, ji jolo nkpak. Ngubjing enye jolo alok alok. Á jo kono eljehke go mbutahk efange nne jio.

21 Á jo sebe re á jo kpiimi akahb elang li, nya jo fooro eksp'kuru efange nne jio gbo, eji á l'wohngo. Ebv jo lohngo ba lahb-e alok.

22 Toono o nkpak nyio ba kpo. Babenjel kehm ba sol-e, song bum-e, á ji kohlo Ebrahim.

“Efange nne jio kehm tob kpo. Bo kpa-e kak.

23 Eji á woomo go ellulagun, jo nyehn erem, á kehm tabe esamahr ebe, kehm nyehne Ebrahim go fee, fere nyehn Lasaros jehk kohl-e.§

24 Owo á kehm rabe re, ‘Nso Ebrahim, nong, me n fil-a ndon! Lub tum Lasaros, á song behde ebnyohkobo ebe go alahb, ba behd-m go ebliki, eji ebliki ebame l'lub naang-m. Tibre n kp'nyehne erem sehng go agun nyaa.’*

‡ 16:17 16:17 Mak 13:31 § 16:23 16:23 Mat 25:42,45-46; Hib 9:27

* 16:24 16:24 Ell 20:10; 21:8

25 “Owo Ebrahim kehm-e faange re, ‘Mmon ewame, buumu re, ngare nyi a jolo go elkpin, a bele anoobo nsol, Lasaros bele asabsab nsol. Wo anv, bo m-e kak eltim, wo noa, kpi erem nyehn.

26 Wo gana, elka elka ni wahr a nahne, egburu edamme jia, ji nnene l'k'ma sehng ga egahre, ba rehng go egahne, fvfo ji nnene l'k'tob ma sehng go egahne, ba rehng ga egahre.’

27 “Owo efange nne jio kehm bungu re, ‘Nsoo, n kp-a gboongo re, wo lub tum Lasaros tv go etahk nsoo,

28 eji á l'song rehke abonanee. Tibre n kpi abonanee na alon, tohko jol ano, bo bahke tob ba, ba nyehn erem ebnohko edi jia.’

29 “Owo Ebrahim kehm faange re, ‘Bo kpi awer nya Moses, a nya abanyehnamahr, nong, bo jo wuk.’†

30 “Efange nne jio kehm tene re, ‘E'ee nso Ebrahim, nne l'lohng akvne, fere song kpiri bo, bo bahke gboko ndon.’

31 “Ebrahim kehm-e tongo re, ‘Bo tohko fere wuk alum nya Moses, a nya anyehnamahr, afi nne nyahme na go elkv, bo nehm taame.’”‡

17

Bade abiafem

(*Mat 18:6-7,21-22; Mak 9:42*)

1 Jisos kehm bungu tong abat'toono ebe re, “Nsol nyi kpo lim nne gbo yel abiafem bahke tiki ba. Eyyu a nne no bahke wahnge re ba!

† 16:29 16:29 Jon 5:46 ‡ 16:31 16:31 Jon 11:44-46; Mat 28:11-14

² Ga nob re bo kahn-e eltal go emel, tub-e kak alahb, sehngre re á lim mmonse awohng go ellong abonse baa, á gbo yel abiafem.*

³ “Jo gberen elnahne!

“Mmonanne l'lim abiafem, jo rehke-e. Á l'gbo ndon, tahm ka-e.†

⁴ Á l'sood-a nkpel esehma efung abehng, fere ba gboong-a nkpel esehma re, ‘Ndon ma-m fili!’ tahm ka-e.”

Bade eltaame

⁵ Owo abatiingetib kehm tongo Ntul a Jisos re, “Lim eltaame enahre gbal!”‡

⁶ Ntul a Jisos kehm faange bo re, “Li re n kpi eltaame ni se ana mmohk asia, kehn n li ma bung tong etaamenti bia re, ‘Mehl, wo song yiimi go aya!’ kehn bahk-n wuku.§

Ji li ka nlokeltum re á lim

⁷ “Li re nne awohng ewahne kpi nlokeltum no kpo bahm egbe, tohko jol ano á kpo baabe ebul. Á l'kehngre egbe ba, nde kpo tong-e tong rea, ‘Ba elwaare, wo ba ji ekp'kuru li nsola?’

⁸ “E'ee! Á bahk-e tongo na re, ‘Song lam nsol kam, wo fere toobo ebjing bi a bahk-m loko ngare nyi n kpi nsol li. N l'li mal, wo kehm tob li.’

⁹ “Anv, á bahke kake nlokeltum ewe nnyo go nsol nyi á tong-e re á lima?

* 17:2 17:2 Mak 14:21 † 17:3 17:3 Mat 18:15-17 ‡ 17:5 17:5
Mat 8:10; 15:28 § 17:6 17:6 1 Jon 5:4

10 “Wahn fvfo, á l'lim nsol kpee nyi bo tong-n re wahn lim, jo bungen re, ‘Wahr alokeltum baka baka ba. Wahr eblim ji li ka-r re wahr lim.’ ”*

Ana Jisos limi aneb abili na awubu, bo nob

11 Eji Jisos je go Jeusalem, á sehnge go Samaria, a Galili.†

12 Eji á rehnge go ejahbe ajehng, aneb abili na awubu kehm ba wan-e. Bo yiimi go fee,

13 kehm rabe re, “Jisos nso ejahre, nong, wahr fil-a ndon!”

14 Eji Jisos nyehne bo, á kehm tongo bo re, “Songen, wahn song kpiri abalimajom, fere tib bo elnahne.”

Eji bo jo jen asongo, bo kehme elnobo.

15 Nne awohng go bo ellong, eji á nyehne re yeblohko nob, á kehm feere abake, jo tehk Esowo wahre wahre,

16 kehm ba gbo go alata nya Jisos, kehm-e kake saam. Nne noo jolo nne a Samaria.‡

17 Owo Jisos kehm bungu re, “Anv, ane awubu sang nobo noa? Ane asehmwubu bako bana?”

18 Nnene feerem ba re á ba tehk Esowoa, sehngem njenne nyia nyi nyi feere noa?”§

19 Owo á kehm-e tongo re, “Mehl, wo song, eltaame ena eblim, wobnob.”

*Elbake ni etul bi Esowo
(Mat 24:23-28,37-41)*

20 Egom Farisi jindiki kehm bahbe Jisos re, “Ngare anyi etul bi Esowo bahke bake!”

* 17:10 17:10 1 Kor 9:16 † 17:11 17:11 Luk 9:51; 13:22 ‡ 17:16 17:16 Jon 4:9,39-41 § 17:18 17:18 Kol 3:17; Ell 15:3-4

Owo Jisos kehm faange bo re, “Etul bi Esowo nehm ba go mbang nyi ane bahke nyehne.*

²¹ Nne awohng awohng limm, no bahke bungu re, ‘Nyehn, bi gana!’ Jol, ‘Nyehn, bi gona!’ Tibre etul bi Esowo bia, wob-n go atahng.”

²² Owo á kehm tongo abat'toono ebe re, “Ngare kp'bake nyi m bahke sebe re efung abehng bi Mmon no nne kpir-n, jol wahn nehm kpiri.

²³ Bo bahk-n jo tong re, ‘Nyehnen gona!’ Ane bako bahk-n jo tong re, ‘Nyehnen ga!’ Kana lohng je ona! Jol kana toono bo!

²⁴ Ana emangedu kpo lim, lennge go elbung, rehng ejang abehng abehng, ano wo fvfo Mmon no nne bahke jolo go ege efung.

²⁵ Á bahke gboko mbang nyehn erem gbalee. Ane ba li anv bahk-e tene.†

²⁶ “Ana jolo ngare nyio nyi Noa, ano wo fvfo bahke tob jol afung nyao nya Mmon no nne.

²⁷ Ngare nyio ane jo li, fere jo w'wo. Aneblum jo ko akal, anebkal jo bal alum, tete rehng efung bio bi Noa yele go egbang. Owo nnyel kehm yele, ba wul bo kpee.

²⁸ “Bahke jolo ana jolo ngare nyio nyi Lot. Bo jo li, fere jo w'wo, jo gunu, fere jo g'gungu, jo bahm ebgbe, fere jo si ntahk.

²⁹ Efung bi Lot lohngo go Sodom, agun, a asalfa kehm kehme elnake go ejahbetul Esowo, ba wul bo kpee.‡

³⁰ “Ano wo bahke tob jol fvfo efung bi bo bahke lennge Mmon no nne tib.

* **17:20 17:20** Jon 18:36 † **17:25 17:25** Luk 9:22 ‡ **17:29 17:29**
1 Tes 5:3

³¹ Efung bio, nne no l'kuumu go ege ero etahk, á l'badde, á k'tohko kpe ji, yel go ege ekp'kpa, song rod nsol enye. Ano wo fvfo tob li ka nne no li go ege egbe, á nehm tohko kpe feere go ege etahk.

³² “Buumen nkal a Lot!

³³ Nne awohng awohng no l'gare re á tahre elkpin ene, á bahke tane na elkpin ene. Nne no l'tane elkpin ene, á bahke tahre na elkpin ene.

³⁴ “N kp-n tongo re, atv mao ane abal bahke noongo go edilnong ajehng, noko, bo bahk-e rodo tahm a ne, noko sa.

³⁵ Anebkál abal bahke jo gok nsol, noko, bo bahk-e rodo tahm a ne, noko sa.

³⁶ Aneblum abal bahke jolo go egbe, noko, bo bahk-e rodo tahm a ne, noko sa.”

³⁷ Owo abat'toono ebe kehm-e bahbe re, “Nsoo, gan wo?”

Jisos kehm faange bo re, “Edi ji ekpakv ejum li no, owo ntere kpo song rur.”§

18

Elgan ni li bada nkalebun, a nlamalam

¹ Jisos kehm tubu bo elgan, eji á l'tib bo ana bo bahke jo kak ero ngare anyehng anyehng, k'jo yini ekpu.*

² Á bungu re, “Nlamalam awohng jolo go ejahbe ajehng, no ki jo fahl Esowo. Ane we joom lub.

³ “Nkalebun awohng tob jolo ejahbe jio, no gbake jo je go ege, jo song tong-e re, ‘Lam elam ejame nob nob, ji n kpi a nnekv ewame.’†

§ 17:37 17:37 Mat 24:21; Ell 16:14-16; 19:17-21 * 18:1 18:1 Kol 4:2; 1 Tes 5:17 † 18:3 18:3 Mak 7:25-30

4 “Á kehm tene. Kpe kang kan a, á kehm fere bung go ege eltim re, ‘Jol eji n kil jo ffahl Esowo, ane kil jo lub-m,

5 tib eji nkalebun noa kp-m gbiingi s'sehng, m bahke lame elam eje nob nob, tohko jol ano á bahk-m gboro tib go elbake ni á kpo ba ngare anyehng anyehng.’”†

6 Ntul a Jisos kehm bungu re, “Wuken ana ebi nlamalam noo bungu no.

7 Anv, Esowo nehm tob lam elam ji nno ka ane ba á yehke no, ba kpo gboong-e atv a njula? Anv, á bahke tohko laange, kehm kake bo eboa?§

8 N kp-n tongo re, á bahke lame elam ji nno elwaare ka bo. Anv, Mmon no nne l'ba, á bahke nyehne ane ba kp'taame go njini nyiaa?”

Elgan ni li bada nne a Farisi, a nkokatak

9 Jisos tob tubu elgan nia, tong ane ba jo bum elbo re, bo ba li go etingitingi, fere jo daange ane bako,*

10 Á bungu re, “Ane abal je go etahk Esowo re bo song kak ero. Noko jolo nne a Farisi, noko jol nkokatak.

11 “Nne a Farisi kehm yiimi eje eje, jo kak ero re, ‘O Esowo, m ma-a kak saam, tibre n limm ana ane ba kpo v ejv, ba kil jo lim nsol go etingitingi. N limm ana ane ba kpo lim erehbe. M ma-a kak saam, tibre n limm ana nkokatak noo ona.

12 N kpo bade elname njal nkpel ebal go erahde. N kpo ka eltahme go ejum ajehng ajehng ji n l'bel.’†

† 18:5 18:5 Luk 11:7-8 § 18:7 18:7 Rom 10:13 * 18:9 18:9 Rom 10:3 † 18:12 18:12 Mat 23:23

13 “Nkokatak yiimi eje go fee. Jol á tabem esamahr ebe, seenge go elbung. Á kohko na esi eje go ndi, kehm bungu re, ‘Esowo, nong, me n fil-a ndon, me nne abiafem wo.’

14 “N kp-n tongo re, Nkokatak noa wo li eno go esamahr Esowo, kehm kehng go etahk, nne a Farisi sang. Tibre nne awohng awohng no l'mehl elne wahre, bo bahk-e rede na. Nne no l'rede elne, bo bahk-e mehle na wahre.”‡

Ana Jisos fuulu abon ba nse

(Mat 19:13-15; Mak 10:13-16)

15 Ane bandiki kehm koko abon ba nse, ba goji Jisos re á kooro bo abo. Eji abat'toono Jisos nyehne ano, bo kehm nyame bo.

16 Owo Jisos kehm lungu bo tv elne, kehm bungu re, “Nongen, abon ba nse jo ba ga egame. Kana jo sahde bo! Tibre etul bi Esowo li ka nkohn nyia.

17 “Etingitingi, n kp-n tongo re, nne awohng awohng no tohko ko etul bi Esowo ana mmon no nse, á nehm tiki li.”§

Efange nne

(Mat 19:16-30; Mak 10:17-31)

18 Ntubesi awohng kehm bahbe Jisos re, “Nnooba nt'tibi, m bahke limi renan, kehm bele elkpin ni li go njinanjini?”

19 Jisos kehm-e faange re, “Jen ji wahng a kehm-m l'lung re nnooba nne fono? Nnene limm, no li nnooba nne, sehngem Esowo ntahngtahng bi li nnooba nne.

‡ 18:14 18:14 1 Jon 1:8-9 § 18:17 18:17 Mat 18:3

20 A kp'kahne atahm nya bungu re, 'Ka jo lim erehbe! Ka jo wul nne! Ka jo v ejv! Ka jo yiimi ntianse efahnge! Jo kak nso, a nne!' "

21 Owo nne noo kehm faange re, "Atahm nyaa kpee m bomo elbumu ngare nyi n kpeke li ntiil."

22 Eji Jisos wuku ano, á kehm bungu re, "Ebsa ejum ajehng ji a bahke gohro lim. Song gungu nsol kpee nyi a kpi no, wo ko akpohko nyao song ka akpak, owo a bahke bele afang go ejahbetul Esowo, wo fere tahm toon-m."*

23 Eji á wuku ano, á kehm kehme elguunu, tibre á fange sehng.†

24 Jisos nyehne kan re á kp'guunu, á kehm bungu re, "Bahke riidi sehng re afang ane kehm lehke etul bi Esowo.

25 Re efange nne kehm yele ejahbetul Esowo, ekamel bahke sehng go mbang a nga."

26 Ane ba wuku no kehm bahbe re, "Anv, nne awo me, no bahke kehm bele eltahre?"

27 Owo Jisos kehm faange re, "Ji nne kil ma lim, goji Esowo riidem."

28 Pita kehm bungu re, "Nyehn, ana e ma tahm ntahk enyahre sa, kp-a toono."

29 Owo Jisos kehm tongo bo re, "Etingitingi, n kp-n tongo re, Nnene limm, no ma tahm etahk eje sa, jol nkal ewe, jol abonanyehn, jol babnde, a abon ebe tib go esi ji etul bi Esowo,

30 no l'k'bel na gbalee budu eying jia ji anv, fere bel elkpin ni li go njinanjini eying ji kp'bake."‡

* **18:22 18:22** Mat 6:20 † **18:23 18:23** 1 Tim 6:9-10,17; Jems 2:5

‡ **18:30 18:30** Luk 22:30

*Ana Jisos gohro bung bade elkv ene
(Mat 20:17-19; Mak 10:32-34)*

³¹ Owo Jisos kehm rodo abat'toono ebe, ewubu ane abal, tahm a bo go nkpohko, kehm song tong bo re, "Anv, e yahke tahm go Jeusalem. Go wo ejum ajehng ajehng ji abanyehnamahr Esowo nyono no bada Mmon no nne, bahke lohko lim ano go etingitingi. §

³² Tibre bo bahk-e yake, kak ane ba ki li Jus go ebo. Bo bahk-e nyoko, fere son-e, fere so atel wohng-e.

³³ Bo bahk-e dohko, fere wul-e. L'kang nfung era, á nyahme go elkv."*

³⁴ Abat'toono ebe wukem ejum ajehng ajehng ji á bungu no. Lenngem bo, tibre bo b'behr bo alum nyao. †

*Ana Jisos limi nwakamahr; á nyehn
(Mat 20:29-34; Mak 10:46-52)*

³⁵ Jisos kehm jene song kabbe go Jeriko. Nwakamahr anyehng ji o nkpe a mbang, jo gboongo nsol.

³⁶ Eji á wuku ellong ane kp'sehnge, á kehm bahbe re, "Nenan ana?"

³⁷ Bo kehm-e tongo re, "Jisos ji Nasaret wo kp'sehnge."

³⁸ Owo á kehm soro rabe re, "Jisos mmon no Devid, nong, me n lub fil-a ndon!"

§ 18:31 18:31 Luk 9:51 * 18:33 18:33 Luk 9:22,44; Jon 2:19-21

† 18:34 18:34 Mak 9:32

³⁹ Ane ba jolo es'song kehm-e nyame re á rahke ewok. Á kehm kpe tuungu na, rabe wahre wahre re, "Mmon no Devid, nong, me n fil-a ndon!"[‡]

⁴⁰ Jisos kehm yiimi, kehm tongo bo re, bo ko-e ba. Eji á ba rehng kabbe Jisos, owo Jisos kehm-e bahbe re,

⁴¹ "Anv, a kp'sebe re me n lim jen ka-a?"

Á kehm faange re, "Nsoo, n kp'sebe re me n lub nyehn."

⁴² Owo Jisos kehm-e tongo re, "Fere jo nyehn anv! Eltaame ena ebwahng, wobnob."§

⁴³ Tvtv ona á kehm soro nyehn, fere tahm toon-e, jo ka Esowo ellub.*

Eji ane bako kpee nyehne ano, bo kehm kehme Esowo tehk.

19

Jisos abola Sakeus

¹ Jisos kehm rehng go Jeriko, sehng asongo.

² Nne awohng jolo o, no bo jo lung-e re Sakeus. Á jolo ntubesi abakokatak, fere f'fang.

³ Á jo sebe re á nyehn ana Jisos li no. We á joom nyehn, tib ellong ane gbale o sehng, ga fvfo á jolo nkpehrekahba nne.

⁴ Owo á kehm beke, gbo bo mbang, song wahr ekuntaake, eji á l'nyehn-e. Tibre Jisos jo ba elsehng go mbang nyio.

⁵ Eji Jisos ba rehng edi jio, á kehm kpuru ero, kehm-e tongo re, "Sakeus, badde elwaare, tibre lela m bahke kange go ega etahk."

[‡] 18:39 18:39 Mat 15:25 § 18:42 18:42 Luk 17:19 * 18:43 18:43 Mat 8:15

⁶ Owo á kehm badde elwaare, ba vvr-e go eyebatahng.

⁷ Bo nyehne kan ano, bo kehm kehme elmemme ane kpee re, “Nne noa ebtahm re á song kang a nne no li na nne abiafem.”*

⁸ Sakeus kehm mehle yiimi, kehm bungu tong Ntul a Jisos re, “Nsoo, m bahke yange nsol enyame, yehke ejang ka akpak. Nne awohng awohng no n nehm-e go ejum ajehng ajehng, m bahk-e gale nkpel eni budu.”†

⁹ Owo Jisos kehm-e tongo re, “Lela eltahre ebba go etahk jia, tib eji á tob li mmon no Ebrahim.‡

¹⁰ Tibre Mmon no nne ba re á ba seb, fere tahre jio ji ma tan.”§

Elgan ni li bada ntul no tahme nlaabambang ejahbe

(Mat 25:14-30)

¹¹ Eji ane bao wuku nsol nyio, Jisos kehm tubu bo elgan. Tibre ngare nyio yebkabbe go Jeusalem, ane bao jo fere tir re, etul bi Esowo bahke soro ba tvty.

¹² Owo wahng ka á kehm bungu re,
“Mmon a ntul awohng jolo go, no tahme nlaabambang ejahbe re á song li etul feere.*

¹³ Re á kehm tahme, á lungu alokeltum ebe, ane awubu, ka bo mpon ewubu ewubu, kehm tongo bo re, ‘Roden akpohko nyaa, wahn jen are tete me n feere ba.’†

* **19:7 19:7** Luk 15:2 † **19:8 19:8** Mat 3:8 ‡ **19:9 19:9** Luk 13:16

§ **19:10 19:10** 1 Tim 1:15 * **19:12 19:12** Jon 14:3,28 † **19:13 19:13** Mak 16:15; Elt 1:8

14 “Ejahbe eje ko-e ekv, owo bo kehm tiingi etib tv-e re, bo nehme seb re á ba jol ntul abo.‡

15 “Eji á ma song li etul feere, á kehm ba lung alokeltum ebe, ba á ka bo akpohko re bo ba, eji á l'kahn ana bo ma li nsehng go are ma bo ma jen.§

16 “Ngbokambang a nlokeltum kehm bake, ba yiimi go ege esamahr, kehm bungu re, ‘Nsoo, mpon ewubu enya nyi a ka-m no eblim mpon atahl alon.’

17 “Owo á kehm-e tongo re, ‘Woblim sehng, nnooba nlokeltum. Tib eji a ma bel ekakesehk go mmons'sohka mmojum, a bahke jo fili ejahbe na ebwubu.’

18 “Etoono nlokeltum noko kehm kpe lohng ba, ba bung re, ‘Nsoo, mpon ewubu enya nyi a ka-m no eblim mpon atahl abal a mpon ewubu.’

19 “Owo á kehm-e tongo re, ‘A bahke jo fili ejahbe na eblon.’

20 “Noko kehm kpe lohng ba, ba bung re, ‘Nsoo, nyehn mpon ewubu enya ga! N kake go egame afiafong, song bum go.

21 N jo fahl-a fahl. Tibre a li ebibbib nne sehng. A kpo rod nsol nyi ki li wo bumu no. A kpo kpa nsol nyi a ki bahm.’

22 “Á kehm-e tongo re, ‘Wo eb'bi nlokeltum noa, m bahke koko alum nnyo enya lam-a. A k'kahn re, me ebibbib nne ji. N kpo rod nsol nyi n ki bum, fere kpa nsol nyi n ki bahm.

23 Jen ji wahnge a ki ka njenare akpohko enyame, kehn eji m ma feere ba, n jol ba ko, fere ko nsehng budu?”

‡ 19:14 19:14 Jon 1:11 § 19:15 19:15 2 Kor 5:10

24 “Owo á kehm bungu tong ane ba yiimi ona re, ‘Taaren ye mpon ewubu nyio, wahn faake a nyi ka nne no kpi mpon atahl alon.’* ”

25 “Bo kehm-e tongo re, ‘Nsoo, á kpi mpon atahl alono!’ ”

26 Á kehm faange re, ‘N kp-n tongo re, nne awohng awohng no l’bel, bo bahk-e kake na budu. Nne no ki kpi, jol ji á kpi no, bo bahk-e taare. ”

27 “ ‘Anebekv ebame bao ba kil sebe re me m ba jol ntul abo, song koon bo ba, wahn ba wul bo go egame esamahr.’ ”

*Ana Jisos yele go Jeusalem a egburu ellub
(Mat 21:1-11; Mak 11:1-11; Jon 12:12-19)*

28 Eji Jisos ma bung ano, á kehm soro asi asongo go Jeusalem.

29 Eji á ba rehng kohlo go Betfage, a Betani, ajahbe nya li go nnahb ewong ji bo kpo lung re Oliv, á kehm yehke abat’toono ebe na abal tum.

30 Re á kehm tumu bo, á tongo bo re,

“Songen go ejahbe ji li go egahna mbuk-song. N l’song rehng ejahbe jio, eji n fi no, m bahke nyehne mmon a mbvankang no bo kal-e k’kuumu, no bo tohk-e go eti. Fanngen ye, wahn ko-e ba a ne! ”

31 Nne awohng awohng no l’bahb-n re, ‘Jen ji wahnge n kp-e fannge?’ faangen ye re, ‘Ntul wo kp-e sebe.’ ”

32 Ane ba Jisos tumu bo kehm lohko je, lohko song nyehn ana Jisos tongo bo.

* 19:24 19:24 2 Kor 6:1

³³ Eji bo jo fanngge mmon a mbvankang noo, owo afono mbvankang nyio kehm bahbe bo re, "Jen ji wahnge n kp'fanngge mbvankang nyio?"

³⁴ Owo bo kehm faange re, "Ntul wo kp-e sebe."

³⁵ Bo kehm koko mbvankang nyio tahm a nyi goji Jisos, fere yehke nsol nyi bo kake no, yal mbvankang nyio go njahm, fere mehl Jisos jehke.

³⁶ Eji mbvankang jo jen a ne asongo, bo kehme abomo ebo yal go mbang.

³⁷ Eji á jo badde go ewong jio asongo, ngare nyi á ma kabbe go Jeusalem, ellong abat'toono ebe gbalee kehm kehme elgeere, fere jo tehk Esowo wahre wahre tib go agburu akpokosi nya bo ma nyehn.

³⁸ Bo jo bungu re, "Elfuulu li a ntul no kp'bake go mbing nyi Jehova. Elkoono jol go ejahbetul Esowo, ellub jol go ero!"†

³⁹ Egom Farisi jindiki ji woomo go ellong ane bao kehm-e tongo re, "Nt'tibi, nyam abat'toono eba!"

⁴⁰ Jisos kehm faange re, "N kp-n tongo re, Ane baa l'belle, atal bahke kehme elrabe."‡

Ana Jisos lingi Jeusalem

⁴¹ Eji bo ba rehng kohlo go Jeusalem, eji á ma nyehn yefono ejahbe, á kehm kehme ellongi re,§

⁴² "N kp'sebe re wahn lub kahn lela ejum ji bahke koko elkoono ba a ni,* wo anv, n nehme ma nyehn.†

† 19:38 19:38 Luk 2:14 ‡ 19:40 19:40 Mat 3:9; 1 Pit 2:5 § 19:41 19:41 Luk 23:28 * 19:42 19:42 Jon 16:33 † 19:42 19:42 Mat 13:15

⁴³ Tibre afung nyao bahk-n kpiri, nya anebekv ebahne bahke bake, ba senng-n kak, fere kohk-n tv.

⁴⁴ Bo bahke ranng-e jahbe jahne kpee, a ane kpee ba lene o. Jol eltal anehng anehng nehm kpe jol ni bahke sake kuumu a ntem egahne jahbe.‡ Tibre n kahnem ngare nyi Esowo ba re á ba tahr-n.”

Ana Jisos je go etahk Esowo

(Mat 21:12-17; Mak 11:15-19; Jon 2:13-22)

⁴⁵ Jisos kehm yange go etahk Esowo, song kehme ane bao kam, ba ji o, jo gungu nsol,

⁴⁶ fere tong bo re, “Bo nyono go nwer Esowo re, Esowo bungu re, ‘Etahk ejame bahke jolo etahk ero akake.’ Wahn ebfero rod bum ana ebehre awajv.”§

⁴⁷ Jisos jo tibi efung abehng abehng go etahk Esowo. Atubesi abalimajom, at'tibi ba atahm, a atubesi ane jo sebe re bo wul-e.

⁴⁸ Jol bo tikem kahn mbang ana nyi bo bahke limi.* Tibre ane kpee jo wuung-e atung sehng, eji ellum ene anehng anehng l'k'gbo ndi.

20

Mbahbe nyi li bada nsahm nyi Jisos

(Mat 21:23-27; Mak 11:27-33)

¹ Efung abehng eji Jisos jo tib ane go etahk Esowo, fere jo tiingi bo nnoobo etib, owo atubesi abalimajom, a at'tibi ba atahm, a anebkul nfm kehm lohngo ba,

‡ 19:44 19:44 Luk 21:6 § 19:46 19:46 1 Kor 3:16-17 * 19:48 19:48 Luk 22:53

² ba bahb-e re, “Tong-r, nsahm anyi a kpi no, nyi wahnge a kpo lim nsol ana nyia?”* Nne awo ka-a ka nsahm ny'nehm a?”

³ Owo á kehm faange bo re, “Me fvfo, m bahk-n tob bahb mbahbe. Tong-m wahn,

⁴ anv, ewohngalahb ji Jon lohng go ejahbetul Esowoa, afi lohng goji ane?”

⁵ Bo kehm kehme eltoobo atemtem re, “E l'tong re, ‘Lohng go ejahbetul Esowo,’ á bahke bungu re, ‘Jen ji wahnge n ki taame tv Jon?’

⁶ E l'fere tong re, ‘Lohng goji ane,’ ane kpee bahk-r atal tuubu.” Tibre bo jo sahb k'kahn re, Jon jolo nnyehnamahr Esowo.†

⁷ Owo wahnge bo kehm faange re, bo nehme kahn edi ji lohng no ba.

⁸ Jisos kehm tob tong bo re, “Ano wo fvfo n l'ki-n tob tong nsahm nyi n kpi no, nyi wahnge n kpo lim nsol nyia.”

*Elgan ni li bade abayaame etahngga
(Mat 21:33-46; Mak 12:1-12)*

⁹ Jisos kehm tubu elgan nia tong ane re,

“Nne awohng jolo go, no bahme avain go ege etahngga, fere rod yaame ane, kehm tahme eje song rehng go ejahbe jehko, kang go ekidi l'lab.

¹⁰ Ngare biingi kan a me, á kehm tumu nlokel-tum ewe tv ane ba á yaame bo etahngga eje re bo song bong akab nti nyandiki go etahngga ba ka-e. Abayaame etahngga bao fere dv-e na, kam-e, á feere abo abo.

* 20:2 20:2 Luk 6:19 † 20:6 20:6 Luk 3:15

11 “Owo á kehm kpe tum nlokeltum noko. Ye fvfo, bo tob dv-e ano, fere son-e, kam-e, á feere abo abo.

12 Á kehm kpe bulu, kpe tum noko. Noa ana, bo bom-e elok, fere kam-e yake go.‡

13 “Owo nfono etahngga noo kehm bungu re, ‘Anv, m bahke limi renan abee? M bahke gohro tum akor-m mmon ewame. Fundiki á bahke bo lub.’§

14 “Eji abayaame etahngga bao nyehn-e no, bo kehm kehme elbungu atemtem re, ‘Ye wo li nlehkelkv, nong, wahr wulen ye, eji etahngga jia l'fere jol j'jahre.’*

15 Owo bo kehm-e yehke go etahngga jio, song wul-e.

“Anv, jen ji nfono etahngga noo bahke bo lim?

16 Á bahke bake ba wul abayaame etahngga bao, fere faake etahngga jio ka ane bandiki.”†

Eji ane bao wuku ano, bo kehm bungu re, “Esowo k'taame!”

17 Owo Jisos kehm seenge bo too, kehm bungu re, “Anv, edi nwer Esowo jia lohngo renan, ji bungu re,

“ ‘Eltal ni asehketahk tene no, ni ni ma fere jol nnaahb ekahme?’‡

18 Nne awohng awohng no l'gbo go eltal nio, á bahke banne. Eltal nio l'fere gbo na, nyede nne, bahk-e wade na wade.”

*Mbahbe nyi li bade etak atahbe
(Mat 22:15-22; Mak 12:13-17)*

‡ 20:12 20:12 Mat 23:34 § 20:13 20:13 Gal 4:4 * 20:14 20:14
Rom 2:22 † 20:16 20:16 Mat 22:7-9 ‡ 20:17 20:17 1 Pit 2:4,6

19 At'tibi ba atahm, a atubesi abalimajom gare re bo bob Jisos ngare ny'nehm ona. Tibre bo jo kahne re, á tubu elgan nio bada bo. Fvfo, bo jo ffahl ane.

20 Owo bo kehm-e kehme elbaabe, fere tum ane ba bo ka bo ngu, bo song kehme awak lim, are bo atingitingi ane ba, eji bo l'bob-e go ege alum nnyo, fere yak-e kak ntubesi ejahbe go ebo, eji á l'lam-e. §

21 Bo kehm-e bahbe re, "Nt'tibi, e kp'kahne re, wo kpo bung, fere tib go nseenga nseenge. Wo kpehme rang nnene. A kpo lohko tib mbang nyi Esowo go etingitingi.

22 Anv, atahm enyahre t'taame ka-r re wahr jo tahb etak ka ntul a Roma, afi taamem?"

23 Jisos k'kahn awak ebo. Owo á kehm tongo bo re,

24 bo tib-e nsiring, kehm fere bahb bo re, "Anv, esi jia ji nyehne ji? Mbing nyia nyi nyehne nyi?"

Bo kehm-e faange re, "Nyi ntul a Rom nyi."

25 Á kehm tongo bo re, "Kaan ntul a Rom ji li ka-e, wahn ka Esowo ji li ka Esowo."*

26 Bo we maam tiki bob go ellow anehng anehng go esamahr ane. Owo bo kehm belle, tib eji nfaange enye jo kpo bo esi.

Mbahbe nyi li bade elnyahme go elkv

(Mat 22:23-33; Mak 12:18-27)

27 Egom Sadusi jindiki kehm lohngo ba goji Jisos. Bo ba li ane ba kpo bung re, "Elnyahme go elkv limm."†

§ 20:20 20:20 Luk 11:54 * 20:25 20:25 Rom 13:1-7 † 20:27 20:27 Elt 23:8

28 Bo kehm-e tongo re, “Nt'tibi, Moses nyono ntahm ka-r re, ‘Nne l'kpo, nkal ewe sa, eji á ki jel mmon awohng awohng, mmonannyeahn nkve bahke koko nnenkal noo, jel abon ka mmonannyeahn no ma kpo.’

29 “Jolo abonanyeahn na asehma. Ngbokambang kehm koko nkal. Mmon awohng awohng á jelem, á kpo.

30 Etoono kehm tob ko nnenkal nonehm o, kehm kpoko.

31 Noko gona kehm kpe ko nnenkal nonehm o. Ano wo jolo a ane asehma bao kpee. Mmon awohng awohng bo jelem, kehm kpoko.

32 Es'kohro, nnenkal noo gohro kpo.

33 Go efung bi ane l'nyahme go elkv, á bahke jolo nkal a nyehne? Tibre bo ane asehma kpee ko-e ana nkal abo.”

34 Owo Jisos kehm faange bo re, “Ane ba li eying jia ji anv kpo ko akal, anebkal bal alum.

35 Ane ba fuumu re bo nyahme go elkv, fere jol go eying ji kp'bake nehm kpe jo ko akal, anebkal nehm kpe jo bal alum.

36 Bo nehm kpe jo kpo, tibre bobjol ana baben-jel. Eji bo ma nyahme go elkv, bobfere jol abon ba Esowo.‡

37 Elnyahme go elkv nia. Jol Moses tib-r tib, eji á nyono bade eti jio ji jo lul. Owo á lungu Jehova re, ‘Esowo bio bi Ebrahim, a bi Aisik, a bi Jakob.’

38 Á limm Esowo bi akvne, á li Esowo bi ane ba li go elkpin. Tibre bo kp'kpini ka ye.”§

‡ 20:36 20:36 1 Jon 3:1-2 § 20:38 20:38 Luk 9:30; 16:23

³⁹ At'tibi ba atahm bandiki kehm faange re, “Nt'tibi, a bungu go nseenge.”

⁴⁰ Bo kpeem sahb bahb Jisos mbahbe anyehng anyehng.

*Mbahbe nyi li bada Mesaya
(Mat 22:41-46; Mak 12:35-37)*

⁴¹ Jisos kehm tongo bo re, “Anv, jen ji wahnge bo kpo bung re, Mesaya mmon a Devid wo?”

⁴² Tibre yefono Devid bungu go nwer a Saams re,

“ ‘Jehova tongo ntul ewame re, Ji go egame ejang eboblum,

⁴³ tete me n lim anebekv eba etikunakpade eja.’

⁴⁴ Eji Devid lung-e re, ‘Ntul ewame’, anv, á kehm jolo mmon ewe renan?”*

*Ana Jisos rehke ane bade at'tibi ba atahm
(Mat 23:1-36; Mak 12:38-40)*

⁴⁵ Jisos kehm tongo abat'toono ebe go esamahr ane kpee re,

⁴⁶ “Jo gberen at'tibi ba atahm, ba kpo kor bo re bo jo kak akpawobo yanng. Kpo kor bo re, ane jo gong, kak bo nnyo go are. Go eksp'kpa ero, afi jolo go nkak, kpo kor bo re bo jo ji adi nji nya aj'jok ane kpo ji.

⁴⁷ Bo kpo taare akalebun ntahk ebo, fere jo kak alaabe aro go nnyo a nnyo. Elam ji bo bahke gbale sehng.”†

* **20:44 20:44** Ell 5:5; 22:16 † **20:47 20:47** Luk 12:48; Jems 3:1

21

Ayare nya nkalebun ka no (Mak 12:41-44)

¹ Jisos kehm tabe esamahr ebe, kehm nyehne afang ane kp'kake akpohko ayare ebo go elkohl akpohko ni jolo go etahk Esowo.

² Á kehm tob nyehn nkpak a nkalebun kp'kake ederi ebbal.

³ Owo á kehm bungu re, “Etingitingi, n kp-n tongo re, Nkpak a nkalebun noa wo ga ka sehng bo ane kpee.

⁴ Egom jehko jo ka gbalee, jo sa bo gbalee go. Ye ji li nkpak kaa kpee ji á bele no, ji kehn á jol ma ko, gunu nsol alehke.”*

Erem, a afemfem (Mat 24:1-14; Mak 13:1-13)

⁵ Egom ebo jindiki jo bungu bade etahk Esowo, ana bo liibi no go anoobo atal, a nsol nyi bo ko akpohko ayare gunu. Owo Jisos kehm bungu re,

⁶ “Bada nsol nyi n kp'nyehne a, ngare kp'bake nyi eltal anehng anehng l'k'kpe sa kuumu a ntem. Bo bahke wake kpee wohng ndi.”†

⁷ Bo kehm-e bahbe re, “Nt'tibi, anv, jia bahke limi ngare anyi? Ellingi ani bahke tibi re, yahke ba ellimi?”

⁸ Owo Jisos kehm faange re, “Jo kunen ekpu, eji bo l'ki-n nehm. Tibre ane gbalee bahke bake go egama mbing, fere jo bung re, ‘Me wo a!’ fere bung re, ‘Ngare ebkabbe!’ Kana jo toono bo!

* 21:4 21:4 2 Kor 8:1-3 † 21:6 21:6 Luk 19:43-44

⁹ Ní l'wuk bada nta, fere wuk bade ana ane bahke kehme asi tab, fere jo ten atubesi ebo, kana jo fahl! Nsol nyio bahke tohko gbo mbang lim. Fvfo, lohngem re, es'kohro ji ma kabbe o."

¹⁰ Jisos kehm kpe tong bo re, "Ejahbe ajehng ajehng bahke noko a njahm ejahbe nyehko. Ajahbe bahke jo nok atemtem.

¹¹ Adi nyandiki, ndi bahke jo gbehke sehng. Njal bahke jolo, a ayam nya bahke jo sehng ane. Amenngemenng nsol, a agburu nliingi bahke jo tib go elbung.

¹² "Re nsol nyia kpee kehm limi, bo bahke jo bob-n, fere jo nohk-n, jo ko-n tahm a nahne go ntahk ero, fere jo kak-n go ngbekobo. Bo bahk-n jo ko tahm a nahne, song yiimi go esamahr atul, a atubesi tib go egama mbing.‡

¹³ Jia ji bahk-n limi, eji ní l'yiimi ntianse ka-m.

¹⁴ "Nong, ntim enyahne jo tahn-n, eji ní l'k'jo tiiri ana m bahke faange, ngare kehm rehng.§

¹⁵ Tibre m bahk-n kake alum nya m bahke bungu, fere ka-n elkahne, eji anebekv ebahne l'k'ma faange, fere jo ten.

¹⁶ Jol babnso ejahne, a abonane ebahne, a nnahb enyahne, a ate ebahne bahk-n jabbe ka. Egom ejahne jindiki, bo bahke wulu na bo.*

¹⁷ Ane kpee bahk-n koko ekv tib go egama mbing.

¹⁸ Jol ellv esi enahne anehng anehng limm, ni bahke tane.

‡ 21:12 21:12 Luk 12:11 § 21:14 21:14 Mat 10:19 * 21:16 21:16
Jon 16:1-3; Ell 2:10,13

19 Ní l'jo kpuumu, m bahke tahre atohko enyahne."

Ana bo bahke ranng Jeusalem
(Mat 24:15-21; Mak 13:14-19)

20 Ní l'nyehn nlong nsoja ma ba senng Jeusalem kak, owo m bahke kahne re, bahke gulu elranng.

21 Nong, ane ba li go Judea be song go awong ngare nyio, ane ba li go Jeusalem tahm ejahbe jio song. Ane ba li go bo ebgbe, nong, bo k'kpe feere ba go Jeusalem.

22 Tibre afung nyao nya li afung elbongo, eji nsol kpee nyi bo nyono go nwer Esowo l'lohko jol go etingitingi.

23 Eyyu a anebkal ba bahke jolo ela, a ane ba bahke jo yab abon ngare nyio. Ndon bahke gbale sehng ejahbe jio. Erakatahng ji Esowo bahke gboko kuumu ane bao.

24 Bo bahke wulu bo go ekahngkahng. Egom jehko, bo bahke bobo bo, tahm abo, bo song jol aneb agbekobo go ejahbe ajehng ajehng ji li go njini. Ane baka baka bahke jo kadde Jeusalem go akpade akpade tete ngare abo biingi.†

Elbake ni Mmon no nne
(Mat 24:29-31; Mak 13:24-27)

25 "Nliingi bahke jo tib go njul, fere jo tib go ebareka, a alonlo.‡ Ane ba li go njini, ala bahke jo teebo, eko fere jo tan bo. Bo nehm jo kahn ji bo bahke limi tib go ewahl ji agburu aya, a ebuku bahke jo wahl.

† 21:24 21:24 Rom 11:25; Ell 11:2 ‡ 21:25 21:25 Ell 6:12-13

²⁶ Ane bahke jo gbo elkv tib elfahle, eji bo kp'siki nsol nyi kp'bake go njini kpee. § Tibre atahm nya kpi elbung bahke range.

²⁷ Owo bo bahke nyehne Mmon no nne kp'bake go ekparesemsem, a nsahm, a egburu ellub.*

²⁸ “Nsol nyio l'kehme ellimi, kpiiden asamahr enyahne go ero, wahn tab asi enyahne wahre, tibre eltahre enahne kp'kabbe abake.”†

Elgan ni li bade efig

(Mat 24:32-35; Mak 13:28-31)

²⁹ Jisos kehm tubu bo elgan re, “Kpuren eti ji bo kpo lung re efig,‡ a nti nyehko kpee.

³⁰ Ñ l'soro ny'nyehn eji ma kehme elnyono, m bahke kahne re, nnale yahke ba.

³¹ Mbang ny'nehm nyi, n l'tob nyehn nsol nyio kpee kp'limi, m bahke kahne fvfo re, etul bi Esowo ebkabbe.

³² Etingitingi, n kp-n tongo re, Ane ba bahke jolo go elkpin ngare nyio nehm kpo tete nsol nyio kpee lim.

³³ Elbung abola ndi bahke tane, alum enyame nehm tiki tan. §

Jo kunen ekpu

³⁴ “Jo baaben elnahne, goji nkak alimi, a amahm awoko a at'tiiri nya elkpin nia l'ki-n gbal go egahna ntim, eji efung bio l'ki-n gbede na.*

§ 21:26 21:26 Ell 6:15-16 * 21:27 21:27 Ell 19:11-16 † 21:28
 21:28 1 Tes 4:16-17 ‡ 21:29 21:29 Luk 13:6-9; Mat 21:19 § 21:33
 21:33 Luk 16:17 * 21:34 21:34 Mak 4:19; Mat 6:31-33

³⁵ Tibre efung bio bahke gbede ane kpee ba li go njini, ana ntahmfuk nyi bo kpo saade konngo nsahre.†

³⁶ Jo baaben ngare kpe kpe, wahn jo kak ero, eji n l'bel eko ji m bahke foro go nsol nyio kpee nyi bahke limi, wahn fere yiimi go esamahr bi Mmon no nne."‡

³⁷ Efung abehng abehng Jisos jo tibi go etahk Esowo. Atv l'behde, á jo kono eljeke song kang go ewong ji bo kpo lung re Oliv.

³⁸ Efungfu atv atv ane kpee jo lohngo ba go etahk Esowo re bo ba wuk-e.

22

Ana bo jo lam kak Jisos

(Mat 26:1-5; Mak 14:1-2; Jon 11:45-53)

¹ Eji elkak ni bo jo li abred nya bo kil jo kak ayist ma kabbe, ni bo kpo lung re Pasova,

² owo atubesi abalimajom, a at'tibi ba atahm jo seb mband ana nyi bo bahke wulu Jisos. Fvfo, bo jo ffahl ane.

Ana Judas taame re á bahke gungu Jisos

(Mat 26:14-16; Mak 14:10-11)

³ Ngare nyio nnehm kehm yele Judas ji bo jo lung-e re Iskariot, ji woomo go ellong abat'toono Jisos, ewubu ane abal.*

⁴ Owo Judas kehm tahme song kpiri atubesi abalimajom, a atubesi ane ba jo baabe etahk Esowo, fere toobo a bo ana á bahke jabbe Jisos ka bo.

† 21:35 21:35 1 Tes 5:3 ‡ 21:36 21:36 Mak 13:33 * 22:3 22:3
Jon 13:2,27

⁵ Atahng yebe bo sehng, owo bo kehm taame re, bo bahk-e kake akpohko.[†]

⁶ Judas kehm taame, kehm kehme mbang seb nyi á bahke jabbe Jisos ka bo, eji ane bako ki li.

Ana Jisos toobo ebjing bi elkak nio

(Mat 16:17-25; Mak 14:12-21; Jon 13:21-30)

⁷ Owo efung kehm ba rehng bi elkak ni abred nya ki kpi ayist, bi bo jo wul abon ejoro ba Pasova.

⁸ Jisos kehm tongo Pita abola Jon re bo song toobo edi bum bo, ji bo bahke lehke elkak Pasova. Owo á kehm tumu bo tv.

⁹ Re bo kehm tahme, bo tohk-e bahb re, “Gan wo a kp'sebe re wahr song toobo bum?”

¹⁰ Owo á kehm faange bo re, “Wuungen atung! N'lyel go nla ejahbe, m bahke wane nne no solo etulahb.[‡] Toonen ye, song go etahk ji á bahke yange,

¹¹ wahn tong nfontahk re, 'Nt'tibi kp-a bahbe re, Gan wo eksp'kpa li no, ji m bahke jehke, li elkak Pasova, a abat'toono eame?’

¹² Á bahk-n tibi egburu eksp'kpa ajehng ji li go ero enyong ji bo ma jehke nti. Owo m bahke toobo nsol kpee bum.”

¹³ Bo kehm lohko tahm, lohko song nyehn ejum ajehng ajehng ana Jisos tongo bo, kehm toobo nsol elkak Pasova bum.

Nsol alehke nyi elbuumu Jisos

(Mat 26:26-30; Mak 14:22-26; 1 Kor 11:23-25)

¹⁴ Eji ngare biingi no, á kehm song ji go eksp'kuru, a abatiingetib ebe.

[†] 22:5 22:5 1 Tim 6:9 [‡] 22:10 22:10 Luk 19:30; Mat 17:27

15 Owo á kehm tongo bo re, “Jo kor-m sehng re me n li elkak Pasova nia a nahne, kehm nyehne erem.

16 Tibre n kp-n tongo re, N nehm kpe tiki li elkak nia, tete n li etingitingi elkak a nahne go ejahbetul Esowo.”§

17 Owo á kehm rodo nkob, kak Esowo saam, kehm bungu re, “Koon, wahn wo, wahn ane kpee.

18 Tibre n kp-n tongo re, Bomo anv asongo n nehm kpe tiki wo alahb avain tete etul bi Esowo ba.”

19 Owo á kehm rodo ebred, kak Esowo saam, fere bakke, ka bo, kehm bungu re, “A wo li ngubjing enyame, nyi bo kp-n kake. Jo limen ana, eji n l'jo buum-m.”

20 Eji bo ma li nsol mal, go mbang ny'nehm nyi á tob ka bo nkob, fere bung re, “Nkob nyia nyi li egbanngalung ji nfenfe tib go alung emame ma kp'fabe ka-n.

21 “Nyehnen, nne no kp-m gungu, á jehk a name ana go ekp'kuru.*

22 Tibre Mmon no nne bahke kpoko ana Esowo toobo no. Eyu a nne no kp-e gungu.”†

23 Owo bo kehm kehme elbahbe atemtem re, “Nne awo go egahre ellong no bahke limi elkohn ejum ana jia?”

Nne awo ga gbal?

(Mat 20:25-28; Mak 10:42-45)

§ 22:16 22:16 Luk 13:29 * 22:21 22:21 Jon 13:21-30 † 22:22 22:22 Mat 18:7

24 Owo nfaabe kehm gboko abat'toono Jisos bada nne no bo bahk-e bumu ana nne no ga gbal go bo ellong.‡

25 Jisos kehm tongo bo re, “Atul ba njini nyia kp'kpi nsahm nyi bo kpo fili ane ebo. Atubesi ane, bo kpo lung bo re, ‘Akubi!’

26 Ano sang bahke jolo go egahne. Ga nob re nne no ga gbal go egahne ellong jol ana mmonse. Ntubesi bahke jolo ana nlokeltum.

27 Anv, nne awo ga gbal, nne no jehk go ekp'kuru, afi nne no kp-e loko wo? No jehk go ekp'kuru sang ga gbal? Eji n li a nahne, n li ana nl'loko.§

28 “Wahn ba li ane ba ma jol a name kpee go egame elgaare.*

29 Ana nsoo ma-m ka ejahbe re me n fili, ano wo fvfo m ma-n tob ka,

30 eji n l'jo li nsol ekp'kuru ajehng a name go egame ejahbetul, fere ji go nti etul, jo lam ewubu et'tohngo ebbal bi Israel.”

Ana Jisos nyehne amahr bade ana Pita bahk-e tene

(Mat 26:31-35; Mak 14:27-31; Jon 13:36-38)

31 Ntul a Jisos kehm bungu re, “Saimon, nnehm sebe re á ko nsahm nyi á bahk-n febe ana bo kpo febe arasi.†

32 Me n kak ero ka-a, eji a l'k'gbo go egama mbang.‡ Ngare nyi a ma fere gbo ndon, jo kak abonane eko!”§

‡ 22:24 22:24 Luk 9:46-48 § 22:27 22:27 Rom 15:8 * 22:28
22:28 Jon 11:16 † 22:31 22:31 2 Kor 2:11; 1 Pit 5:8; Ell 2:10

‡ 22:32 22:32 Jon 17:9,15 § 22:32 22:32 Jon 21:15-17

³³ Owo Pita kehm-e faange re, “Ntul, me n toobo ebjing re me n je ngbekobo a na, jol afi elkv ni, m bahke kpoko a na.”

³⁴ Jisos kehm bungu re, “Pita, n kp-a tongo re, Lela a bahke gbaame nkpel era re, me a nehme kahn, nkok kehm kuku.”

Gungu mbomo ema, wo gunu ekahngkahng!

³⁵ Jisos kehm bahbe bo re, “Ngare nyi n tum-n no, eji á ki fili abon abam akpohko, fere fili abam efilibo, a akpaketa, ejum jia ji rin-n noa?”

Bo kehm faange re, “Ejumjum wahr rinem.”*

³⁶ Jisos kehm tongo bo re, “Anv, nne no l’bel mmombam akpohko, afi á bele ebam efilibo, nong, á fili. Nong, nne no ki kpi ekahngkahng gungu mbomo eme, song gunu.”†

³⁷ Tibre n kp-n tongo re, Edi nwer Esowo ji bungu re, ‘Bo m-e fange kak go ellong abi ane’, bahke lohko jol go etingitingi. Tibre ji bo nyono bada name bahke lohko jol go etingitingi.”

³⁸ Owo abat’toono ebe kehm bungu re, “Ntul, nyehn akahngkahng na abal a!”‡

Á kehm faange bo re, “Ebgbal.”§

Ana Jisos kake ero

(Mat 26:36-46; Mak 14:32-42)

³⁹ Jisos kehm lohngo tahm go ewong ji bo kpo lung re Oliv, ana á jo kono ellimi.* Abat’toono ebe tahm toon-e.

⁴⁰ Eji á song rehng edi jio, á kehm tongo bo re, “Jo kaken ero, eji á l’k’yel go elgaare.”

* 22:35 22:35 Luk 9:1-6 † 22:36 22:36 Ell 13:10; Ef 6:17 ‡ 22:38

22:38 Mak 9:32 § 22:38 22:38 Mak 14:41 * 22:39 22:39 Luk 21:37

⁴¹ Á kehm jeere song rehng go es'song ekidi labe ana nne bahke roko eltal song rehng. Owo á kehm jamme alahng, kehm kehme ero kak re,

⁴² “Nsoo, l'kor-a, fak-m nkob erem nyia! Ana koro me sang, ana koro wo wo.”

⁴³ Owo enjel kehm soro lohng go ejahbetul Esowo ba kak-e eko.[†]

⁴⁴ Eji ala jo sahb teel-e teelee, á kehm nyenngge, jo kak ero. Nwuuru nyi á wuuru no, nyi jo toongo wohngo ndi jolo ana agburu atoongo alung.

⁴⁵ Eji á mehle go edi ji á jo kak ero, á kehm feere goji abat'toono ebe, song kpiri bo, bo kp'lale, tib ndon nyi jo fili bo.

⁴⁶ Owo á kehm bahbe bo re, “Jen ji wahnge n kp'lale? Tahmen, wahn kak ero, eji n l'k'yel go elgaare.”

Ana bo bobo Jisos

(Mat 26:47-56; Mak 14:43-50; Jon 18:3-11)

⁴⁷ Eji á kpi mbungu mbungu, ellong ane kehm soro lohng abake. Nne no bo jo lung-e re Judas ji woomo go ellong abat'toono Jisos, ewubu ane abal, ye wo jo tib bo mbang. Eji bo ma rehng goji Jisos, Judas kehm jeere kohlo Jisos re á sod-e nnyo.

⁴⁸ Owo Jisos kehm-e bahbe re, “Judas, anv, a bahke jabbe Mmon no nne ka go nnyo asoda?”

⁴⁹ Eji abat'toono Jisos nyehne ji yahke lim, owo bo kehm bahbe re, “Ntul, wahr ko akahngkahng enyahre, song nok a boa?”

[†] 22:43 22:43 Mak 1:13; Hib 1:14

⁵⁰ Nne awohng go bo ellong kehm fohko ekahngkahng ebe, kpale nju nyi ntubesi abalimajom etung eboblum.

⁵¹ Owo Jisos kehm-e tongo re, “Ka kpe lim ano!” Á kehm rodo etung nne noo, feere a bi lak-e, á nob.

⁵² Jisos kehm bahbe atubesi abalimajom, a atubesi ane ba jo baabe etahk Esowo, a anebkul nfam ba ba re bo ba bob-e re, “Ñ lohngo a akahngkahng, a atahmtahm atahmtahm ana n kp'bake a nwajv boba?

⁵³ N jo jolo a nahne go etahk Esowo efung abehng abehng, me n lakem abo.‡ A wo li ngare enyahne, a nyi atubesi ba ejanng.”§

Ana Pita tene Jisos

(Mat 26:57-58,69-75; Mak 14:53-54,66-72; Jon 18:12-18,25-27)

⁵⁴ Owo bo kehm bobo Jisos tahm a ne go etahk ntubesi abalimajom. Jisos jo jene ekv, Pita jen ekv.

⁵⁵ Bo kono agun go nlaaga nyio, ji senngge kak. Pita kehm tob song ji o a bo.

⁵⁶ Eji nlokeltum no jolo nnenkal nyehne Pita jehk go agun, owo á kehm-e seenge too, kehm bungu re, “Nne noa fvfo tob jolo a ne!”

⁵⁷ Owo Pita kehm gbaame re, “Nnenkal, me we n nehme kahn.”

⁵⁸ Eji ma kpe ji mmongare ntiil, nne noko kehm-e tob nyehn, kehm bungu re, “A tob wob go bo ellong.”

‡ 22:53 22:53 Luk 21:37; Jon 7:30 § 22:53 22:53 Jon 8:20; 14:30-31; Ef 6:12; Kol 1:13

Owo Pita kehm tene re, “E'ee mbi, me sang.”*

⁵⁹ Eji ma kpe ji ejum awa anyehng, nne noko kehm kpe bung t'tahne re, “Etingitingi, nne noa tob jolo a ne fvfo, tibre ye nne a Galili wo.”

⁶⁰ Owo Pita kehm faange re, “Mbi, n nehme kahn ji a kp'b'bung.”

Tvtv ona eji á kpí mbungu mbungu, nkok kehm soro kuk.

⁶¹ Ntul a Jisos kehm soro keebe, seenge Pita.† Owo Pita kehm buumu ellum ni Ntul a Jisos bungu no tong-e re, “Re nkok kehm kuku lela, a bahk-m tene nkpel era.”‡

⁶² Pita kehm soro lohng ona, song kehme ellingi ndon ndon.§

Ana bo jo nyok Jisos

(Mat 26:67-68; Mak 14:65)

⁶³ Ane ba jabbe Jisos kehm-e kehme elnyoko, fere jo dv-e.

⁶⁴ Bo tob gba-e mbomo go esamahr, kehm-e bahbe re, “Nyehn amahr me! Anv, nne awo ma-a rum?”

⁶⁵ Bo kpe bung alum nyako gbalee, nya bo jo su-e.

Ana Jisos yiimi go esamahr elam

(Mat 26:59-66; Mak 14:55-64; Jon 18:19-24)

⁶⁶ Eji efungfu ma se, anebkul Jus, atubesi abalimajom, a at'tibi ba atahm kehm ba kono edi ajehng, kehm koko Jisos ba a ne go bo elam, kehm-e tongo re,

⁶⁷ “Tong-r, joare wo wo li Mesaya!”*

* 22:58 22:58 Gal 2:11-12 † 22:61 22:61 2 Tim 2:13 ‡ 22:61

22:61 Luk 22:34 § 22:62 22:62 2 Kor 7:10 * 22:67 22:67 Jon 10:24-25

Owo Jisos kehm faange bo re, “N l'tong-n anv, í nehm taame.

⁶⁸ N l'fere bahb-n na, í nehm faange.†

⁶⁹ Bomo anv asongo, Mmon no nne bahke jehke go eboblum Esowo bi gbale sehng.”

⁷⁰ Bo ane kpee kehm bahbe re, “Anv, wo wo li Mmon no Esowoa?”

Jisos kehm faange bo re, “Me wo, í bungu nseenge.”

⁷¹ Owo bo kehm bungu re, “Anv, e bahke kpe seb ntiansea? Wahrfono antahng ebwuk go ege a nnyo.”

23

Ana Jisos yiimi go esamahr Paillet, nne a Rom no jo fili Juda

(Mat 27:1-2,11-14; Mak 15:1-5; Jon 18:28-38)

¹ Ellong ane bao kpee kehm tahme, ko Jisos song rehng a ne goji Paillet.

² Owo bo kehm-e kehme ebi ka re, “E sebe kahn re, nne noa kpi ane ebahre ranng, fere jo sahd-r re wahr k'kpe tahb etak ka Ntul a Rom,* fere jo bung re, ye wo li Kraist ji li ntul.”†

³ Owo Paillet kehm-e bahbe re, “Anv, wo wo li ntul no Jusa?”

Jisos kehm-e faange re, “Me wo, a bungu nseenge.”

⁴ Paillet kehm tongo atubesi abalimajom, a ellong ane bao re, “Ebi ajehng ajehng n nyehnem ji nne noa ma lim.”

† 22:68 22:68 Mak 11:29-33

* 23:2 23:2 Luk 20:22-26

† 23:2

23:2 Jon 19:15

⁵ Bo kehm kpe nyenng na, jo bung re, “Á kpo lim ntim ane jo jokko go ege eltibi.‡ Á bomo go Galili, á ma yanng go Judea kpee, anv, á ma ba a.”

Ana Jisos yiimi go esamahr Herod

⁶ Eji Paillet wuku ano, á kehm bahbe, joare Jisos nne a Galili wo.

⁷ Á kahne kan a re á lohng go ejahbe ji ntul a Herod kp'fili,§ á kehm-e tumu tv Herod ji jolo go Jeusalem ngare nyio.

⁸ Eji Herod nyehne Jisos, atahng yeb-e sehng. Tibre á bomo elsebe wuku re á nyehn-e, tib eji á wuku bada ne.* Á jo tob sebe re á nyehn nkpokosi nyindiki nyi á bahke limi.

⁹ Owo Herod kehm bahbe Jisos abahbe tvv, jol Jisos we tikem faange.†

¹⁰ Atubesi abalimajom, a at'tibi ba atahm tob jolo ona fvfo. Owo bo jo ka-e ebi gbalee.

¹¹ Herod, a nsoja enye bum Jisos daange daange daange, fere jo nyok-e, kehm-e kake ekpawobo ji nno a nno, ji jo nyane go amahr, kehm-e tumu tv Paillet.

¹² Efung bio bi, Herod abola Paillet, bo fere jol go etem, tibre wuku wuku bo jolo go ekv.

*Ana bo lame elam kimi re bo bahke wulu Jisos
(Mat 27:15-26; Mak 15:6-15; Jon 18:39-19:16)*

¹³ Paillet kehm lungu atubesi abalimajom, a atubesi ane, a ane bako,

‡ 23:5 23:5 Jon 11:47-48; Elt 17:6 § 23:7 23:7 Luk 3:1 * 23:8 23:8 Luk 9:9 † 23:9 23:9 Mat 7:6

¹⁴ kehm tongo bo re, “N ko nne noa ba kak-m go ebo, no m bungen re á kpi ane ranng. Eji m bahb-e abahbe go egahne esamahr, n nyehnem ebi ajehng ajehng ji á limi no, ji wahnge n kp-e kake ebi.

¹⁵ Ano wo fvfo tob jol goji Herod, tib eji á feere a ne ba ka-m. Nne noa limem ejumjum ji fuumu re bo wul-e.

¹⁶ Owo wahnge m bahke tongo, bo dv-e, n fere yak-e, á song.”‡

¹⁷ Elkak Pasova anehng anehng Paillet jo yehke nne a ngbekobo awohng ka bo.

¹⁸ Ellong ane bao kpee kehm rabe nnyo nnyo amehng re, “Song a nne noo, wo song wul-e, wo yake Barabas ka-r.”§

¹⁹ Barabas, bo kak-e ngbekobo tib eji á jo jokko ejahbe, fere wul nne.

²⁰ Paillet jo sebe re á yehke Jisos yake, owo á kehm kpe bung a bo.

²¹ Bo kpe rabe na re, “Kum-e go ekros! Kum-e go ekros!”

²² Owo Paillet kehm kpe bahb bo go nkpel era re, “Anv, jen ji wahnge? Ebi aji á limi no? N nyehnem ebi ajehng ajehng ji á limi no, ji fuumu re bo wul-e. M bahke tongo bo dv-e, n fere yehk-e yake.”

²³ Bo kehm kpe ny'nyenng na, jo rabe wahre wahre wahre re bo kum-e go ekros.* Es'kohro elrabe ni bo jo gohro rabe kehm gake Paillet.

²⁴ Owo á kehm kimi elam ana bo jo seb,

‡ 23:16 23:16 Elt 3:13 § 23:18 23:18 Elt 3:14 * 23:23 23:23 Elt 21:36

²⁵ fere yehke nne no bo sebe no yake, no bo kak-e ngbekobo tib eji á jo jokko ejahbe, fere wul nne, kehm fere yehke Jisos ka, bo lim-e ana koro bo.

Ana bo kumu Jisos go ekros

(Mat 27:32-44; Mak 15:21-32; Jon 19:17-27)

²⁶ Eji bo ko Jisos, jo tahm a ne, bo kehm song wane nne awohng no bo jo lung-e re Saimon, ji jolo nne a Sirin. Á lohngo go mmojahbe noko kp'tahme go Jeusalem. Bo kehm-e bobo, kun-e ekros re á sol, jo toono Jisos go njahm.

²⁷ Ellong ane gbalee ba jo toono Jisos, a anebkal ba jo ling-e ndon ndon.

²⁸ Owo Jisos kehm keebe, kehm tongo bo re, "Anebkal ba Jeusalem, ka ma wahn kpe ling! Lingen elnahne, wahn ling abon ebahne!

²⁹ Tibre ngare kp'bake nyi bo bahke bungu re, 'Elfuulu li ka agum anebkal, ba kala j'jel, bo ji kala y'yabe abon.'†

³⁰ Owo bo bahke kehme elbungu tong awong re, 'Gboon bul-r!'‡

³¹ Esowo l'lim eti mbir mbir ano, l'lim renan, á l'k'tob lim ekpakv eti ano?"§

³² Ane abal bako ba jolo abi ane, bo tob ko bo tahm a bo re bo tob song wul bo a Jisos.

³³ Eji bo song rehng go edi ji bo jo lung re edi nkpakesi, owo bo kehm kumu Jisos go ekros, a abi ane bao fvfo, noko go ege ejang eboblum, noko go ege ejang ebobkal.

† 23:29 23:29 Luk 21:23 ‡ 23:30 23:30 Ell 6:16; 9:6 § 23:31 23:31 1 Pit 4:17

34 Jisos kehm bungu re, "Nsoo, tahm ka bo, tibre bo nehme kahn ji bo kp'limi."*

Bo kehm tubu elfaange, eji bo l'kahn ana bo bahke baange nsol ebjing enye.

35 Ane yiimi ona, jo nyehn, eji atubesi Jus jo nyok-e re, "Á kpo tahre ane bako, nong, á tob tahre elne, joare ye wo li Kraist ji Esowo ma yehke."†

36 Nsoja t'tob nyok-e fvfo, owo bo kehm bake re bo ba ka-e amahm,

37 fere bung re, "L'jol re wo wo li ntul no Jus, tahre elna!"

38 Bo tob nyono nwer lake kohlo go ege esi. Nwer nyio bo nyono go Grik, Latin, a Hibru re, "A WO LI NTUL NO JUS ."

39 Ebi nne ajehng ji tob kpaake go ekros kohlo Jisos, kehm-e suku re, "Wo sang li Mesayaa? Tahre elna, wo tob tahr-r me!"

40 Noko kehm-e nyame re, "Anv, a nehme fahl Esowoa, eji bo ma tob kimi elam re bo wul-aa?

41 Wahr kp'nyehne erem bia go nseenge. Tibre e kp'bele eltuuru enahre ni fuumu re wahr bel go nsol nyi e limi no. Wo, nne noa, jol ebi ajehng ajehng á limem."

42 Owo á kehm bungu tong Jisos re, "Buum-m, a l'ba ji go ega eti etul."

43 Jisos kehm-e faange re, "Etingitingi, n kp-a tongo re, Lela a bahke jolo a name go ejahbetul Esowo."‡

* 23:34 23:34 Elt 3:17; 7:60 † 23:35 23:35 Luk 4:23 ‡ 23:43 23:43 Ef 2:8

Ana Jisos kpo no

(Mat 27:45-56; Mak 15:33-41; Jon 19:28-30)

⁴⁴ Jolo ejum nkaranka ewubbal nyi efin, nyi ejanng e gbo no ejahbe jio kpee, ji tete rehng nkaranka era nyi elgung.

⁴⁵ Njul kpeem ya. Ekpiki ji tokko go etahk Esowo kehm yange ejang ebbal.§

⁴⁶ Owo Jisos kehm rabe wahre wahre wahre re, “Nsoo, me n yake etohko ejame kak go ega ebo.*” Eji á ma bung ano mal, á soro kpo.

⁴⁷ Ntubesi a nsoja nyehne kan ji ma lim, á kehm kehme Esowo tehk, fere bung re, “Etingitingi, nne noa lohko jol etingi nne.”

⁴⁸ Ellong ane ba kame ba rur re bo ba nyehn ana bo bahke wulu Jisos, eji bo nyehne ji ma lim, bo kehm feere ebo kehng ndon ndon.

⁴⁹ Ane kpee ba kahne Jisos, a anebkal ba lohngo go Galili toon-e ba rehng o, bo yiimi ebo fee, jo nyehn nsol nyia.†

Ana bo kake Jisos go elahm

(Mat 27:57-61; Mak 15:42-47; Jon 19:38-42)

⁵⁰ Nne awohng jolo go, no bo jo lung-e re Josef ji lohng go ejahbe Jus ji bo jo lung re Arimatia. Á jolo nnooba nne, no jolo go etingitingi, fere jol ntul esub.

⁵¹ Á jo siki etul bi Esowo bi kp'bake.‡ Owo wahng e á ki taame tv ntoobo ebo nyi bo toobo no, fere lim.§

§ 23:45 23:45 Hib 6:19; 9:3; 10:20 * 23:46 23:46 Elt 7:59

† 23:49 23:49 Luk 8:1-3 ‡ 23:51 23:51 Luk 2:25-38 § 23:51 23:51 Mak 3:6; 14:64

⁵² Á kehm tahme song bahb Paillet, joare á bahke taame, á song fono ekv ji Jisos tahm a ji.

⁵³ Owo á kehm song fono ekv ji Jisos, fere kpennge ekpowo, rod song kak go elahm bi á rahme go ekpartal, bi bo kala k'kak nne awohng awohng.

⁵⁴ Jolo efung bi bo jo toobo ebjing bi Esabat yahke rehng.

⁵⁵ Anebkak ba lohngo go Galili jo toono Jisos kehm tob ba nyehn elahm, fere nyehn ana bo kak-e no.

⁵⁶ Owo bo kehm feere, ba toobo anyane, fere toobo akehng bum. Efung Esabat bo kehm jehke, re ekv, ana ntahm bungu no.

24

Ana Jisos nyahme go elkv

(Mat 28:1-10; Mak 16:1-8; Jon 20:1-10)

¹ Ngbokambang efung go erahde, efungfu atv atv, bo kehm rodo anyane nya bo toobo no, tahm a nya go elahm.

² Eji bo rehng go, bo kehm song nyehn eltal nio ma banng go nnyo elahm, noongo go nkpe.

³ Owo bo kehm maade yel, jol ekv ji Ntul a Jisos bo nyehnem.

⁴ Eji bo yim o, ma bil bo amahr, bo kehm soro nyehn ane abal yim kohlo bo, ba kake nsol nyi jo nyane.

⁵ Eji anebkal bao jo fahl, fere kohk asamahr go ndi, ane bao na abal kehm soro kehme elbungu a bo re, “Jen ji wahng n kp'sebe nne a mbir mbir go ellong akvne?

⁶ Ana á limm. Yebnyahme. Buumen ana á tong-n no ngare nyi á kpeke li go Galili re,

⁷ 'Mmon no nne, bo bahk-e yake, kak abi ane go ebo, bo kum-e go ekros, l'kang nfung era, á nyahme go elkv.' ”*

⁸ Owo anebkal bao kehm soro buumu alum enye,

⁹ kehm lohngo go elahm feere, song tooro nsol nyio tong abat'toono ebe, ewubu a nne awohng, fere tob tong erik ane bako fvfo.

¹⁰ Anebkal ba tongo abatiingetib nsol nyia jolo Meri ji lohng go Magdala, Joanna, Meri nnyehn Jems, a anebkal bako ba tob jol a bo fvfo.†

¹¹ Abatiingetib, alum nya anebkal bao tongo bo jolo bo ana emongo. Bo taamem tv bo.

¹² Pita kehm tahme, be song rehng go elahm, kehm song reme fahng, nyehn akpowo nya nya nong no. Owo á kehm feere kehng, fere jo tir bade ji ma lim.

Ana abat'toono Jisos na abal jo tahm go Emmaus

(Mak 16:12-13)

¹³ Efung b'nehm ona ane abal ba woomo go bo ellong lohngo jo tahm go ejahbe ji bo kpo lung re Emmaus ji jolo ejum mmal esehma, a l'tahm go Jeusalem.

¹⁴ Bo jo tubu eka atemtem bada nsol nyia kpee nyi ma lim.

¹⁵ Eji bo kpi mbungu mbungu atemtem, fere jo tiiri, yefono Jisos kehm lohngo ba kpiri bo, jo jen a bo.

* 24:7 24:7 Mat 17:22-23 † 24:10 24:10 Luk 8:2-3

¹⁶ Ngare nyio amahr ebo ka lennge, owo bo ki-e liingi.

¹⁷ Á kehm bahbe bo re, “Jen ji ń kp'bungu tong atemtem, eji ń kp'jene asongo ndon ndon?”

¹⁸ Owo nne awohng no bo jo lung-e re Kleopas kehm-e faange re, “Anv, wo ntahngtahng wo ga li njenne nyi li go Jerusalema, nyi kil kahne nsol nyi ma lim a afung nyaa?”

¹⁹ Á kehm bahbe bo re, “Nsol anyi?”

Owo bo kehm-e faange re, “Nsol nyi ma lim Jisos ji Nasaret,” ji jolo nnyehnamahr no jo bung alum nya kpi nsahm, fere jo lim agburu akpokosi go esamahr Esowo, a esamahr bi ane kpee.‡

²⁰ Atubesi abalimajom ebahre, a atubesi ebahre ba yak-e no ka re bo kimi elam ji bo bahk-e wulu. Owo bo kehm-e kumu go ekros.

²¹ Wahr jo kunu ekpu re, ye wo bahke fake Israel yake.§ Gana yebkpo! Lela nfung era nyi a, nyi nsol nyia limi no.

²² “Fvfo, ji ma-r kpe kp'kpo esi, anebkal bandiki ba wob go egahre ellong fungu efungfu atv atv, je go elahm,*

²³ ekv eje bo nyehnem. Bo kehm feere ba, ba bung re, bobnyehn nkpokosi ejum, eji bo nyehne enjel nyi tongo bo re, á noa go elkpín.

²⁴ Egom jindiki ji woomo go egahre ellong kehm jeke go elahm, lohko song nyehn jang jang ana anebkal bao bungu no, sehngem yefono wo bo ki-e nyehn.”†

‡ 24:19 24:19 Mat 21:11 § 24:21 24:21 Elt 1:6 * 24:22 24:22
Luk 24:1-10 † 24:24 24:24 Jon 20:3-10

25 Owo Jisos kehm tongo bo re, “Wahn agboolo ane baa, jen ji wahnge kpo riid-n go eltaame ejum ajehng ajehng ji anyehnamahr nyono no?

26 Tiki li re, Mesaya gbo mbang nyehn erem bia kpee, kehm yele go ege ellub.”

27 Owo Jisos kehm lennge adi nwer Esowo kpee nya bungu bada ne tong bo, bomo go awer nya Moses, a awer nya anyehnamahr kpee.‡

28 Bo kehm kabbe ejahbe ji bo fi no. Jo jolo are Jisos yahke sehng asongo.

29 Bo kehm-e gboongo re, “Ba kang a nahre, tibre elgung ebba, gana ejanng ebkehme elgboko.”

Owo á kehm song yel ekp'kpa re á song kang goji bo.

30 Eji á ji ekp'kuru, jo li nsol a bo, owo á kehm rodo ebred, kak Esowo saam, bakke, ka bo.§

31 Owo amahr ebo kehm soro lennge, bo kehm-e soro liingi. Á kehm soro lamme.

32 Owo bo kehm kehme elbungu, jo tong atemtem re, “Ano wo wahnge alum enye jo yall-r, eji á jo bung a nahre go mbang, fere jo lennge nwer Esowo tong-r.”

33 Owo bo kehm soro mehl tvtv, feere go Jeusalem, ba nyehn abat'toono Jisos, ewubu a nne awohng ma ba kono edi ajehng, a ane ba tob jol a bo o fvfo,

34 ba jo bung re, “Ntul a Jisos eblohko nyahme go etingitingi. Saimon m-e nyehn.”*

‡ 24:27 24:27 Jon 1:45 § 24:30 24:30 Luk 22:19 * 24:34 24:34
1 Kor 15:5

³⁵ Owo ane abal bao kehm tob tooro ana ji limi go mbang tong bo, ana bo liing-e no ngare nyi á bakke ebred.

Ana Jisos ba kpiri abat'toono ebe

(Mat 28:16-20; Mak 16:14-18; Jon 20:19-23; Elt 1:6-8)

³⁶ Eji bo kpi mbungu mbungu, yefono Jisos kehm soro ba lohng go bo elka, kehm bungu tong bo re, “Elkoono jol a nahne!”

³⁷ Kehm mennge bo, bo kehm kehme elfahle, fere jo tir re, etohko ji bo kp'nyehne a.†

³⁸ Owo á kehm bahbe bo re, “Jen ji wahnge eko ma-n tan ana? Jen ji wahnge n kp'faabe go egahna ntim?”

³⁹ Nyehnen abo enyame, wahn nyehn akpade enyame fvfo, eji n l'kahn re mefono antahng wo. Dam-m wahn, wahn nyehn. Tibre etohko, ngubjing kpimm, ana m ma-m nyehn, n kpi no.”‡

⁴⁰ Á bungu kan ano mal, á kehm tibi bo abo enye, a akpade akpade.

⁴¹ Eji bo kala tiki taame tib go eyebatahng ji bo bele no, a esi ji jo kpo bo, owo Jisos kehm bahbe bo re, “Anv, n kp'kpi ejum ajehng ajehng a, ji ellehka?”

⁴² Bo kehm-e kake ekv nsahre ji bo ma lam.

⁴³ Owo á kehm taare li go bo esamahr.

⁴⁴ Á kehm tongo bo re, “Alum enyame nya ana, nya n jo bung a nahne ngare nyi n kpeke li a nahne re, Ejum ajehng ajehng ji bo nyono bada name go atahm nya Moses, fere nyon go awer nya

† 24:37 24:37 Mat 14:26 ‡ 24:39 24:39 1 Jon 1:1

abanyehnamahr, a nwer a Saams bahke lohko jol go etingitingi.”§

⁴⁵ Owo á kehm lennge ntim ebo, eji bo l'kahn nwer Esowo,

⁴⁶ fere tong bo re, “Ana wo bo nyono re, Mesaya bahke nyehne erem, l'kang nfung era, á nyahme go elkv,

⁴⁷ bo fere tiingi ane kpee ba li go njini etib bi egbokondon, a bi eltahmeka go abiafem. Go Jeusalem wo, bo bahke bomo etib bio go eltiingi go ege a mbing.

⁴⁸ Wahn ba li atianse go nsol nyia.

⁴⁹ M bahke tumu ji nsoo nyame no tv-n.* Jolen ejahbe jia a, tete nsahm nyi bahke lohngo go ero, lohng ba tob-n.”

*Ana Jisos tahme go ejahbetul Esowo
(Mak 16:19-20; Elt 1:9-11)*

⁵⁰ Owo á kehm rodo bo, tahm abo song rehng go Betani. Owo á kehm tabe abo enye wahre, fuulu bo.

⁵¹ Eji á jo fuulu bo, á kehm soro tahm bo sa. Nsahm nyi Esowo rod-e tahm a ne go ejahbetul Esowo.

⁵² Bo kehm feere go Jeusalem, a egburu eye-batahng.

⁵³ Bo jo jolo go etahk Esowo ngare anyehng anyehng, jo tehk Esowo, fere jo kak-e saam.

§ 24:44 24:44 Luk 24:27 * 24:49 24:49 Jon 15:26; Elt 1:4-5; 2:1-4

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4